



FECHA Y DATONAN HISTORICO DI ARUBA



ARUBA DEN PASADO Y PRESENTE

*Compilá y scirbí pa Dufi Kock, Escritor
Juni 2005*



Adolf (Dufi) Kock, escritor



E cas aki, Savaneta #50, tabata pertenecé na Francisco Vicente Thijsen y Abellona van der Linden. Dia 30 di Augustus 1905 nan a encontrá matrimonio. Francisco Vicente a muri dia 15 di Juni 1966 y Abellona a muri dia 20 di April 1969. Siguietemente un yiu homber, Henrico Thijsen, cu no a casa a keda biba den e cas. Promé cu Henrico a muri dia 13 di Mei 1998, el a pasa e cas pa Sr. Jozef Donato Croes casá cu Carmen Mercedes Paskel, nieta di Francisco Vicente y Abellona. Siguietemente Jozef y Mercedes a pasa e cas pa nan yiu, Srta. Miriam Croes, cu ta bisnieta di Francisco y Abellona Thijsen.

*FECHA Y DATONAN HISTORICO
DI ARUBA*

*AUTOR
ADOLF (DUFU) KOCK*

*Dedicá na mi amigo, Sr. Florentino Martin (Tino) Ruiz, pa su sosten
y apoyo di semper*

*Gradicimento na un y tur cu di un manera of otro a contribuí na e
realisacion di e buki aki, y muy en especial na Ija, mi señora*

Juni 2005

FECHA Y DATONAN HISTORICO DI ARUBA

Parti I

1150 - *Promé cu Spañónan a descubri nos islanan, indiannan Caiquetios tabata biba aki durante e tempo di aña 1150 te cu 1500. Nan a bini for di Coro y Paraguana. Nan tabata biba na Tanki Flip, Tanki Leendert, Santa Cruz y Noka, Canashito y Savaneta, aunque nan a cana na tur parti di Aruba.*

1492 – *Tempo di Precolumbianonan. Te na 1492 indiannan Arawak y Caribe a biba riba e islanan. Ta e aña tambe cu Columbus a descubri e Mundo Nobo (Noord America y e area di Caribe). Un aña despues, esta 1493, Columbus a nabegá banda di Saba, St. Eustatius, y St. Maarten.*

1499 – *Alonso de Ojeda, Un Spañó, despues cu el a laga Corsow, a yega Cabo San Roman, na Paraguana, Venezuela dia 9 di Augustus 1499. E mesun siman aki el a descubri Aruba. Despues di un paar di dia el a nabegá pa e isla di Aruba, unda el a topa cu un man yen di Indian, halto den tamaña. El a scirbi den su buki: “Den e aña 1499, mi a bin na e isla di Aruba, un isla di gigante. (El a compará e Spañónan y e indiannan di un tamaño normal.) El a reclam’ e pa Corona Spañó y nan a permití e nativonan Indiannan Arawak sigi cultivá nan cultura; y hopi di nos Arubianonan ta descendientenan di Arawak. Despues cu a parce cu Aruba, Boneiro, y Corsow no a produci cualkier metalnan precioso, nan a declará “Islanan Inutil”.*

1500 - *Na cuminsamento di siglo 16 e indiannan a coba un buraco grandi y nan a drecha un altar provisorio pa celebrá e promé Sacrificio di Misa, cu e sacerdote lo bin ofrece mei mei di nan. Dies dia despues cu e Spañónan a bai, nan a mira mainta tempran un barcu bini na tera. Ora e Spañónan a jega, e indiannan a yuda desembarcá un caha grandi cu un Crucificado den dje. Riba dos canoa nan a trece e caha tera. Dos pader, un Franciscano y un Dominicano tabata bordo. Nan a baha y habri e caha pa saca e crucificado. Tur e indiannan a cai abou pa honra nan Dios y Salvador. Seis Indian a carga e cruz riba nan schouder y a poné na e lugar cu nan tabata kier. Tur indian a compañá cantando y tras di e cruz tabata e sacerdotenan. E Spañónan tabata toca fluit y guitarra . Esey tabata e promé procession religioso na Aruba. Probablemente cu esey a conduci cu nan a yama e lugar aki “Santa Cruz”.*

1500 – *Di 1500 – 1636 tabata e tempo di Spañónan.*

1513 – *Diego Salazar a hiba 2000 indian di Aruba, Corsow, y Boneiro pa Santo Domingo (Hispaniola). Aya nan mester a traha pa e Spañónan.*

1526 – *E Spañó Juan de Ampués a bira e gobernador di e islanan ABC y e tabata e promé autoridad politico di Aruba. El a trece algun indian bek pa nos islanan y tambe a bin cu bestianan Europeo, manera cabrito, carné, baca, y cabai. Asina nos isla a haña nos bestianan. Hunto cu Spañónan, religion catolico a bini nos islanan. Semper sacerdotenan Spañó tabata compañá e colonistanan Spañó pa haci e pueblo Indian catolico.*

1527 – *Juan de Ampués ta trece 200 indian bek pa Corsow, Aruba, y Boneiro. Indiannan tabatin e custumber di dera defuntonan den urna. Cabes y busto di e cadaver tabata sali di e urna. Despues nan a dera nan den urnanan mas grandi, asina henter e curpa por a bai aden y a tapa esakinan.*

1527 – *Tempo Spañó - Spañónan hunto cu nan indiannan a biba na Aruba entre 1527 te cu 1636, tempo cu Aruba tabata colonia di España. Na Rooi Frances e indiannan tabata bringa contra nan enemigonan di pafor cu papa cayente cu nan tabata carga den bangaña.*

1527 – Jegada di cristianismo na Aruba.

1531 – Coro a haña su promé Obispo y for di 1531 – 1637 nos islanan tabata depende di Obispo di Coro.

1580 – Pader Martinez de Manzanillo, un pader Dominicano, a bira Obispo di Coro y tabata yama su mes tambe e Obispo di Venezuela, di Provencia di Coro y di islanan Corsow, Aruba, y Boneiro. Pader Latour a scirbi cu e Obispo aki a yega di administrá e sacramento di confirmacion na Aruba pa promé biaha na Aruba. Desde e tempo ey, e segundo biaha cu hendenan a ricibi confirmacion na Aruba tabata dia 17 di April 1796. Pader Schinck a confirmá nan. Na 1796 a confirmá 56 persona y na 1797 a confirmá 18 y mayoria tabata hende grandi. Mescos cu na Boneiro, tin bes e mesun persona cu ta confirmá ta para padrino di un otro persona, riba e mesun dia. Asina a pasa cu Luisa Walup Silvester, Maria Magdalena Franck, Johanna Weis, y Juan Gregorio Wolff. Den archivo ta indicá cu Johanna Weis tabata un di e catoliconan di mas respetá den e tempo ey. Probablemente e tabata biba noord di Westput, pasobra ey tin un cero cu jama Cero Weis. Riba e cero ainda tin marca di un cas grandi cu curá di bestia.

1592 – Mgr. A. v. d. Veen Zeppenveldt a bin bendicioná e Capiya nobo di Alto Vista dia 25 di Mei 1592.

1601 – Davis Middleton a bini Aruba y e indiannan di Aruba a mata 7 di su hombernan.

1625 – De Laet: “Aruba ta bashí, ma e tin dos cero chikito. Un di nan ta manera un pan di sucu. Aruba ta mas o menos 5 miya grandi pa pasa rond y poco Indian y algun Spañó ta biba eynan”.

1627 – Expedicion di Dirk van Uygeest: “Na Aruba nan no a baha na tera pasobra nan a mira poco hende riba cabai.

1634 – Te aña 1634 Aruba tabata bao dominio di Spaña. Promé cu e Spañónan a yega nos isla nan tabata forma parti di Caiquetionan. West Indian Company, un Industria Comercial Hulandes. cu cuartel general na Rotterdam, cu derecho di conkista, a tuma over. E isla, e tempo ey, a wordu lagá pa su mesun destino, mas o menos, pa motibo di e dificultad extremo pa mantené comunicacion entre Corsow y Aruba. E compania Hulandes, sinembargo, a duna permiso na algun escogí pa establecé y participá den comercio riba e isla. Historia ta indicá “Moses Van Salomon Levi Maduro” tabata e promé stranhero pa establecé na Aruba. Esaki a spanta e Spañónan y indiannan y nan a hui for di Aruba bay Venezuela.

1636 – Tempo di Hulandesnan 1636 – 1725. Aña 1636 ta aña cu Hulandesnan a tuma poder despues di e culminacion di 80 aña di guera entre Hulanda y Spaña. Hulanda tabata interesá den e islanan den Caribe pasobra Hulanda e tempo ey tabata tin un fabrica di haaring y nan tabata tin mester di salo, y Aruba, Boneiro, Corsow, y St. Maarten tabata tin hopi. E tempo ey no tabatin hende mas na Aruba. Na Corsow y Boneiro Hulandesnan a importá catibunan di Africa pa bin traha den cunucu y saliña. Tambe nan a bay busca indiannan for di costa firme. E indiannan aki a forma e cuminsamento di nos poblacion actual.

1636 – Entre 1636 y 1792 Aruba tabata depende di e colonia di Corsow; e gobierno tabata den man di e Compania Hulandes di Indias Occidental.

1636 – Spañónan na Coro a saca idea pa hiba e indiannan di Corsow pa Aruba, pero nan no a haci esey.

1637 – Obispo di Coro a cambia sede bay biba na Caracas, pa motibo cu e Hulandesnan por ataca Coro. Asina for di 1637 te 1714 nos islanan tabata depende di Obispo di Caracas. Mescos cu na Hulanda mes, aki tambe e gobierno Hulandes a taha e religion catolico. Ma e

governador no a molestia nan curpa mucho pa stroba e trabao di sacerdotenan Spañó. Un misa formal si no tabatin ainda na Aruba.

1640 – *A cuminsa otro imigracion di indiannan.*

1642 – *Petrus Suyvesant a bishita Aruba pa busca cabay.*

1642 – *Hulandesnan a laga 6 cabay di Aruba na Maracaibo hunto cu un indian pa muestra caminda. Peter Stuyvesant, director di e tres islanan, a bishitá Aruba na November pa busca cabay pa su expedicion di vengansa na e costa Venezolana. E motibo tabata contra e Spañonan cu poco promé a causa daño na Boneiro.*

1643 – *Peter Stuyvesant a wordu nombrá como gezaghebber di Aruba y Antiyas, un puesto cu el a retené te na 1647.*

1675 – *Tempo di Hulandes – Hulandesnan a cuminsa bende e pipa di Gouda (un pida pipa blancu di klei) y flascu di aguardiente.*

1688 – *E Inglesnan a crusa lama pa bin tira bista riba e Spañonan. Nan a reportá cu nan a haña un gobernador y 15 soldá. Tabatin Indian cu tabata papia Spañó y nan religion tabata dependé di e Spañonan.*

1700 – *Despues di 1700, algun hende mas di Corsow a bini na Aruba. Ta nan a trece e Papiamento na Aruba cu poco poco a bira e idioma di Aruba tambe.*

1701 – *Aruba tin un Commandeur cu tabata yama Flaccius, y dos soldá.*

1722 – *E pirata Spañó, Balthasar Carion ta horta bestia y catibo den e bahia di Commandeurs.*

1723 – *Venezuela ta ofrece indiannan na Aruba tera na Velas de Coro y Carasal pa nan biba aya.*

1725 – *Durante e añanan 1725 pa 1750 regularmente un sacerdote di Venezuela tabata bin bishitá Aruba pa bautisá hende. E sacerdotenan aki no tabata firma nan nomber, kizas pa miedo di e gobierno Hulandes na Aruba. Un di e sacerdotenan aki tabata pader Thomas de Arce, un pader augustino.*

1725 – *A yega aki Paulus Printz pa busca oro pa e compania Hulandes di e idiannan Occidental, y su trahadornan tabata ocupá den tur parti di nos isla, pero sin exito.*

1727 – *Director Printz y su trahadornan a haci e promé esfuerso pa saca oro for di piedranan di Aruba. No tabatin mucho exito.*

1727 – *Nan kier a celebrá e fiesta di Nos Señora di Carmen, fiesta cu tabata tierno pa nan curason y cu Spañonan a primi profundamente cu debocion di Nos Señora di Rosario den nan curason. Pero, con lo ceblebré sin sacerdote. Un Diadomingo despues di oracionnan, nan a keda hunto pa trata e asunto. No tabatin fiscal ainda e tempo ey, pero tabatin nan cabes of Cacique cu tabata yama Antonio Gonzalez. El a puntra ken lo kier bai busca un sacerdote na Coro? Pedro Tromp y Federico Garcia, dos indian cu e Capitan Spañó, Juan Bernardo, cu a sali cu e barco di bela dia 6 di Juli. Na caminda nan a pisca pa bende nan cu e Spañonan na Coro. Nan a logra haña un sacerdote den combento na Coro cu tabata despuesto pa bin cu nan. Tur a subi e barco y e capitan a spierta nan pa tene warda contra contrabanda di Rio Hacha. E fiesta a wordu celebrá dia 16 di Juli. Pa 6'or di atardi Juan Bernardo, despues di a contratá 20 indian pa bai traha na Venezuela, a hiba e sacerdote, camoflá na Indian, bek Coro.*

1750 – *Den e promé mitad di siglo 18, un indian di Coro, Domingo Antonio Silvester, tabatin un cas y un pida cunucu pariba di Cero di Alto Vista. Pader Pablo de Algemesi cu tabata na Aruba e aña ey a casa Antonio cu Maria Martha y tabatin cuatro yiu. E tabata un homber di hopi iniciativa, e tabata siña hende catesashi y resa rosario tur Diadomingo y prepará hende pa bautismo, y a dicidi riba su propio gasto traha un kapel. Esaki a sosodé na e*

sitio unda bo ta haña e kapel di Alto Vista hunto cu otro indiannan. Silvester mes no a presenciá e inauguracion, pasobra el a muri un poco antes. Despues a yega di Venezuela un sacerdote pa consagrá y nombra un fiscal nobo. Nan a nombra Miguel Enrique Alvarez, na edad di 25 aña, un yerno di Silvester; el a casa cu Luisa Silvester, yiu muher di Antonio Domingo Silvester. Un otro a tuma lugar dia 20 di April 1750. Tambe tabatin un santana amplio banda di e kapel. Como sesenta indian tabata biba eyan. E aña cu e poco esclavonan cu a keda, nan a mata ruman muher di Paulus Printz. Esaki a haci tambe cu e indiannan a bai na lugarnan mas solitario unda nan a forma un colonia cerca di Alto Vista, un sitio bastante inhospitable, pero toch bon pa biba pasobra eyan tabatin un pos cu tabata producí awa bon pa bebe, esta e Pos di Noord, cu ainda ta existí. Miguel Alvarez a muri na edad di 45aña. El a wordu re-emplasá pa Bernadino Silvester, kende tabatin 34 aña. Bernadino a muri dia 13 di Maart 1786 y ta derá den un tereno di Thomas Kelly, panort di school di Noord, probablemente Gaspar Silvester tambe ta derá eyan. Parti pazuid di e kapel tin dos graf, den e santana cu Pader de Algemesi a bendicioná y probablemente ta grafnan di Antonio Silvester y Miguel Alvarez. E tempo aki nan tabata jama Aruba “Oruba”.

1750 – Nan a traha un misa chikito na canto di lama tras di cero di Alto Vista y nan a jam’é “La Hermita de Nuestra Señora del Rosario”. Segun e custumber di spañonan “hermita” tabata un kapel den campo. Casi tur catoliconan tabata biba rond di cero di Alto Vista y masha poco hende catolico tabata biba parti zuid y pariba.

1754 – West Indische Compagnie a hiba un politica di no permiti cu colonialistanan bin establece na Aruba riba nan mesun cuenta. Te na aña 1754 no tabatin hende blanco na Aruba y ta te na aña 1790 a bin mas hende blanco. Despues di 1790 e blanconan a muda di Corsou pa Aruba y despues di 1822 tabatin temporalmente hopi Venezolano. Na aña 1754 Moyses Levis Maduro a haña permit pa dirigi un plantage, un cunucu na Aruba. Pero a dura te na 1775 cu hende di pafó a haña mas libertad pa bin establecé na Aruba.

1756 – Pader Fray Anaspe tabata na Aruba dia 15 di Augustus 1756 y a bautisá un yiu di Miguel Alvarez, esta Maria Alvarez.

1762 – Pader Agustin Chirino a bishita Aruba den luna di Augustus. Dia 7 di Augustus el a bautisa un otro yiu di Miguel Alvarez, cu tabatin mesun number cu su tata, esta Miguel Enrique. Ademá el a casa Bernadino Silvester y Anna Cathalina Tromp, pero sin bendicion nupcial. E tabata carga e titulo Doctór.

1763 – Fiscal Miguel Alvarez di Alto Vista a cumpra un catibo di Algeria na Corsow pa duna e catibo su libertad. Pastoor L. Jansen a scirbi den su buki “Cuenta y Historia di Curacao y su Colonia” cu Aruba casi no tabata tin esclavitud pasobra Aruba, mas cu tur otro isla, a trata su catibunan tur afor, manera un di nan mes, asina apenas bo por a mira diferencia den nan y hende liber. Aruba no tabata tin mas cu dies catibo di rey of gobierno.

1764 – Pader Pedro Rodriguez de Guevara, un pader Franciscano, a bishitá Aruba dia 24 y 27 di October y dia 3 di Januari di 1765 na number di pastoor Theodorus Tenhoven, pastoor di Corsow, Aruba, y Boneiro pa mira con e bida cristian na Aruba tabata. Pader Rodriguez a duna bendicion matrimonial na Bernadino Silvester y Anna Cathalina Tromp, kendenan Pader Chirinos a casa caba. El a casa tambe Andres Tromp y Anna Christina Alvarez dia 3 di Januari 1765. E promé yiu di Bernadino Silvester a nace na aña 1762 y Fiscal Miguel Alvarez a bautisá pasobra e tabata malo.

1768 – Un cierto Dr. Ignacio Lobera Harvina a bishitá Aruba na luna di November. E tambe a bautisá un Arubanito.

1770 – Den un documento di Pader Pedro Rodriguez e ta yama Miguel Alvarez “indio de dicha isal....indian di Aruba.” Rond di aña 1770 Miguel a muri na edad di mas o menos 45 aña. Storia ta bisa cu ora el a comprondé cu su bida ta bay caba, el a pidi su hendenan pa bin resa rosario pa descansá su alma, ora cu e muri. Segun é, lo e muri riba Diahuebs y riba di tres dia, esta Diasabra lo e duna un señal cu su alma lo sali for di purgatorio pa gosa felicidad di cielo. Enberdad, ora e hendenan tabata resa rosario riba e Diasabra, nan a tende batimento di klok tres biaha. E ta derá den Santana di Alto Vista. Su casá, Luisa Wallup, cu a keda biba hopi mas aña despues, a keda un persona masha respetá pa e pueblo di Noord y Alto Vista.

1772 – Entre 1772 – 1778 nan a traha e misa Sta. Anna na Noord. Probablemente cu ta pader Joachin de Borrás, kende tabata aki entre 21 y 24 di Februari 1776 lo a bendicioná e misa. E motibo cu nan a traha un misa na Noord tabata cu e hendenan a kita for di Alto Vista y a bai biba mas pabou. E tabata mucho leu, mucho canto di lama, y cual tabata causa tambe di un “keintura preto” cu a haci hopi hende muri. Santa Anna tabata e patrona mas stimá cerca e Spañónan.

1772 – Dia 9 di Juli 1772 tabata na Aruba un sacerdote secular, Pedro Massias, cu permiso di pastoor di Corsow. Ora el a tende cu Alto Vista no tabatin un fiscal mas, como cu Fiscal Miguel Alvarez a muri, el a pone Domingo Bernadino Silvester como fiscal. Domingo ta yui di Domingo Antonio Silvester casá cu Maria Martha. Bernadino tabatin casi 34 aña. Pedro Massias a duné encargo pa reuní catoliconan tur Diadomingo pa resa rosario di La Birgen y pa celebrá fiesta di patrona di capiya, esta promé Diadomingo di October cu mas solemnidad. Esaki kier meen, resa henter rosario, esta 15 misterio, mainta y atardi na glordia di Dios, na honor di Reina di Santisima Rosario pa gana indulgencia pa tur defuntonan. Bernadino cu tabata biba cerca di Misa di Alto Vista tabata hisa un bandera riba cero pa avisa e hendenan.

1774 – Durante cu Bernadino tabata fiscal, Aruba y Alto Vista a haña 10 pader: 1774 – Pader Joseph Hernandez; 1775 – Pader Manuel de la Torre; 1776 – Pader Joseph de Borrás, Nicolas Joachin Mendez, Antonio Rodirequez de Fiallo; 1778 – Pader Cristoval de Quesada; 1782 y 1783 – Pader Juan Joseph de Echeverria y 1784 – Pader Antonio de Nis. Nos ta weita anto cu cu casi tur aña un pader Spañó a pasa Aruba pa algun dia. Mission di Corsow na cual Aruba tabata dependé for di aña 1714 no tabatin sacerdote pa manda Aruba.

1775 – Entre 1775 – 1825 Aruba a haña un centro nobo, esta Oranjestad. Di 1775 te na 1775 poblacion di Aruba tabata existi di mas o menos 500 indian; un grupo chikito tabata biba na Savaneta y e resto tabata biba na parti noord di Aruba. E aña ey hopi hende a haña libertad pa bin establecé na Aruba. Hopi colonista Europeo a huy for di Venezuela y Corsow pa motibo di intransquilidad na e teranan rond di mar Caribe di 1775 te cu 1825; tempo di Simon Bolivar, Manuel Piar y Luis Brion cu a yuda duna na Venezuela y teranan di America del Sur, nan independencia, los for di Spaña. Nombenan di catibo Africano ta sali den nos archivo pa promé biaha.

1775 – Savaneta a perde su poblacion, como cu Commandeur cu su hendenan a bin establece na cercania di Paardenbaai cuminsando na Ponton. Ta parce cu nan a compronde cu Paardenbaai tabata un waf mas mihó cu Commandeursbaai of alomenos mas cerca cu e pueblo di parti noord.

1776 – Rond di 1776 misa di Alto Vista a cambia pa Misa Santa Anna na Noord.

1777 – For di Wes Punt te Calabas y di Moko te Eagle ta situá e districto di Noord, E districto mas grandi di Aruba, pero tambe e districto cu e historia mas bieuw y mas colorido di Aruba. Na 1777, e fundamentonan a wordu poní y Santa Anna Noord a bira e promé parokia.

Na 1977 cu orguyo e Parokia a celebrá su 200 aña di existencia. E pueblo mes ta existí mas largo.

1778 – Un corant Americano a bisa cu Aruba tabata sin habitante. Esey tabata tempo di Alto Vista, cu tabatin dos misa, un na Alto Vista y un na Noord. Enberdad, Aruba tabata dos biaha sin habitante, esta dianan cu Spañónan a hiba tur Indian pa Santo Domingo y tambe dianan cu Hulandesnan a yega Aruba. Toch por ta possible cu algun Indian por a sconde nan curpa den e piedranan grandi parti panort di Aruba, di modo cu no por a mira nan.

1778 – Pader Spañó, pader Cristoval de Quesada, a haña dos misa aki: Misa di Reina di Santisima Rosario na Alto Vista y Misa di Sta. Anna na Noord. El a haña sa cu Pader Manuel de la Trinidad tabata e promé sacerdote na Aruba. El a bishitá Aruba na 1726 y el a bin varios biaha mas. Na aña 1750 pader Pablo de Algemesi ta menta algun bautismo di muchanan cu a nace entre 1712 pa 1746 cu pader Manuel de la Trinidad a mira nan fé di bautismo. El a scirbi un declaracion di esaki riba un papel, cu famia Silvester a warda na nan cas pa muestra otro sacerdotenan. Tambe pader Pablo de Algemesi ta e capiya di Alto Vista y e Santana “La Hermita su titulo Nuestra Señora del Rosario”. Door cu Antonio Silvester a siña e hendenan resa rosario, cristiannan di Aruba a stima e rosario di La Birgen masha hopi. Esey lo a duna e nomber di misa di Alto Vista: “Santisima Rosario di Alto Vista”. Pader Cristoval tabata yama su mes: “Fray Cristoval Valeriano Maximo de Quesada, presbitero del Sagrado Real Militar Orden de Nuestra Señora de la Merced, redencion de cautivos, cathedratico de eloquencia e bellas artes en el convento de Caracas”.

1780 – Entre 1780 y 1790 Europeonan (comerciante) cu a bin Corsow anteriormente, a bin establecé na e lugarnan poco mas halto rond di Playa, manera Ponton, Tanki Leendert, Solito, Shiribana, Sero Patrishi, Sero Blanco, y Tarabana.

1784 – Gaspar Silvester, ruman di Bernadino Silvester, cu a nace 1724 a muri promé cu aña 1784.

1786 – Bernadino Silvester, cu tabata un fiscal di Alto Vista, a muri di bruhera dia 13 di Maart 1786. El a keda derá den un tereno, noord pariba di school na Noord. Gaspar Silvester tambe ta derá eynan. Ta solamente Domingo Antonio Silvester y Miguel Alvarez ta derá na Alto Vista. Un barco a trece e enfermedad di bruhera.

1786 – Entre 1786 y 1821 tabata tempo di Andres Hieronymo Tromp, fiscal na Santa Anna na Noord. Andres a casa cu Anna Cristina Alvarez, yui di Miguel Alvarez y Luisa Guadalupe Silvester. Anna Cristina a nace na aña 1746 y Andres a nace mas o menos na aña 1745. Ta Andres tabata ricibí e sacerdotenan cu tabata bin bishitá Aruba. E tabata asistí tambe na bautismo y matrimonio. Entre 1786 y 1813 tabata di bishita: Pader Juan Pedro Fuente, Juan Joseph Priovano, Theodorus Brandts, Jacobus Schinck, y Joseph Nicolas Lopez.

1787 – Pader Juan Joseph de Oropesa a cuminsa cu un buki di morto cu e siguiente palabranan: “14 Noviembre 1783 enteré en la Hermita de Santa Anna en Orua....”

1788 – Pader Cristoval de Quesada a cuminsa mantené documentacion manera buki di bautismo y matrimonio.

1788 – Pader Schinck a keda un luna na Aruba y a bautisá 114 mucha y 10 hende grandi. Ademas 80 mucha, cu un sacerdote a bautisá caba pero sin ceremonia, a ricibí e ceremonia tambe. Na tur anto, 204 den un luna. E no a bautisá tur dia, pero mas parti tur siman un dia. Por ehemplo, dia 15 di Juli el a bautisá 66 mucha. El a pasa masha hopi trabou pa haña sa cua mucha a baustisá caba of si nan a haña ceremonia. Pader Schinck tabata scirbi nombrenan straño: Alvarez a bira Albers of Alberts; Ridderstap a bira Relestam, Relestok of Redestad; Guadalupe a bira Walup; Alegre a bira Vrolijk; Guepe a bira Webb.

1790 – Pader Provano (un number straño pa un hende cu a nace na Alemania, esta Kevelaer) a bautisá 61 persona den dos siman y na año 1792, 42 persona den un siman. Den e dos año ey dos hende grandi so a bautisá.

1790 – Oranjestad a originá na año 1790, tempo e famianan blanco a bin establecé na Aruba. Pronto el a desaroyá su mes den un ciudad chikito y den principio nan a yamé “Playa”, un sitio nobo unda a bai biba e Commandeur. Na un bishita di e gobernador na e isla na año 1824, el a papia, durante un comemento, cu Arubianonan prominente cu e capital mester tin su number propio. Entre aplausos el a dicidi na mesa, duna e capital e number di Cas Oranje. Oranjestad a haña asina su origin debí na e bon waf cu Aruba tin. Sinembargo, e poblacion a sigui yama e capital di Aruba Playa.

1792 – Entre 1792 y 1816 Aruba tabata un dependencia di Corsow; e gobierno tabata alternativamente den mannan di un gobierno Hulandes of Ingles.

1793 – Pader Brandts a bautisá 55 mucha. Na año 1796 el a bolbe bin Aruba hunto cu e koster di Santa Anna di Corsow, esta Bartholomeus Senior. Vario bes Bartholomeus a sirbi como padrino di bautismo, mescos cu el a haci na Boneiro den e tempo ey. Aruba tabatin mas or menos 1000 catolico.

1795 – No tabata tin cas na Playa ainda; na 1805 tabata tin 32; na 1832 tabata tin 196.

1796 – A construí Fort Zoutman, cerca di e Bahía de los Caballos; e edificio mas bieuw di Aruba.

1797 – E dos centro commercial mas importante di Aruba tabata Oranjestad y San Nicolas. San Nicolas pegá cu e refinaria di Lago y e otro cu e number nombrá pa Cas Real. Tur dos tabatin un diferente funccion. Esun di Oranjestad tabata cu na año 1797, e autoridadnan a nombré como e capital di Aruba. Nos ta mira cu Oranjestad tempran a haña e toque di Hulanda. “Commandeursbaai” despues a bira Savaneta.

1798 – Fort Zoutman a wordu terminá. Tabata un idea di Gobernador Lauffeur cu e tempo ey a dicidi pa trahé pa duna un bon bista riba lama y tabata bon ekipá cu armanan pa defensa contra e piratanan cu tabata bini pa horta cabaynan y articulo. Gobernador Lauffeur a nombra e forti na honor di e Hulandes Admiral Johan Arnold Zoutman kende a hunga un rol importante den e gueranan Hulanda y Inglatera 18 di September 1941.

1800 – Pastoor van Baars a scirbi un historia di Iglesia Catolica na Aruba pa “Amigo di Curacao”, den cual el a conta con nan tabata tene procesion na Alto Vista rond di año 1800. Sr. Felipi Christiaans, un parokiano cu tabatin 92 año, a conta pastoor esaki. Felipi tabata stima e procesion asina tanto cu ainda na año 1886, e tabata canta na Spañó: “Dios te salve, Virgen oura....Reina del cielo y de la tierra...”. Asina na a sigui cu e procesion te na año 1820 ora cu Pastoor Pirovano a stop cuné. Felipi a nace na año 1797 y su majornan tabata Pierre Nicolas Christiaans y Maria Magdalena. Jozef Valentino Gayde (famia Gayde a bini di Corsow) tabata su padrino di bautismo. Na año 1820 el a casa cu Juana Catharina Wolff, yiu di Juan Gregorio Wolff y Anna Catharina Alvarez. Pastoor Pirovano a casa nan. Nan tabatin 10 yiu.

1800 – Aruba, rond di año 1800, den e historia di Aruba por distinguí tres periodo cu a trece hopi cambio na Aruba. (1) Binimento di Spañónan rond di año 1500, (2) lamtamento di Playa rond di fin di año 1800 y (3) binimento di Compania di petroleo na año 1925. E economia di Aruba e tempo ey tabata: cunuco, comercio y navegacion. Den e tempo tabatin 1000 habitante. Na año 1820 tabatin 159 hende blanco; 1510 gecouleurden (indiannan); 208 color scur. Total 1877 habitante.

1800 – Rond di Paardenbaai a bin biba mas y mas hende cu a bin for di Corsow y Venezuela promé y despues di año 1800. E habitantenan nobo di Aruba a mescla cu e pueblo original di Aruba principalmente na e lugarnan rond di Tanki Leendert, Tanki Flip, y Paradera.

1800 - E año cu e habitantenan indian di Alto Vista a bandona e lugar. Pa motibo di un epidemia di bruela a core cu nan. Nan a wordu contagiá cu bruela pa medio di un barco contaminá cu a yega e isla.

1800 – Cu Playa a bira mas grandi cu Noord entre 1800 y 1830 ta gracias pa un gran parti di e refugiadonan di Venezuela cu a bin busca asilo na Aruba. Nan a hui for di Venezuela pa motibo di situacion politica, lucha pa independencia di America del Sur, cu kier a bira los for di Spaña. Mision catolico di Corsow a probecha di esey, como cu varios sacerdote Spañó, cu mester a hui for di Venezuela, a bin haci un trabao excelente na Corsow y Aruba.

1800 – Pabao di West Punt, pegá cu saliña, ainda tin un lugar caminda nan a dera varios hende. Nan grafnan ainda ta marcá cu algun piedra. Esey tabata tempo di Alto Vista cu hopi hende tabata biba noord di West Punt riba e ceronan. Marca di nan casnan tey ainda.

1803 – Con y unda Papiamento a nace? Tin texto cu ta duna indicacion cu Papiamento tabata existí caba for di cuminsamento di siglo XVIII na Corsow y for di final di siglo ey na Aruba. E textonanmas bieuw cu nos tin na Papiamento ta un carta di año 1775 di un hudio na Corsow y un texto official di año 1803 na Aruba. Un grupo di autor ta defendé e teoria di Papiamento cu un solo proto-crioyo Afro-Portugues cu tabata existi na costa west di Africa (e teoria monogenetico). Un otro grupo ta sostené e teoria poligenetico y e grupo ta bisa cu el a nace for di e necesidad di comunicacion entre e Spañonan y e indiannan, despues cu e Spañonan a colonisá e islanan ABC rond di año 1500. Spaño sigur a hunga un papel importane den evolucion di Papiamento pero si nos analisa su structura toch nos ta ripara cu tin elemento claramente Africano den Papiamento.

1804 – Aruba tabata conta cu 1150 habitante y un parti chikito tabata protestant.

1805 – Entre 1805 y 1816 e Inglesnan a ocupá Aruba, tabatin mas libertad pa bay bin denter di e tres isla hermana. Loke nan tabata busca na Aruba tabata principalmente comercio den e sentido di e economia actual di Playa, pero un poco mas senciyu. Poblacion a crece; na año 1804 tabatin 1155 habitante y na 1816 tabatin 1732. Tabatin mas hopi trafico entre en islanan y varios hende a mira awor un chens pa cambia isla, asina Aruba y Boneiro a haña hopi hende di Corsow y tambe di costa firme.

1806 – Aruba tabatin 1546 esclavo mientras Boneiro tabatin 945; na año 1816 Aruba 1732; Boneiro 1135; na año 1862 Aruba 3258 y Boneiro 3103.

1806 – Antoin Henriquez, e promé maestro catolico aki na Aruba, a nace na Corsow na año 1806. Durante e tempo Ingles el a bin Aruba hunto cu su mayornan Mordechay y Maria van Horcum (Gorcum?) y su rumannan. E tata tabata un comerciante. E tabata tin un barco cu e nomber “Two Brother” y Dirk Wever tabata su schipper. Na año 1840 Antoin tabata un Lieutenant van de Boschwachters. Na 1886 e tabata miembro ainda di Sociedad di Spirito Santo. Na 1857 el a bolbe haña su nombramento como maestro di school cu un salario di Fls.200.00 pa año. Na 1888 el a muri na Noord.

1813 – Door cu hopi hende di Corsow a bin Aruba y bay Boneiro rond di año 1800 padilanti, mayoria a bay biba rond di Playa. Pesey Playa di Aruba y Playa di Boneiro, Kralendijk, a cuminsa lamta hunto. Playa tabatin mester di un misa y nan a traha misa di San Francisco, pero no den Playa pero panort di Playa den un cunucu yamá “Shipau”. pazuid di Tanki Leendert. Parokia di Playa a cuminsa e año aki y a bira e di dos parokia. Ainda por mira na unda e misa cu su santana tabata, esta zuid di e tereno di R.C.A. Tin algun graf ainda eynan.

E tabata trahá di bara di klei cu dak di palo di maishi. E misa a sirbi te na año 1825. Un awacero grandi a basha e misa abao. Na 1828 Playa a haña su misa nobo.

1813 – *Ora cu Playa a bira mas grandi, importancia di panort di Aruba a bira menos. Noord no tabatin pastoor propio for di 1813 – 1878.*

1816 – *Promé cu año 1816 Aruba no tabatin un school.*

1816 – *Entre 1816 y 1951 Aruba tabata depende di e colonia di Corsow; e gobierno tabata den man di un teniente gobernador, subalterno di e gobernador di Corsow.*

1816 – *Despues di 1816 e oficinanan di gobierno a wordu moví den Fort Zoutman y nan a keda eynan te na 1911.*

1816 – *E Hulandesnan a regresá y a keda permanente.*

1816 – *Pa motibo di deterioracion y door cu mayoria di epoblacion a bay biba den direccion di Noord caminda e promé misa a wordu construí, a cera e kapel bieuw di Alto Vista, pero hopi hende a keda adorá e lugar aki. Asina Aruba a cuminsa cu su mesun debocion pa “ E Birgen di Alto Vista”.*

1816 – *Aruba tabatin dos misa pero sin un pastoor fiho. Na 1816 y 1817 Pader Pirovano a bolbe pasa Aruba pa algun dia. Na 1816 el a yuda protestantnan cu no tabatin ministro. El a bautisá 6 mucha pa nan. Na 1819 el a bautisá 264 den dos luna. Na 1820, tempo di Inglesnan protestant a bira mas hopi y e año ey el a bautisá 53 y 24 tabata protestant.*

1818 – *Un lista di belasting “Lijst van Hoofdgel’s Belasting op Tuinslaven, Huisbedienden en Sjouwerslaven van 1818”. E lista ta conta 37 doño di bestia, cu tur tabatin mas cu dies catibu cu nan tabata yama “catibo di cunucu, sirbiente di cas y catibu peon. Tabata tin 246 catibu di cunucu, 7 sirbiente di cas y 5 catibo peon. Ora nan bautisá un yui di catibo, e doño y su señora, of conocirnan ta padrino y madrina. Un otro lista ta conta nos cu den año 1818 tabata tin 136 baca, 1887 cabrito y 1304 carné na Aruba. Pero ningun hende no tabata tin mas cu dies baca, ni mas cu 180 carné of 70 cabrito. Tabatin 8 barco cu tabata golet of landje of bark. E listanan aki ta duna nos un idea con e economia di Aruba di alrededor di 1900 tabata: cunucu, comercio, y navegacion.*

1819 – *Ora Pastoor Pirovano a bin keda vast na Aruba, el a bin cu algun reglamento. E tabata biba na Playa y tabata sa cu ningun hende tabata biba mas na Alto Vista. E tabata haña cu e lugar di Alto Vista ta keda mucho leuw pa tene solemnidad religioso. Pesey el a prohibi pa tene procesion dia di fiesta di La Birgen y tampoco a sigui cu e esun tradicional di Noord. E tempo ey tabatin un cuestion entre Pastoor Pirovano y Andres Tromp. Parce cu mama di Andres, “Mamanchi” a laga traha un calis di oro pa usé den misa di Noord, pero pastoor Pirovano kier a hibé na Misa San Francisco na Schipau.*

1820 – *Tabatin registrá como habitante: 159 hende blanco; 1510 color bruin (Indian); y 208 color scur.*

1820 – *Hendenan di Aruba tabata bay cumpra of horta muchanan di Costa Firme di Colombia, principalmente na Guaira. Donati tabata e famia bieuw di Metsla na Aruba, na principio e unico Metsla di Aruba. E tata grandi di e famia aki tabata Simon Donati (Papa Monchi) kende a bin entre 1820 y 1830. Bartolomeo Boekhout, cu tabata e Captán di barco a trece Simon Donati. Bart a crié y siñé e trabao di Metsla. Simon na año 1853 a casa cu Sedrafina Martha Oberg. Nan tabatin un yiu homber, Alexander Nicasio Donati (Jan Do) cu tambe a bira Metsla mescos cu su tata Papa Monchi. Nan tabata biba na Seroe Blanco, panort di Oranjestad. Alexander a casa cu Rosamundo Quarts. Nan yiunan, Luis (Lucien), Thomas, Stefan (Eusebio), Simon (Delfin), y Hose, tur a bira Metsla. Asina nan a bira e metslanan mas conocí na Aruba. Luis Donati tabata cabes di metsla, ora nan a traha misa di San Francisco na*

Playa na 1817. Construccioonnan di hopi misa y schoolnan tabata trabounan di famia Donati. E unico cas bieuw cu tin e adorno di “cortina” ta e cas di famia Kuiperi den Wilhelminastraat, trabou di famia Donati.

1820 – *Tata di e mucha di 12 aña cu a descubrí oro, Willem Rasmeyn (e tempo ey asina nan tabata scirbié), esta Jacobo Rasmeyn tabata wordu jamá Erasmus, segun buki di bautismo.*

1821 - *Dia 5 di Februari 1821 Pastoor Pirovano a muri. Pastoor a pidi e hendenan pa laga su morto keda tres dia riba tera ora e muri. Esey e hendenan a haci y despues nan a deré den Misa di Noord, manera su boluntad. Poco dia despues e ultimo fiscal, Andres Tromp tambe a muri.*

1822 – *Gobierno a cuminsa un school publico na Playa bao direccion di Klaas van Eekhout, un siñador di religion protestant. Su sucesornan tabata na 1824 J. C. Rozenveldt; 1843 Abraham van Dragt; 1848 J. C. van der Ree. Un sacerdote Spaño, pader Serafin de Sevilla, pastoor di Playa a cuminsa e promé enseñansa catolico na Aruba. E tabata biba den un cas na cunucu di Shon Henriqui Ruiz. Aya e tabata tin un school chikito pa duna les na muchanan Spaño.*

1823 – *Entre aña 1823 y 1825, un pastoor interino, di Venezuela, tabata Pastoor Manuel Fernandez, kende tabata pastoor di parokia di “Nuestra Señora de la Concepcion Immaculada del Pueblo Nuevo en la Peninsula di Paraguana”. E mester a hui for di Venezuela bin busca asilo aki pa motibo di e situacion politico. Masha hopi refugiado di Venezuela a bin biba na Aruba. Mayoria di nan a bin for di provincial di Coro.*

1824 – *Na Maart 1824 oro a wordu descubrí na Lagabaai cerca di Rooi Fluit pa e hoben di 12 aña, Willem Rasmijn, yiu di Jaco Rasmijn. El a mira algo cu ta briya , na un sitio labá pa awacero. El a muestra su tata y e tata cu no tabata sabi kiko e tabata, a muestra un comerciante na Playa. E si a mira kiko e tabata y ofrecé Jaco \$17.00. Jaco a laga e pipita di oro pa e prijs ey y e negociante a bendé pa \$70.00. Claro cu e rumor a core rapidamente y tur e muchanan cu tabata cuida bei y cabrito a cuminsa explorá e rooinan. No a tarda mucho cu un mucha muher Indian a haña un pipita di oro na Rooi Daimari. Despues di cinco luna ya nan a logra haña 23 liber di oro. Jaco mes a bisa Willem pa no bisa ningun hende y asina nan dos a cambia historia di Aruba. E tata mes a haña masha hopi oro cu el a bende cu comerciantenan. Te un dia na un fiesta cu Willem cu poco rom den curpa su lenga a slip y te hasta matrosnan cu ta bin cu barco y hendenan di Corsow a haci cu e buscamento di oro a bira un wild west. E oro ilegal a bai pa St. Thomas (1859) y esun legal a bai Hulanda. Un total di 3 miyon liber a wordu mandá pa exterior te na aña 1913. Na aña 1916 Fabrica di oro a cera. E companianan cu a busca oro na Aruba tabata: (1824-1829) - Gobierno, Compania di Rey (1824-1829); (1829-1854) – Tabata liber, tur hende por a haña un permit; (1854-1866) – Concessie de Jongh, Dan Haag; (1867-1872) Isola, Ricket & Co., New York; (1872-1881) – Aruba Island Goldmining Company, (compania Ingles); (1881-1909) – Aruba Agency Company (compania Ingles); (1909-1916) Aruba Goudmaatschappij (compania Hulandes). Solamente e ultimo compania aki por bisa a haci un poco ganashi pasobra nan a cumpra e fabrica di Balashi pa poco placa y pasobra nan a paga nan minero no pa dia, pero segun e peso di oro cu nan a entregá na Balashi. Esey nan tabata yama “trabao halsá”.*

1824 – *Situacion huridico di e indiannan di Guajira na Aruba no ta mucho cla. Nan tabata horta of cumpra e muchanan di Guajira trece nan Aruba. Un pastoor a scirbi den buki di bautismo: “Jacobus, mas o menos 5 aña, Indian di costa firme, mayornan desconocí, como cu e mucha tabata haña aya”. Muchanan di Guajira ta wordu mencioná den e buki for di 1824 – 1830. Nan tabata horta of bende muchanan entre 2 pa 20 aña, homber of muher, nan tabata coi*

loke nan tabata por. E buki ta mencioná 32 number di mucha di Guajira. Commandeur tabata contra e contrabanda; el a taha pa haci nan catibo pasobra mester duna nan un educacion cristian. Pesey e muchanan a pasa pa sirbiente di cas of yiu di criansa. Ley di gobierno no tabata permiti casamento di catibonan, nan no tabata tin derecho civil. Na Aruba pastooran simper a casa catibonan “clandestine” (scondí).

1824 - *Ora cu Pastoor Niewindt a bishitá Aruba na 1824, el a haña dos misa, “dos choza miserable”, Misa di Santa Anna na Noord y Misa di San Francisco na Schipau. Tur dos tabata trahá di bara di klei y cu dak di palo di maishi.*

1825 – *Misa di Schipau a basha abao y Playa a haña su misa nobo na 1828.*

1825 – *Santa Cruz a cuminsa lamta poco poco, tempo di oro.*

1825 – *E mapa di Aruba mas antiguo conocí.*

1825 – *Entre e añanan 1825 y 1830 tabatin un pastoor interino di Venezuela: Pader Serafin de Sevilla, cu a hui for di Venezuela pa motibo di situacion politico. Na 1825 el a cuminsa un school chikito na Playa pa duna muchanan les den Spañó.*

1826 – *Di 1826 – 1830 e pader Spañó Serafin di Sevilla a traha na Aruba, el a cuminsa e promé school.*

1827 – *Na 1827, tempo no tabatin pastoor na misa di Noord, tabatin tres homber cu tabata responsabel pa e misa: Jan Hendrik Semeleer, Manuel Wolff, y Nicolas Tromp. Gobierno tabata cualificá nan como “Opzichter” di misa. E tres hombernan aki a percura tambe cu Noord a haña un santana nobo, esun actual. Jan Hendrik Semeleer, cu ta e antepasado grandi di tur e Semeleernan na Noord, a nace na Aruba na año 1788. Su mama tabata Maria Eleonora Semeleer, tata desconocí. Jan Hendrik a casa dos bes: promé cu Petronilia van de Berg. Nan tabatin un yiu, Jan Martis (of Jan Hendrik). Despues di morto di Petronilia el a bolbe casa cu Ana Martha Silvester y nan tabatin un yiu, Anna Deonisia Semeleer, kende tambe a casa dos biaha. Jan Hendrik a muri un morto repente na año 1849. Manuel Wolff tabata yiu di Jurrian Wolff y Johanna Catharina Silvester, nieto di Antonio Silvester. Nan tabatin 11 yiu cu a nace entre 1813 y 1829.*

1829 – *Misa San Francisco a bini Playa, na e lugar unda e ta actualmente.*

1829 – *Un sitio na costa norte tabatin un number curioso di Vader Piet. Na 1829 tabata biba den e vecindario aki un Sr. Pieter Lampe, afortunado, cu tambe tabata encargá cu gobernacion den e distrito aki. Pieter Lampe a muri tragicamente, el a ser asesiné. Pa su character benigno y e trata humano di su personal nan a yama e distrito aki Vader Piet. Na Hulandes pasobra tal ves e famia tabata papia Hulandes den cas.*

1830 – *Aloe Vera no ta un mata indigeno di Aruba, pero a wordu introducí den careda di año 1830 for di Barbados y e islanan becindario. Nos conoce varios mata di aloe cu a wordu cultivá na Aruba, pero Aloe Vera ta keda nos specialidad. Mas o menos 1837 e promé hardin cu aloe vera a aparece den cunucu na Socotoro y esaki a expande su mes riba henter e isla. E mihor plantacion ta riba suela di calichi.*

1830 – *E promé oficina y cas trahá pa gezaghebber y a kibré na 1949. Di 1929 te cu 1949 el a wordu usá como un cuartel pa soldátnan.*

1830 – *Louis Bazin, cu a nace na año 1793 na Landenau, Bretagne, Francia tabata na Aruba. Louis tabata doño di cunucu Mon Plaisir. Tambe e tabata doño di un catibo. El a casa cu Regina Jacomina Croes. Mas despues e ta bira doño di cuarenta catibo. Regina tabata yiu di Lourens Croes, e onder directeur di minanan di oro. Na año 1853 Louis a fayecé y Regina ta bolbe casa cu e Itiliano Pedro Joseph Frigerio. Pedro a tuma over e catibonan pero e tampoco no a biba largo ya cu na año 1862 el a muri repentidamente durante un biahe pa Milan, Italia,*

acompañá pa Regina y su tres yiunan. Pedro a wordu derá na Italia y Regina ta regresá Aruba cu su tres yiunan. E nomber a keda Nina di Bazin cu a keda manehá e asunto di oro. Mon Plaisir a bira e promé cas cu bentana di glas y Frigerio tabata e promé persona cu a bin cu un piano. Cu tempo Mon Plaisir a bira propiedad di Alfredo Jesurun y Evertz. Despues ta pasa pa Adrian Lacle. Bazin a keda un nomber di un cunucu cerca di Cero Cristal. Cerca di e cunucu aki ta keda Babijn, cual nomber ta bin di e Frances René Babin cu tabata biba na Aruba den año 1770. René a casa cu Ana Henriette Swijnsberg. Un otro Frances, Benoit Solagnier cu a nace na Clermont, Francia ta casa cu Regina Jacomina Croes, ex-casá di Louis Bazin. Benoit a muri na Aruba na 1830.

1830 – *Domi Bosch ta scirbi cu e indiannan ta biba separá parti noord di nos isla.*

1831 – *Pastoor L. H. Lommel cu tabata na Aruba entre 1831 y 1833 a traha un misa nobo di piedra na Noord. E misa nobo aki a wanta te na 1886. E año ey Pastoor van Baars a traha un misa nobo atrobe cu a wanta te na 1916.*

1832 – *Gobierno a saca un lista di tur cas na Playa cu nomber di e doñonan. Di e 196 casnan, 90 tabata trahá di piedra y tur otronan di bara di klei.*

1834 – *Entre 1834 y 1836, pader Jose Rafael Sanchez, un pastoor di Venezuela cu a hui bin busca asilo pa motibo di situacion politico, tabata uno interino.*

1836 – *Entre 1836 – 1849, tempo di Pastoor Manuel Romero, e relacion denter di pastoor y maestro di school di gobierno no tabata mucho amical. Na 1853 no tabatin keho. Tur cos tabata wordu duná na Spañó y hendenan tabata resa na Spañó. E tabata un pastoor interino cu a hui for di Venezuela pa motibo di situacion politico. E tabata yuda hendenan aki tambe como dokter y como tal el a gana hopi simpatia di Arubianonan, pero pa motibo cu e tabata mishi cu politica di Venezuela masha hopi, esey a duné masha problema cu nos Gobierno tambe. Durante e añanan 1836, Pastoor Romero a dera 341 morto, di nan 17 tabata catibu, fuera algun cu e no tabata sa nan nomber. E tabata un poco streng, di e 341 aki el a nenga santana na 73 di nan. Mayoria a wordu derá den santana di San Francisco na Playa. Otronan den Santana di Santa Anna na Noord.*

1837 – *E cuminsamento di varios cultura na Aruba.*

1840 – *Den añanan aki oro a trece pobresa pa trahadornan pasobra pa motibo di oro nan a lubida nan trabao den cunucu y a descustumbrá den plantamento.*

1840 – *A descubrí y importá e mata di aloe Vera y a cuminsa cu cultivo di aloe; tabata tin un demanda grandi mundialmente y nan a cuminsa planta e mata pasobra su tera y clima seco tabata ideal.*

1840 – *Tabatin 497 catibo; 269 di nan tabata hende di color (Indian) y 228 hende preto. Den e mesun año a nace 77 hende preto y 225 hende preto di pafó. Mitar di e catibonan na Aruba tabata indian y e otro mitar tabata Africano. E tempo ey ley di gobierno Hulandes no tabata permití pa haci indiannan catibo, pero e practico tabata otro.*

1840 – *Savaneta ta e colonia mas antiguá na Aruba, pero e nomber a originá desde 1840. Probablemente e lugar chikito aki tabata dominá simplemente “e waf” den e epoca di Spañó. Como cu ya tabatin e nomber Sabana Grandi den otro distrito, nan a yamé Savaneta (e Sabana Chikito). Antes nan tabata scirbi Sabaneta.*

1840 – *Antoin Henriquez tabata Lieutenant van de Boswachter. Na 1886 e tabata miembro ainda di Sociedad di Spirito Santo. Na 1857 el a bolbe haña su nombramento como maestro di school cu un salario di Fls.200.00 pa año. Na 1888 Antoin a muri na Noord y gobierno a pone tras di su nomber cu e tabata un cunukero.*

1844 – Piet Croes, un hende di Santa Cruz, a nace. Su number di bautismo tabata Petrus Joseph Ursula, yiu di Jacobo Croes y Anna Catharina Kock. E tabata un maestro di school na Noord rond di 1870. Su mama no tabata catolico y Piet tabatin cinco ruman. Piet tabata casá cu Maria Mathilde Voort, rond di aña 1864.

1846 – E misa Protestant na Playa ta e edificio mas bieuw di Aruba.

1849 – Entre 1849 y 1860, Pastoor Paulus a dera 347 hende, entre nan tabatin 140 menos di 14 aña di edad. Pesey nos ta pensa cu durante 1836 y 1860 e hendenan no tabata biba largo manera awendia. Na aña 1850 el a haña necesario pa cuminsa un school na Noord y el a traha uno. No tabatin maestro Hulandes, pesey el a pidi un colectant pa siña e muchanan Spañó. E maestro tabata Antoin Henriquez cu tabata biba na Tanki Flip. E school aki a existi pa cuatro aña. Nan a ceré y hiba e bankinan Playa, caminda Pastoor de Vries a lamta un school nobo na 1853. Un ruman homber cu Pasoor de Vries a pidi bin Aruba a bira e maestro di school na 1855. Tur cos a bay bon, pero dos aña despues, na 1857, Anton de Vries a muri di keintura preto.

1850 – E artista Hulandes Van Geld a traha e altar di misa Santa Anna na Noord, di palo di eik (oak).

1850 – Pastoor Schermer di Playa tabatin idea caba pa lamta un misa y school na Sta. Cruz. El a haña un pida tereno di dos bender y mei pa un misa, santana y school. E tempo ey mes Obispo Niewindt a bin confirmá hende den cualkier cas na Sta. Cruz.

1850 – Sividivi tabata un cunucu cu viuda di Lodewijk Scholten a cumpra e aña ey y a duné e number “Werke en Rust”. Na 1870 Jose Ramon Recui a cumpré y na 1873 Don Filipi Barenjo a bira su doño y a yamé “Sividivi”. Na 1901 un compania Ingles a cumpré y a biba eynan te 1908.

1850 – Hendenan di Noord a yuda diferente districto pa traha misa y santana. Nan a carga masha hopi piedra for di lugarnan manera Palm Beach te na Playa. Dia Savaneta a haña su misa, ta e hendenan di Noord a bay traha como Metslá. Ta straño si cu na aña 1881 ora Pastoor Bongers a mustra su Obispo, Mgr. van Ewijk cu Noord tabatin mester di un misa nobo, Mgr. a bisé bay pidi parokianonan pa nan yuda. Pero nan no tabatin mucho gana pa traha un misa nobo. Anto Mgr. a scirbi nan un carta formal, cu el lo kita nan pastoor si nan no kier yudele traha e misa. Nan tabatin dos luna pa tuma un decision. Pronto un forno di kalki tabata cla pa cuminsa e trabao.

1851 – Ora cu pader Paulus (Willems), un pader capuchino, a bira pastoor di Aruba na 1851 el a cuminsa unbes un school na Noord. Como cu e no tabata tin maestro di school cu tabata sa Hulandes, el a pone pa tantem un di su colectantenan pa maestro y esaki a duna e lesnan na Spañó.

1852 – Dia 19 di Juli 1852, Pastoor Paulus a bendicioná e misa na Sta. Cruz y a yamé Misa di Santa Maria. Gezaghebber di Aruba, Jacobus Jarman a asistí e solemnidad aki. Den e mesun aña Pastoor Paulus a lamta un fondo pa mantené e misa bou di e number “Cofradia di Spirito Santo”, cu a cuminsa na luna di November 1852. Miembronan di e Cofradia na Santa Cruz tabata paga contribucion anual pa yuda e misa. Den e promé añanan e yudansa di fielnan di Sta. Cruz tabata mas o menos 50 florin pa aña. Den e mesun aña Mgr. Kistemakers a pidi gobierno permit pa lamta un school na Sta. Cruz. Tabatin 224 mucha di 7 te 14 aña di Sta. Cruz, Paradera y Savaneta. Esey tabata parokia di Sta. Cruz e tempo ey. Pastoor Paulus a haña tal yudansa di hendenan di Santa Cruz cu e por a verf e misa di nobo na 1852 y na 1858 e por a lamta e muraya di misa dos pia mas halto y pone un dak nobo di panchi. El a cumpra 4000 panchi pa 200 florin. El a paga 37.50 florin pa 150 schepel kalki. Awor Pastoor Paulus a

bin haci misa na Sta. Cruz tur Diadomingo y dos dia den siman y na 1856 el a cumpra un bela di Pasco pa celebrá e ceremonianan di Semana Santo. Den siman e tabata duna catesashi dos bes den misa Santa Maria, cual tambe a haña su promé santana, cementerio di Santa Maria.

1853 – *Rev. Señor J. H. de Vries a bini Aruba como kapelaan di Playa y hunto cu su pastoor Pader Paulus, el a cuminsa pensa y papia riba un school na Playa. Despues a bini e ruman homber di de Vries, Antonius de Vries (Anton) cu a bay duna les na Corsow.*

1853 – *Pastoor H. J. De Vries a informa den su documento encuanto un cas di piedra na Commandeursbaai na Savaneta. E ta relata encuanto “gemetselde graven in de wildernis” (grafnan gepleister situá den mondi di cual esnan den mal estado lo ta pertenecé na dje y su famia. Drs. G. B. Bosch (1825) ta papia tocante algun graf cu ta banda di otro y trahá rondo, cu borchinan cu nan number y ta data di un siglo bieuw. Banda di Wit Gele Kruis na Savaneta tin dos di e grafnan aki. Asina tambe tin varios di e grafnan colonial aki rond di Aruba.*

1855 – *Na Juli 1855 Anton de Vries a bin traha pa cinco aña na Aruba pa un salario di Fls.100.00 pa aña pasobra Mgr. Niewindt no por a duné mas. Dia 15 di Mei 1857 el a muri di e keintura preto, na edad di 27 aña y 10 luna. El a nace dia 15 di Juli 1829 na Rhenoy di Gelderland.*

1855 – *School nobo a habri na Playa door di Anton de Vries.*

1855 – *E portret di mas bieuw di Aruba a wordu tumá pa K. Martin.*

1857 – *Soernan di Roosendaal a tuma school di Playa over; Santa Cruz 1863; Noord 1893 y Savaneta 1909, esta den e cuatro parokianan bieuw. E maestronan tabata: Antoin Henriquez, Anton de Vries, Piet Croes, Herry Croes, Bernardo Maduro y Gilli Maduro. .*

1857 – *Pastoor de Vries a dera un hende na e cemeterio di Commandeursbaai.*

1858 – *Hendrik de Vries mester a bay Corsow pa re-emplasá pastoor di Barber te na aña 1860.*

1858 – *Domi Nicolaas Kuiperi tabata na Aruba for di 1858 – 1871; el a cuminsa un misa na Canashito na 1860 y na 1879 nan a kima e kerki. Na aña 1899 Domi a traha un kerki na Piedra Plat caminda el a lamta un school cu tabata bao di direccion di Willem Croes. Domi y Pastoor de Vries tabata bon amigo y el a duna Domi un pida tereno erfpacht pa traha un cas pabao di misa di Sta. Cruz.*

1859 – *A descubrí na guano y fosfato di calico na Aruba, pero ta na 1879 cu e Compania di Fosfato di Aruba a cuminsa cu e explotación. For di aña 1879 te 1914 a exportá na un balor di nueve mion Florin.*

1861 – *Hendrik de Vries a bolbe Aruba cerca Pastoor Paulus y na Maart 1862 Obispo a nombra de Vries como pastoor di Santa Cruz.*

1862 – *Pastoor de Vries a traha un school nobo na Sta. Cruz y e siguiente aña e school a habri bou direccion di Soernan di Roosendaal.*

1862 – *Mal hende a pega e promé school di Playa na candela y un aña despues Playa tabatin su school nobo atrobe, mas grandi y cu dak di panchi. E bieuw tabatin un dak di palo di maishi.*

1862 – *E ultimo aña di catibo – 15% di poblacion di Aruba, na Boneiro 27 %.*

1862 – *Algo mas di cien aña despues, a muri e ultimo indian na Aruba.*

1863 – *Promé cu e Ley di Emancipacion di 1 di Juli 1863, catibonan por a haña nan libertad door di paga Fls.400.00 y aki ta unda famianan cu antes tabata catibo y hende liber of doñonan di catibo a mexcla den otro pa medio di casamento.*

1863 – E promé padrino y madrina di bautismo na Sta. Cruz tabata Joannes Schwengle Dorothea Schwengle, yiunan di Jozef Schwengle. Na año 1863 a bautisa na Sta. Cruz 41 mucha, na 1864 43 y na 1854 72 mucha. Otro famia cu a bautisá un yiu na 1863 tabata: Simon Kok y Anna Bislik. Sabaya Kok tambe a bin bautisa su yiu. Dorothea Claudina (Doorchi) Schwengle no tabata casá tempo e tabata yuda Pastoor de Vries, e tempo tabata biba mas o menos 300 hende na Savaneta. E tabata yuda pastoor den misa San Hose. Betsie de Kort, su ruman tambe tabata yuda pastoor de Vries. Doorchie tabata yiu di Joseph Schwengle y Helena Kretser, nací na Corsow na 1834. Joseph mes tabata un Aleman, nací na Baden-Baden, Alemania, na 1793.

1863 – School nobo na Sta. Cruz door di Soernan Roosendaal.

1863 – Un pastoor nobo, J. A. te Riele a bini y a keda te año 1879, e tabata compañero di pastoor de Vries. E mesun año el a traha un school nobo, mas grandi y cu dak di panchi y na 1864 el a traha un misa nobo di Playa. Gezaghebber van de Bosch a haña ta bon pa usa piedranan di transhi di un hoffi di gobierno pa traha e misa nobo. Dia 3 di October e misa nobo a haña su bendicion solemn. Anochi pastoornan tabata sintá na plenchi ta papia y bebe un cerbes. Pastoor de Vries y Bongers tabata preocupá pasobra e muraya tabata skeur. Mientras Pastoor de Vries tabata prepará pa bay haci misa, Pastoor Bongers cu a mira kalki ta cai den e misa nobo, a saca tur hende for di den misa y manda nan den cas di pastoor pa motibo cu awacero tabata cay basta duro. Danki Dios cu Pastoor de Vries a tarda, aunque e hendenan tabata puré, pasobra henter e muraya zuid a basha abou, dak di panchi, y tur banki y stoel a kibra. Asina e fiesta di San Francisco na año 1864 a terminá, pero sin resultado fatal.

1863 – Pastoor J. H. te Riele cu tabata pastoor di Misa San Francisco a saca e restonan di Pastoor Pirovano cu tabata derá den e misa bieuw. Ora cu trabao di kita misa tabata mitá cla, Francisco (Pancho) Ruiz, kende tabata cabes di e trabao, a muestra pastoor van de Pavert unda e graf tabata, esta mei mei di misa poco distancia di e mesa di Santa Comunion. Di mucha e tabata mira e graf. Ora nan a traha e misa anterior nan no a mishi cu e graf, pero awor si Francisco a haña e fundeshi bieuw, e vloer un tiki mas halto y di un otro color. Riba e indicacionnan ey Pastoor van de Paverty a manda saca e restonan.

1863 – Parokia di Sta. Cruz, di tres parokia, a wordu fundá dia 1 di Mei 1863 door di su promé pastoor, Pastoor de Vries, cu a yega Aruba dia 7 di Juni 1853, esey ta mei año despues cu el a consagrá sacerdote na Corsow. Na fin di Mei el a bin biba na Sta. Cruz. El a traha un school nobo na Santa Cruz. Dia 4 di Mei el a bautisá e promé yiu, Juliano, yiu di Elias Angela y Maria Petronilla y tambe Maria, yiu di Joseph Lampe y Elizabeth Vrolijk. Dia Pastoor de Vries a yega Sta. Cruz, el a cambia e nomber Misa di Santa Maria, pa Misa Maria Immaculada Concepcion. Pastoor de Vries ta derá den un kelder na Sta. Cruz. Pastoor de Vries a nace Rhenoy (Geldria na Hulanda) dia 3 di Februari 1818. Su tata tabata protestant y mama tabata catolico. Hunto cu su rumannan nan a lamta protestant. Na edad di 20 año, hunto cu su rumannan el a bira catolico.

1863 – E cas di mas bieuw construí pafor di ciudad, na Santa Cruz y desde 1965 ta sucursal di Biblioteca Publico di Aruba na Santa Cruz.

1864 – Psstoor de Vries no a bringa protestantnan, el haci hopi pa catolico y protestantnan cu hopi di nan a bira catolico y durante 1864 – 1881 el a bautisá masha hopi hende.

1865 – Un persona masha popular di Noord tabata Francisco (Pancho Ruiz) kende a nace dia 2 di April 1865, yiu di Guillermo Pieter Ruiz y Maria Saturnina Ruiz. El a casa na Santa Cruz, cu Ludovica Curiel, nací dia 25 di Augustus 1871. Nan tabatin diesdos yiu y esun mas chikito, Carmen Rotinda (1-3-35) a bira soeur di Congregashi di Asten y yamá Zuster

Leonie y cabes di Maris Stella na Savaneta. Sr. Frans Figaroa, un politico bon conocí na Aruba y Noord tabata nieto di Pancho Ruiz. Otro persona bon conocí na Noord, pa hener Aruba, tabata Ma Mona cu tabata un partera y curiosa pa tur enfermedad y tabata usa e oracion cu su wela Faustina a siñé. Un dia cu el a bira malo, a bay hospital y a muri dia 2 di September 1974. Otro curioso cu tabata yudando hende cu halamento y oracion na Noord tabata Eusebio Pedro Farro (Buchi Pedro).

1866 – *E mihor amigo di Pastoor de Vries, Gezaghebber Ferguson cu a nace 1866 y a muri 1871, nan dos hunto tabata busca yuda e pobresa di año 1869.*

1867 – *Pastoor de Vries tabata conocí pa pastoor of tata di pobernan. E entrada di mina di oro di e compania di oro di e Inglesnan na Busiribana no por a kita e probresa na Aruba. Pa e motibo aki e tabata animá homber y muher pa traha cabuya y sombré cu e mes tabata cumpra di nan pa duna nan un cen pa cumpra cuminda. Pa un sombré e tabata paga 6 placa. E hendenan tabata traha tur esakinan bou di un palo grandi di tamarijn y warda riba un limosna di pastoor. Tur ora e tabata pidi su famia na Hulanda pa mandé paña y sea e hendenan ta bin busca, aunque esaki tin bes a resultá den pelea, of e ta hiba nan riba su cabay pa esnan cu tabata biba leuw. Un dia el a bay cerca Bito Geerman cu a haña un bunita pida oro, keriendo cu Bito por duné algun placa pa pobernan. Bito a cumpra cunucu di Andicuri cuné. Año 1867 y 1876, dos año di probresa na Aruba, Pastoor de Vries a scirbi hopi carta na gobierno di Corsow y Hulanda pa pidi yudansa. E tabata keha cu Corsow tabata lubida Aruba mucho y vooral ora Corsow a haña yudansa di Guzman Blanco, President di Venezuela. E tabata yuda hendenan pover haña tereno y cada bes e mester papia cu gobierno y gobierno a hañé poco fastioso, pero esaki tabata pa yuda pobernan.*

1867 – *Entre 1867 y 1868, ora cu Pastoor de Riele a bay cu verlof y a purba di bay traha pa e indiannan di Guajira, de Vries mester a sirbi parokia di Playa tambe. Mescos el a haci na 1879-1880. For di 1880 te cu 1886 A. J. Van Koolwijk tabata pastoor di Playa. E tabata e promé persona cu a investigá e lugarnan archeologico di indiannan na Santa Cruz, Savaneta y Tanki Flip. El a coba hopi, manda loke el a haña pa Museo di Leiden Caminda su coleccion a keda un obheto di studio pa e profesornan di indianologia. Pastoor de Vries a compañá van Koolwijk hopi den su trabao di archeologico.*

1868 – *Un toren a wordu poní riba Fort Zoutman pa satisfacé e necesidad pa un holoshi publico den centro di Playa y tabata sirbi tambe como un faro. Unabes cu construccion di e toren a terminá toch no a pone e holoshi. Ta te na 1929 a pone e holoshi. Den e lus di e faro tabata cende un lampi di petroleo y a wordu cendí pa promé biaha riba fecha di cumpli años di Rey Willem III na año 1869 y asina e toren ta representá su nomber. Despues a lo largo el a bira un museum cu material cultural y archeologico.*

1870 – *For di año 1870 te cu 1913 dies hende a muri den e minanan di oro.*

1870 – *Piet Croes a bira maestro di school na Noord. E tabatin su cas pariba di santana hudui na Playa. Tambe e tabatin un cas den su cunucu na “Balencia”, na Alto Vista.*

1870 – *Padernan Dominicano a yega Antiyas pa cuminsa nan trabao pastoral na Savaneta.*

1871 – *School di Noord a cera atrobe. E siguiente año Shon Piet Croes cu a bin biba na Noord a bira e maestro nobo te na 1893. E tabata tin un cunucu yen di palo di fruta den bario di Alto Vista cu el a yama “Valencia” como un recuerdo na su yiu na Venezuela.*

1872 – *School ta bolbe habri na Noord door di Piet Croes.*

1872 – *E promé Aruba Island Gold Mining Company a wordu trahá pa dirti oro na Bushiribana. E derechonan di concesion tabata den man di Ricketts na New York. Te cu 1854 e*

derechonan di propiedad tabata di Louis J. de Jongh di Den Haag. Despues di 1872 nan a wordu otorgá na I. Isola., despues nan a wordu cumprá pa AIGC di Londres.

1873 – *Pastoor de Vries ta cumpra tereno na Savaneta pa un school.*

1873 – *Sr. Gravenhorst a descubrí depositonan di fosfat na Seroe Colorado y Cero Colebra. Sr. Gravenhorst tabata doño di e terenonan aki e tempo ey y tabata kier a explotá e fosfat.*

1874 – *Nan a traha un fabrica na Boca Mahos, Bushiribana, pa mula piedra di oro y laba oro. Algun metsla di Corsow hunto cu e metsla mas conoci na Aruba, Alexander Donati a construí e fabrica aki. Nan a hisa e piedranan grandi cu un grua di palo cu nan a traha.*

1877 – *School di Savaneta a cuminsa cu Leoncio (of tambe Herry) Croes. Herry a nace 1857. E tabata yiu di Jacobo Croes (no catolico) y Anna Benita Croes. Un cas na Savaneta a sirbi como misa y school. Despues Herry a kita y Bernardo Maduro a re-emplacé. Na 1879 el a casa cu Luisa Maduro, ruman muher di Bernardo Maduro. Bernardo no a duna les ni un aña y su ruman Gillis (Djers) Maduro sigi duna les pa mas o menos un aña, mientras Bernardo a bay duna les na Noord. Gillis no tabata un maestro pero un sapaté cosedor.*

1877 – *Misa di Noord a wordu construí y ta e cas mas anticuá na Noord.*

1878 – *Noord a haña su propio pastoor, Pastoor Bongers cu a traha e pastorie actual. Algun metlá di Corsow a bin traha e cas di pastoor Bongers. Mientras nan tabata traha e cas pastoor tabata biba den e school. Pesey Shon Piet Croes a stop su trabao di tene school. Ora pastorie a terminá, pastoor Bongers a pidi Bernardo Maduro cu tabata na Savaneta pa bini Noord como maestro di school. Aki el a keda dos aña y e y su señora Anna Felecita a biba den un cas di huur na Cero Buguroei. Nan tabatin cinco yiu: Clara, Jacobo Venancio, Henricus Johannes, Efigenio y Eleuterio. Bernardo a muri 1881.*

1879 – *Aruba Phosphaat Maatschappij a haci inversionnan grandi den infraestructura di San Nicolas door di traha un waf y un ferocaril pa carga fosfat.*

1879 – *San Nicolas, importante centro industrial di Aruba, unda tabata situá e refinaria, su origen na e explotacion di fosfato, na 1879 y despues di esey. El a haña su nomber di un propietario anterior di e tereno ey, Nicolas van der Biest. Antes e subordinadornan tabata dirigí e palabra di e propietarionan cu e nomber di shon, es decir señor. Nan ta bisa cu di Shon Nicolas a originá e nomber actual San Nicolas.*

1880 – *E promé cargacion di fosfat a wordu exportá pa Inglatera.*

1880 – *Na Savaneta tabatin un misa chikito, e cas bieuw di Herry Croes, situá pabou di cunucu di Zeppenveldt. E tabata un cas di lodo cu dak di palo di maishi y a sirbi como misa y school. Pastoor di Sta. Cruz tabata bini Diamars atardi, haci misa Diarazon mainta y tabata duna catesashi despues. Promé cu merdia e ta bai bek Sta. Cruz. Mas of menos 50 hende tabata bini misa cu nan mesun stoel. Tur tabata keda pafor, pasobra paden no tabatin lugar. Un dia net misa a caba, e dak a cay aden.*

1880 – *Rond di aña 1880 Shon Piet Croes a interumpi su trabao di maestro na Noord pa bin duna les na Savaneta.*

1880 – *Tabatin un ley na vigor di Mgr. Van Ewijk, cu yiunan ilegitimo no por bautisá riba Diadomingo, y no por tin padrino tampoco. Mgr. Ewijk tabatin su motibonan pa introducí e ley aki, pero na aña 1965 Obispo y sacerdotenan a dicidi cu e ley discriminatorio ey mester a wordu kitá. For di 1 di Januari 1975, mayornan cu tin yiu pa bautisá ta ser invitá pa un reunion preparatorio of instruccion promé cu baustismo di nan yiu.*

1881 – *Nan a traha un cas nobo na Savaneta pa haci misa y tene school y a wordu habri na Savaneta door di Herry Croes, Bernardo Maduro y Gillis Maduro. Awor Herry Croes ta*

bolbe bek como maestro na Savaneta y a bin biba eyman cu su señora. Luna di Juni el a bay Playa pa tuma su salario como Districtmeester. El a pasa anochi cu conocirnan. E mes anochi el a muri den su soño. Nan a deré na Sta. Cruz (1881). E tabatin 31 año y a laga cuatro yiu: Odulio, Cornelis (of Gustaaf), y Johannes. Despues di su morto a nace Keoncio Eugenio. School di Savaneta mester a cera atrobe y muchanan a ricibí catesashi for di Dorothea (Doorchi) Schwengle.

1881 - *E año cu un otro compania Ingles, Aruba Agency Company a participá den derecho di concesion den mina di oro na Bushiribana. E compania aki a busca Italianonan pa bin traha den e mina. Un total di 17 a bin di Toscano, cerca di Livorno abordo di un bapor pa bin traha. Nan a cera contract pa un año y ora esaki a terminá, tin varios a bay via Corsow bek pa Italia. Pero algun mucha homber no tabatin gana pa bay bek como cu nan tabata stima Aruba, y a dicidi di keda. Hopi di nan a casa aki cu e mucha muhernan cu tambe nan tabata stima y no kier a bay laga nan. Pesey tin fam Itiliano aki na Aruba, por ehemplo Petrocci cu a bira Petrochi, Jacopucci, Falconi, etc.*

1881 - *Investigacion di indiannan na Aruba tabata entre 1881 y 1886 pa A. J. van Koolwijk y Pastoor H. De Vries cu su coleccion ta wardá na Rijksmuseum voor Volkenkunde na Leiden, Hulanda. Santa Cruz tabata e pueblo Indian di mas grandi na nos isla.*

1881 – *Entre 1881 y 1909 e compania di oro di Bushiribana a traha tambe na Balashi. Eynan tabatin cinco mina of bena: Bena California, Bena Barticol, Bena Katushi, Shaft No. 1 y Shaft Grandi. Nan tabatin mesun sistema cu Miralamar – 1000 pia hundo. Eynan tres hende a muri di accidente. Medio di transportacion tabata burico pero despues e compania Ingles a bin cu un sorto di locomotief yamá Trekinchi. Su wielnan tabatin diente of ribchi pa no slip. E tabata move masha poco y ora e pega den lodo nan tabata mara un cabuya diki na su wiel y 150 homber ta rancé pa sacé. Asina e lugar aki a haña su nomber Marawiel, banda di Cristal y Babijn. Tabatin 300 burico den servicio.*

1884 – *Dia 4 di Maart 1884, na edad di 66 año Pastoor de Vries a laga Sta. Cruz pa bay bira pastoor di Barber na Corsow. Pastoor Ambrosio van Baars a re-emplasé na Sta. Cruz.*

1885 – *Rond di 1885, Shon Piet Croes a bolbe bin Noord pa duna les. Aunque tabatin un school banda di misa, toch el a duna les na su cas den Balencia. Tambe e tabata siña nan traha sombré. Su casá Mathilda (of Adelina) tabata siña mucha muhernan cose.*

1885 – *For di año 1885 e cemeterio di Commaneursbaai tabata yama cemeterio di San Hose. Pesey e misa chikito cu nan a traha na 1881, cu tabata sirbi como school tambe, a haña e titulo “San Hose”. Despues parokial di Savaneta a cambié pa “Sagrado Curason”. Tur Diamars atardi Pastoor de Vries tabata bay Savaneta riba su cabay hunto cu su sirbidornan di misa. Eugenio y Narciso Koolman di Sta. Cruz, nan dos tabata riba burico. Diarazon mainta pastoor ta haci misa, duna catesashi y atardi e ta regresa Sta. Cruz.*

1886 – *Pastoor Jacobus van Baars a traha un misa nobo (e di cuatro) riba e mesun lugar, cu e mesun nomber: “Misa di Santa Ana”.*

1886 – *Pastoor di Noord a traha un school nobo banda di porta di e santana actual.*

1887 – *Año cu Sr. Henny Eman, Sr. a nace, y el a muri na año 1957.*

1888 – *Herry Croes, maestro di school na Savaneta, a muri y e school a keda bashí.*

1888 – *E promé school publico trahá na Aruba.*

1888 – *E edificio, monumento historico, Biblioteca Publico di Aruba. Promé e tabata un school, durante segunda guerra mundial e tabata wordu usá como un cuartel y desde 1955 e ta Biblioteca Publico di Aruba. E edificio ta data 1887/88 y e construccion e tempo ey a costa Fls.4359.83.*

1889 – Dia 6 di Juni 1889 Pastoor de Vries a bolbe Aruba como pastoor emeritus, es decir un pastoor na sosiego. Pastoor Ambrosio van Baars tabata pastoor. Esey kier meen cu De Vries su curason semper a keda na Aruba tempo e tabata na Corsow. Awor e kier sosega y warda su morto na Aruba y tambe cerca su amigonan na Sta. Cruz. Obispo a cumpra un cas grandi di dos piso, pabou di misa di Sta. Cruz. E cas tabata di Herman Kuiperi y Frederico Olivet, suegro di Herman Kuiperi. Asina mes como Pastoor emeritus, e tabata bay tur Diadomingo haci misa y duna catesashi na Savaneta.

1889 – Ora Adelina, casá di Shon Piet Croes a muri, Piet a bolbe casa cu ruman di Adelina, esta Alexandra (Beja) Everon.

1890 – Pader Ludovico Jansen tabata pastoor di Oranjestad for 1890 te 1909. El a saca dos buki “Lectura Cristiana” y “Cuenta y Historia di Curacao y Su Colonia” den cual el a duna poco historia y cuenta di Aruba, cu a toca historia di Alto Vista.

1890 – Entre 1890 y 1924 tabata aña di crisis. Apesar di e actividadnan di fosfat, aloe y oro, fluctuacion den prijsnan internacional, perdidanen den fabricanan a haci cu e poblacion di Aruba por a biba solamente di esakinan. Cuminsamento di siglo '20 tabata temponan hopi critico y esaki a empeorá cu e promé guerra mundial di 1914 – 1918. Pa enfrentá contra temponan economico, gobierno local y hunto cu e habitantenan a cuminsa produci sombré cu tabata hopi popular e tempo ey.

1890 – Compania di Aruba Aloe a wordu establecí.

1891 – Pastoor de Vries a bira malo y dia 3 di September 1891 el a ricibí Santa Oleo y dia 30 di September el a muri. Hopi hende di Sta. Cruz a asistí na entierro riba e mesun dia. Su kelder bunita na santana bieuw di Sta. Cruz lo keda simper un bunita recuerdo na Pastoor de Vries kende durante 31 aña su trabao di sacerdote di Aruba y Sta. Cruz. E mesun aña aki Sta. Cruz a cuminsa traha un misa nobo. Pastoor de Vries a bendicioná e promé piedra dia 21 di April. Dia 9 di Juli, 1893 e misa nobo a haña bendicion solemn. Helena Romana Maduro (Shi Nena) cu semper a cuida Pastoor de Vries bon a keda biba y bira doño di e cas grandi riba un tereno grandi, plus a haña mas tereno y un pida cunucu na Daimari. Na aña 1909 Shi Nena a entregá tur cos pa traha un santana y school. Nan a tene school tambe den e cas di Shi Nena y asina e school a haña nomber di School di Shi Nena.

1892 – E promé Postkantoor na Aruba. Na Mei 1992, Postkantoor a celebrá su 100 aña di existencia y tabatin un festival di canto. E banda Y.M.T. (Young Musicians Together) di Arubaanse Muziekschool bou di direccion di Sra. Rose-Maria Provence, a percurá pa compañamento di e cantantenan.

1893 – Nan a pidi Shon Piet Croes pa school di Savaneta. Tur Dialuna Piet, acompañá pa Richard Trimon, mucha di pastoor, tabata subi su burico pa Savaneta y regresá Playa Diasabra.

1893 – Soeurnan a bini na Noord tambe.

1894 – E produccion di fosfat a baha asina tanto cu Aruba Phosphaat Maatschappij casi no por a wanta cabes mas riba awa. Ademá di esaki, e cantidad di fosfat di calidad halto a cuminsa agotá na fin di siglo 19. Finalmente e Promé Guerra Mundial a percurá pa caba completamente cu e compania. Na 1915 e minanan a cera y mayoria parti di e tranvia y e caruahenan a wordu bendí. E dos locomotornan di APM a wordu lagá atras y nan a pusha nan den un cueba na Cero Colebra den colony, unda nan a keda te dia di awe.

1897 – E ceronan di desperdicio di Bushiribana a wordu procesá di nobo cu cyanide cu a wordu descubri na 1895, y tabata pa promé biaha cu Mina di Oro tabata rendable.

1899 – Na December 1899 Aruba Gold Concession Ltd., un compania nobo di mina di oro a wordu establecí cu a keda te na 1916.

1899 – Aruba Agency Company (compania Ingles) a traha e mina di oro na Miralamar. Nan tabata tres mina of bena cu tabata yama: Mil Esperansa (riba cero); Buraché (abou den caminda pa bai Fontein) y Tene Bida (tambe riba cero). Nan tabata mil pia hundo. Pa lus den e tunel nan a usa bela grandi, un lona grandi di 8 meter clabá riba biga tabata coy biento manda abou, e hendenan tabata wordu bahá den un tobo grandi mara na un cabuya. Pa hala e tobo ariba mester a bati un klok of bati un pida hero. E minanan di Miralamar tabata esunnan mas peligroso cu tur e otronan. Cinco hende a muri.

1899 – Congregacion pa Hende Muher a wordu lamtá na Noord, cu su meta principal pa adorá Maria.

1900 – Savaneta, e lugar bieuw di gobierno, a bira un parokia di Diocesis Willemstad. School a keda cerá atrobe y na 1903 Shon Piet Croes a haña nombracion como maestro di Savaneta atrobe.

1900 – Te na 1900 Commanderusbaai of Savaneta tabata depende di parokial di Sta. Cruz. Dia 15 di September 1900, e momento cu e pastoor a ser nombrá. For di e dia ey Savaneta a bira un parokia independiente. E di promé bautismo tabata riba dia 29 di September. E promé y unico casamento na 1900 tabata di Michiel Maduro y Julia Tromp, dia 14 di October. Despues di Noord, Playa, y Santa Cruz, Savaneta tabata e di cuatro parokia cu a ser establecí na Aruba. Nan a yamá: Parokia di Sagrado Curazon.

1900 – E promé santana na Savaneta ta esun cu nan ta yama Santana di San José. Te awe ainda nos por mira e grafnan bieuw banda di oficina di Wit-Gele Kruis, of manera nan ta bisa tambe, e lugá di pisa mucha. Un di nos grandinan, Sr. Cojashi Thijsen, na edad di 80 aña a muri y e ta derá eyden. Pastoor van der Veer di Santa Cruz cu a caba di tuma e lugá di Pastoor Vuylsteke a bin dera e defunto.

1900 – Na September 1900 Pastoor A. Helling a ser nombrá pa keda na Savaneta. Nan a cuminsa traha e misa cu dak di panchi preto. Hopi hende a yuda busca piedra pa traha un misa. Theodor Thijsen a transportá piedra riba su burico for di den mondi. Hasta mucha muhernan chikito a carga piedra riba nan cabes y bou di nan brasas. E misa a bin cla na fin di November y a ser bendicioná dia 13 di December. El a bira di cuatro parokia. Pastoor Helling a haci e promé misa y Pasoor L. Jansen di Playa a tene un bunita predicashi, splicando nificacion di un tempel di Señor.

1900 - Den e temponan ey Isla di Oro tabata wordu yamá “Tapa La Boca”, pasobra esey tabata un lugá di contrabanda. Un boswachter tabata check riba e lugá aki y tambe pa e hendenan no corta mata berde, pa nan respetá flora di nos isla. Nan tabata bisa tambe cu eynan un diabel tabata biba y ora e grita bo sa cu ta bira un bon aña cu hopi yobida. Anochi bo no por a pasa eyan, pero den dia e no ta haci bo nada.

1903 – Shon Piet Croes, cu su barba blanco, na edad di 59 aña, a ser nombrá pa habri school na Savaneta. No tabata promé biaha cu e ta na Savaneta, pasobra na 1893 e tabata duna les caba akinan. Promé Herry Croes tabata haci school y ora el a muri na 1888 e school a keda bashí. Shon Betchi tabata traha cuminda pa Shon Piet Croes. E school tabata situá banda di misa, y a ser usá despues como school di sombré, magasin y garashi.

1903 – Hopi hende a bai traha na Surinam.

1904 – Na April 1904 pastoornan di Aruba, Jansen, van Sadelhof, van de Veer, Helling y Ellis a manda un carta pa Sr. Jennings pa no laga e hendenan traha riba Diadomingo, pa nan

por bay misa. Tambe Obispo a bisa cu e hendenan na Aruba ta bebe mucho, bende mucho rom y hunga dao.

1905 – Mgr. van Baars, Obispo di Vicariato di Corsow ta spierta e pueblo di Aruba pa spaar, como cu gobierno a lamta un banco pa spaar. Ora cu hende ta gana poco placa cu nan trabao den compania di oro, nan mester warda e placa tambe pa e porvenir.

1905 – Ochenta hende di Noord so a bolbe for di Surinam. Casi tur hende a bira malo di Malaria. Siete hende a muri di Malaria, tres na Surinam y cuatro na Aruba.

1906 – Den e época di indiannan, trafico cu Costa Firme tabata mas intenso cu Corsow pa motibo di e coriente marina tabata dificultá e comunicacion cu e islanan. Comunicacion tabata asina difcil cu gobierno mester a busca otro contactonan. Pa e motibo aki cu e journal di gobernador tabatin un seyo Colombiano riba cada pagina.

1906 – Pastoor Helling, cu tabata pastoor di Savaneta, a cay abou durante cu e tabata haci misa y a bira malo. Monsejor tabata di opinion cu cambio di clima lo haci e pastoor bon y a haña necesario pa mandé Hulanda. Pastoor a bay Hulanda y a muri dia 8 di Maart 1906.

1907 – Den un journal di dia 3 di October 1907, ta wordu mencioná cu anochi pa 8’or un cargacion Hulandes “Los Hermanos” cu tabata na caminda pa Corsow, un biento fuerte a dal e barco banda di costa di Savaneta y a sinké. Dos di e tripulantenan a landa bin tera y avisá di e sucedido. Mesora a saca boto di rema y di bela pa busca e otro personanan. Mainta tempran a encontrá dos y atardi tres cu ola a hiba noordwest di Aruba. Un mucha homber di 16 aña cu tabata drumí den e hut di e barco a sink hunto cu e barco. E otronan cu tabata riba dek a bula na awa y cu forsa a landa pa scapa nan bida. Fuera di e perdida di e tripulantenan, a perde e barco y su cargamento di aloe, mas o menos Fls.3,000.00.

1907 – Fort Zoutman a wordu usá tambe pa comisario y prison.

1908 – Pastoor Potten a haña noticia di Mgr. van Baars cu e por traha un school na Savaneta, pasobra e soeurnan lo bini pronto. Tur hende a bolbe duna nan cooperacion pa yuda e Metslánan di Noord kendenan a traha e school.

1908 – Union di San Dominico a wordu lamtá na Noord y su meta tabata pa combatí abuso di alcohol, manera un sorto di A.A. E miembronan tabata mag di dal 2 te 3 bitter, pero nan no ta mencioná cu ta pa dia of pa siman.....

1908 – E promé elftal di futbol lamtá door di dominee G. J. Eybers y e promé wega di futbol na Aruba.

1908 – Atrobe Aruba ta den probresa. Compania Ingles na Balashi tambe a perde placa cu su trabao den oro. Mr. Wolmer, e ultimo ingeniero y manager a consehá pa stop e trabao na Aruba y nan a bay for di Aruba.

1908 – Pieter Dijkhoff a haña un bunita klompi di oro di 99 liber na Tibushi. Tibushi tabata un di e minanan di oro na West Punt, e otro minanan eynan tabata Bena Sigar, Bentura, y Cubeo. Despues e minanan aki a bira pos di awa. E minanan aki tabata tin oro rico pasobra nan tabata haña ”oro cu piedra aden” y e otronan tabata haña “piedra cu oro aden”.

1909 – For di aña 1909 e promé grupo di soeur tabata biba den un cas na Sividivi. Na aña 1919 nan a instalá nan mes den edificio di Maria Convent. Nan a haci tremendo trabao pa hubentud y tambe nan a cuminsa cuida enfermonan na San Pedro Hospital, te aña 1959 soeurnan Franciscanes a tuma e trabao ey over. Na Juni 1979, soeurnan dominicanes a bay for di Aruba, despues di 70 aña di trabao. Despues di esaki soeurnan Antiyano a tuma over cu intencion di forma un grupo di religiosa Antiyano. Dia 8 di December 1982, nan a bira un fundacion bou nomber CREA (Comunidad Religiosa Antiyano).

1909 – Soernan di Roosendal a yega Savaneta y tur hende a duna nan un bonbiní. E promé nan tabata: Soeur Pharailda y Edwine. Nan tabata bistí cu paña preto.

1909 – Zuesternan Dominicanes a cuminsa traha na Aruba.

1909 – Algun Arubiano a lamta un compania nobo “Arubaanse Goudmaatschappij” cu tipicamente hende a yama “Compania Hulandes” Directiva tabata Max Arends y Nadi Henriquez cu a traha un bunita cas “Washington”. Hendenan ta gana placa atrobe y nan ta cuminsa distribí placa atrobe. A adaptá e sistema di pago cu Sr. Wulmer, e ingeniero y manager Ingles a introducí, esta “trabao halsá” of “bena halsá” unda cu ta paga hende segun nan entregá oro na Balashi. Esey a bira e sistema general pa e compania Hulandes.

1910 – Aruba a yega su punto mas alto den produccion di e aloe gum – 600/700 kilo.

1910 – E impacto di mas grandi di inmigracion den e paisnan den e region tabata entre 1910 y 1922, net promé cu Lago a establecé su mes, y net cu e oro y fosfat a caba. Mayoria di hende cu a inmigrá ta sernan masculino pa bay busca trabao y busca entrada pa nan familia.

1910 – Dr. Horacio Eulogio Oduber tabata e unico dokter na Aruba cu 8,000 habitante.

1911 – Gobernador Nuyens a bishita Aruba y su schoolnan y el a bisa cu mihó e muchanan haña les na Papiamentu.

1911 – E promé radio emisora na Aruba y e promé comunicacion telegrafico cu Corsou.

1912 – Cornelis H. Eman a pidi mihó Puerto pa Aruba.

1912 – Tabata un año cu hopi pobresa na Aruba. Hulanda mester a manda yudansa. Tabatin un segura grandi. Na Sta. Cruz a muri 40 mucha di school e año ey. Tempo di guerra mundial di 1914 Aruba Goudmaatschappij tambe mester a stop su trabao, esta na 1916. Mashinnan di Balashi a bay atras, no por a decha nan pa motibo di acesorio. Un esfuerzo nobo pa un compania di oro na 1945 a sali un fracaso.

1912 – A exportá 375,000 kilo di aloe compará cu 920 kilos di Corsow y 31,000 kilo di Boneiro.

1914 – Mgr. G. Vuylsteke, a duna permit pa construí un misa nobo. Dia 17 Juli, 1914, el a pone solememente e promé piedra. Cuminsamento di Augustus, Mgr. a stop cu e trabao, pa motibo di guerra no tabatin placa.

1914 – Aruba Phosphaat Maatschappij a cera.

1914 – Entre 1914 y 1918 tempo di e promé guerra mundial tabata tempo hopi critico y gobierno hunto cu e habitantenan a cuminsa producí sombré cu tabata popular e tempo ey.

1915 – E promé auto a jega Aruba den pida pida. E auto tabata di marca Metz di Dr. George Hopkins. Aki nan a arma e auto cu buki den man. Nan tabata yama e auto “wagen sin cabay”. Na Savaneta e auto a spanta hopi hende, y ora e wielnan a laga rastro atras, nan a yama e auto “un soldachi grandi”.

1915 – Frerenan di Tilburg a bin Aruba pa enseñansa pa muchanan di Aruba. Nan a habri school pa mucha homber na Playa.

1916 – Soernan tabata bistí paña blanco, esey tabata tempo di Pastoor Ellis. E tempo ey na Savaneta tabatin soernan Emiliana y Dosithea. Nan a traha un lokaal y mei acerca, asina cu school tin 4 lokaal awor. E tempo ey juffrouw nan tabata traha caba, manera jeffrouw Mosa Koolman (cu a casa cu Juan Lacle) y tambe Maria Thijsen. Mosa a duna les den 1^e klas for di 1911 te na 1921. Na Januari 1922, Johanna Croes a cuminsa duna les den 1^e klas pa e muchanan di 9 año. Jeffrouw Chica a traha 29 año, pero 13 año como Francisca Koolman y 16 año como señora di Minguel Wouters.

1916 – Den e 75 año di existencia di parokia di Savaneta, tabatin dos pastoor Antiyano. Pastoor Ellis, di paña preto, for 1916 te 1919 y Pastoor Kranwinkel for di 1964 te 1966. Un

trabao inmenso cu Pastoor Kranwinkel a haci durante su estadia na Savaneta tabata traduccion di Testament nobo na Papiamento. Hunto cu Pader Maasen, kende tur dia tabata bin for di San Nicolas, el a traha riba esey cu hopi zelo, pasenshi y perseveransa. Savaneta mes nunca a produci un sacerdote di su famianan.

1916 – *Pastoor Ellis a cumpra un tereno panort di santana na Savaneta. Pipi Bisslick a manda hende planta aloe eynan.*

1916 – *E murayanan di Misa di Alto Vista a desaparecé completo ora cu parokianonan di Noord a bay busca piedra pa traha misa nobo di Noord. Algun padvinder di Noord a haci un exploracion y a bin encontrá e fundeshi di e misa bieuw. Kier meen den e misa di Noord tin actualmente piedra di e misa bieuw di Alto Vista.*

1916 – *A suspendé e explotacion di oro pasobra pa motibo di e promé guerra mundial, no por a haña e materialnan prima pa purificacion di e mineralnan.*

1916 – *Pader Thomas Sadelhoff tabata pastoor di Noord y a cuminsa kita e misa bieuw, pero como e mester a bay Hulanda pa motibo di su salud, Pader van de Pavert a bira pastoor di Noord na Aruba y e a sigi kita e misa bieuw y a traha uno un poco pariba di esun bieuw. Esaki tabata e di cinco misa na Noord. Dia 30 di Mei 1916, Mgr. a bendicioná solemnemente e misa. Riba 1 di Juli e promé santo sacrificio di misa a wordu celebrá. E tabata yen di idea y el a mira cu criansa di baca tabatin su balor. Unbes el a saca e idea di cuminsa na Aruba un Cooperativa pa traha y bende manteca. E nomber oficial di e Cooperativa tabata: “Agencia di Fabrica di Mantequilla Santa Anna Aruba Company”. E tres personanan mas principal di e compania cu a forma directiva tabata: Antonio Ruiz, presidente, Carmelo Semeleer, agente, y Manuel Flanegin, tesorero. Hopi cunukero a uni, tur a forma un fondo, un sorto di accion, y tur dia nan tabata entrega lechi. Na cas di Antonio Ruiz na Washington, den un magasin, nan a cuminsa traha manteca y forma e fabrica. (E cas aki ta actualmente Papiamento Restaurant y Antonio tabata Omo di tata di nos talentoso musico, Sr. Tino Ruiz). Soeur Bertranda, kende su mayornan tabata cunukero, a duna su apoyo door di siña e hendenan con pa traha manteca, keshi, y con pa hala lechi cu pianan di e baca mará. Cu barco “Beatrice” e promé cargo di manteca y keshi cu tabata bai Corsow a perde y 5’or di marduga a dal un klip banda di Ricla y Matagordo na Venezuela. E barco a kibra y parti di e cargamento a bay perdí. Esaki tambe tabata e fin di e fabrica.*

1916 – *Dia 4 di September 1916, nan a dera e restonan di Pasoor Pirovano den un caha nobo na pia di cruz di santana di Noord. Nan a pone un documento den e graf cu ta bisa: “Aki ta derá wesonan di Muy Reverendo Señor Johannes Joseph Pirovano cu a muri na año 1822. E tabata pastoor di Misa San Francisco y tambe a cuida Noord den e misa bieuw, cual tabata yamá Misa di Monte Calvario, y despues a wordu yamá Misa Santa Ana.*

1917 – *Dia 8 di December 1917, a nace na Wilhelminstraat 33, Oranjestad, Aruba, e primogenito di e matrimonio di Sra. Leonila Maria Annette Lampe Babijn y Sr. Civiles Marcial Wever Everts – Rufo Inocencio Wever. Promé cu el a cumpli 6 año, su mayornan a regalé un sinfonia di boca. Su tata cu tabata un musico, a descubri asina e talento musical di su yiu y mesora el a cumpra un piano segunda mano pé. Cu 13 año el a actua pa promé biaha na Corsow y un año despues el a biaha pa Bonerio, unda el a konkistá hopi admirador. Tempo e tabatin 15 año el a lamta e orkesta “The Melody Band” cu su amigonan. E orkesta a bira un exito grandi na Aruba y tabata toca na clubnan y cinemanan.*

1919 – *Despues di e fracaso di Fabrica di Mantequilla na año 1916, Pastoor van de Pavert a cuminsa cu un otro Cooperativa “Compania Catolico di San Hose”. E tabata un cooperativa di tienda y industria chikito. E fabrica a cuminsa cumpra hopi hariña pa*

bende den e cuatro tiendanan (Santa Cruz, Tanki Leendert, Piedra Plat y Noord). Pastoor Pavert a cuminsa un fabrica di cabuya, un curtiembre y sapateria. E fabrica di Cauja a bin na e lugar di Imeldahof, zuid di misa. Na 18 di October 1919, e promé cargo di sisal a yega Aruba biniendo di St. Eustatius y Malpais. Nan tabata troce e cabuya. E curtiembre tabata un lugar pa curti cuero na cas di Thomas Semeleer, despues a haña un lugar banda di misa di Noord. Door di e cuero, pastoor a lamta e sapateria. Dia 29 di November 1919 Gobernador Helfring a bin bishita Aruba y el a honra e Compania di San Hose cu su bishita. Ma e compania aki tampoco tabatin un bida largo.

1919 – *A construí misa San Francisco na Playa.*

1919 – *Aña 1919 y 1920 tabatin hopi probresa pa motibo di segura. No por a corta aloe, no tabatin cuminda pa bestianan, tur sorto di malesa a atacá muchanan y hende grandi; sarampi, scorbut, bruela y cacheton. Hopi hende a muri, na 1920, 46 hende a muri.*

1920 – *Soeurnan Dominicanes a cuminsa cu cuida di enfermonan den un cas na Sividivi. Ora soeurnan Franciscanes di Asten a tuma nan trabao over na 1957, tabatin 90 pacient den San Pedro Hospital. Den curso di añanan cu poblacion a crece, necesidad pa exende e hospital tabata bira mas urgente y nan a aumentá e camanan te na 220. For di 1974, tur pacient di Lago tambe mester a bai San Pedro Hospital. Dia 29 di December 1960, fundacion Ziekenverpleging a lamta. Obispo a keda presidente y Dr. Nuboer a bira director general. San Pedro Hospital a keda existí te November 1976 te dia Hospital Horacio Oduber a habri cu 270 kamber. Tambe mester mencioná Michael Paviljoen, situá riba tereno di San Pedro Hospital. For di aña 1958 e tabata hospedá 30 anciano. Di 1976, e tabata cay bou di fundacion Ziekenverpleging Aruba. Ora cu hospital a move pa Eagle, Michael Paviljoen a keda. Tanto Michael Paviljoen y Maris Stella ta cay awor bao di Stichting Bejaardenzorg Aruba (SABA).*

1920 – *Cas floriá a cuminsa na Aruba, esta e adorno bunita di figura di cortina, strea, flor, pico di parha, medio luna, etc. na rand di heut of na skina di cas. E promé cas cu a haña e adorno aki tabata di Bernardo Eman Croes na Pos Chikito. Dos Metsla di Noord, Julian (Janchi) Christiaans y Goy Semeleer a traha e cas aki na aña 1920 y a duné e adorno di flor bou di heut y di dos pilar na e skinanan. Pesey na e casnan na Pos Chikito y Sabana Basora tin masha hopi. Por tin mas o menos 200 pa 300 cas na Aruba y e floriamento aki te na aña 1944. Janchi Christiaans tabata un discipulo di su tata Hose Christiaans y di famia Donati. Famia Donati a dorna hopi cas figura di cortina, directamente cu man y sin usa patronchi, manera Janchi Christiaans despues tabata usa. Awor tin algun cas cu ta wordu trahá, estilo Arubiano cu tambe ta usa e floriamento aki pa mentené nos cultura.*

1920 – *Entre 1920 y 1928 Gezaghebber Jan Frederik Quast (Frits) di Aruba. Durante e tempo ey su directiva a lamta refineria Lago y Eagle riba e isla y a cuminsa cu un era nobo.*

1920 – *Na 1920 – 1930 e produccion di e aloe gum a sigi baha pa motibo di productu artificial cu ta wordu trahá den laboratorio pa laxante.*

1920 – *Na fin di 1920 Pan American Petroleum Maatschappij a yega Aruba cu despues a bira Lago. E tempo ey tabatin 6,000 habitante y mayoria di nan tabata traha den cunucu of plantacion di aloe. Pa falta di trabao varios Arubiano a bai Valencia, Maracaibo, Coro y Cumana. Nan a traha solamente algun luna den plantacion di koffie of cacao y despues a regresá bek. Tambe algun a bay Colombia y a traha den e United Fruit Company na Santa Marta. Algun a bay Jamaica, Corsow of Cuba pa bay busca mihor oportunidad pa motibo cu e tempo ey tabatin un crisis di oro y fosfat cu a termina produccion.*

1920 – *Hospital San Pedro de Verona a wordu construí promé cu aña 1920.*

1920 – Na October 1920, tabatin habrimento di school di sombré. Nan a cuminsa cu un grupo di 40 mucha muher, bou di direccion di Petronilia Kock. E siguiente año nan a haña nan obligá a cera e school pa motibo cu nan no por a bende sombré mas.

1920 – E promé soeur cu a nace den parokia di Noord y kende alaves tabata tambe e promé soeur di Aruba, tabata Laura Kelly, yiu di Jan Hendrik Kelly y Eufrañie Silvester. Laura tabata yuda cu dunamento di les na school te dia cu ela bay Hulanda na año 1920 pa bay bira soeur di Roosendaal. El a haña nomber di soeur Ursula. Pero mientras e tabata na Hulanda el a muri dos año despues, na 1922.

1921 – Fundacion di Club Tivoli.

1923 – A habri e promé veld di futbol na Oranjestad.

1923 – Año 1923 tabata un bon año, tabatin hopi awacero y hopi cosecha. E siguiente año 1924, net contrario, poco awa y menos cosecha.

Dia 13 di Januari 1923, Bets de Kort a cuminsa su carera como maestro di school na Savaneta. E tabatin un lugá especial den curason y den memoria di tur hende di Savaneta. Na año 1963, tabatin un programa di fiesta den Club na ocasion di hubileo di 40 año como maestro di school di Juffrouw Bets. Actividadnan di e y Juffrouw Pascuala riba tereno di comedia y otro forma di cultura, pero principalmente nan palabra y bon ehempel tabata añanan largo un guia pa hubentud di Savaneta. Mescos nos por mencioná cu historia di Savaneta no ta completo, si nos no mencioná dos persona cu mas cu 40 año a duna tur nan energia y dedicacion na nan trabao pa misa y pastorie, esta Pancrasia y Nena. Pastoornan a bini, pastoornan a bai, pero nan a keda, sabiendo cu nan no a bini aki pa sirbi tal y tal pastoor, pero cu nan a dedica nan bida den sirbishi di Iglesia.

1924 – Despues cu Richard Johan Beaujon a tuma contacto cu J. G. (Dudu) Eman, Dudu a warda Capt. Robert Roger, Capt. William Clark y J. Oswald Boyd di British Equatorial Oil Company cu tabata buscando un waf pa transbordo di petroleo pa nan compania asocial, Lago Petroleum Corporation cu tabata saca petroleo di Lago Maracaibo, Venezuela, na waf di Paardenbaai. E grupo a yega den e barco “Brion”. Nan a hospedá na Pension Aruba, unda actualmente ta Atrium Mall, den caya grandi.

1924 – Lago Oil & Transport Co., Ltd. a bini Aruba. E hecho cu Lago a establecé na Aruba tabata debí na su situacion geografico y na e wafnan di mundo y su ambiente trankil riba tereno politico. E tempo ey tabatin 6,000 habitante y a cuminsa empleá localnan. Lago su promé empleadonan local tabata gana 25 cen pa dia of Fls.1.50 pa siman. Na October 13, 1924 e promé tankero cu petroleo a yega Aruba pa tranbordá pa Taratata na Playa, mientras e tankinan na San Nicolas tabata wordu construí.

1924 – Na año 1924 soeur Ursulina Dijkhoff di parokia di Noord, a cuminsa su bida religioso cerca e soeurnan Franciscanes na Breda.

1924 – Yegada di lus electrico na Aruba.

1925 – Dos otro soeur di Noord a cuminsa nan bida religioso cerca e soeurnan Franciscanes, esta soeur Judith Tromp y soeur Marca Britten. Despues hunto cu soeur Ursulina Dijkhoff a bay biba na Corsow. Aya nan a encontrá cu soeur Augustina Franken cerca e soeurnan Franciscanes di Schijndel. Soeur Augustina Franken tambe ta di parokia di Noord. Cerca e soeurnan Dominicanes di Voorschoten a drenta conbento: soeur Anne Marie Eduardo, soeur Gerarda Majella Tromp y soeur Floriberta Simileer. Cerca e soeurnan Dominicanes di Bethanië a drenta conbento: soeur Enrica Figaroa, Magda Semerel, y Gemma Figaroa. E ultimo tres soeurnan a haci nan promesa den misa na Santa Anna mes y nan a biba na Cas di Betania, banda di pastorie. Cerca e soeurnan di Asten a drenta conbento soeur Leonie Ruiz y e

tambe a haci su promesa den misa di su parokia, Noord y ta actualmente directora di Maris Stella, e cas pa ancianonan na Savaneta. Aki nos por mira cu Noord a producí basta soeur.

1925 – Den Juli 1925, Pan American Petroleum Company, un filial marítimo di e compania Mericano Standard Oil, esun di mas grandi na Mundo, ta cumpra tur shares di Lago Oil & Transport Company for di e Inglesnan.

1925 – A traha misa di San Nicolas y e tempo ey a costa Fls.500.00 pa trahé.

1925 – Aña cu hopi habitante di islanan di habla ingles, a lamta tur sorto di religion. Na 1928 Pentecostal Church; 1930 Methodist Church; 1930 Adventista; 1940 Anglican Church; 1945 Comudidad di Los Hermanos de Moravia di Surnam; 1949 Testigos di Jehova. Entre nan tambe tin Church of God of Prophecy, unda nan ta hisa e culto cu musica instrumental.

1925 - Dia 4 di Juli 1925, a aterisá na Aruba e promé avion na Paardenbaai.

1925 – A lamta e promé banco na Aruba, esta John G. Eman Bank cu despues a bira Aruba Bank N.V.

1926 – Pastoor Hendriks a cuminsa traha na Savaneta.

1926 - E promé mucha muherman di Aruba cu a bay studia na Hulanda tabata: Sidonia Tromp, Chita Oduber, Laura Paskel, Leentje de Cuba y Johanna Eduardo (Zr. Anna Maria).

1927 – Janchi Christiaans a traha e promé cas floríá na Noord pa Julian Tromp na Buguroei, cu floriamento na sistema di cortina.

1927 – Dia 16 di November 1927 e waf di San Nicolas a habri pa trafico di barco pa cuminsa cu transbordo. Durante e mesun aña a dicidi di traha un refineria pa procesá petroleo di Venezuela.

1927 – Lago a cuminsa cu su operacion na San Nicolas y a zorg pa cas, awa, cuminda, educacion, facilidadnan religioso pa su trahadornan. Na cuminsamento un refineria modesto cu a bira e refineria di mas grandi di mundo, produciendo 440,000 barí di productonan di azeta refiná pa dia. Lago a causa un cambio drastico, cu a trece un economia grandi, consecucionan religioso y politico. Pesey, e refineria a bira Aruba su entrada number uno, cu turismo di dos.

1927 – E cas di Sr. Ecury a wordu construí den caya di Nassaustraat.

1928 – E refineria Shell establecí na Corsow desde 1915, a construí uno na Aruba na aña 1928, un sub-division independiente di e Compania Mexicana de Petroleo el Aguila S.A.. Nan a yam'é Compania Arend, Neerlandes pa Aguila. E refineria aki tabata mas o menos banda di e Hotel Manchebo Beach. Nan a traha un waf eyan. E beach aki a wordu yamá Eagle Beach (Playa del Aguila). E compania tabatin como 400 empleado unda nan tabata producí cierto productonan. Despues e necesidad a desaparecé di e specialidad y despues di 1952 e refineria tabata sirbi solamente pa warda producto (storage). Na aña 1961 La Aguila a wordu absorbá pa e agencia local di e Compania Shell y a wordu manehá door di Antiyas Hulandes.

1928 – Dos Venezolano, Rafael Simon Urbina y José Maria Fossi, a pasa algun dia cerá den e prison di Fort Zoutman, despues cu nan a bin Aruba despues di e fracaso pa baha gobierno di Juan Vicente Gomez.

1928 – Na Februari 1928 pa di promé biaha tabatin lus di coriente den misa di Savaneta. Promé nan tabata usa lampi di kerosine. E promé auto di pastoor na Savaneta tabata un Ford Roadster, cu Pastoor Hendriks pa medio di Pan American Oil Corporation a cumpra na New York pa e suma di Fls.1,592.00, incluso Fls.50.00 pa tax. Esaki a inclui e transportacion gratis

cu tambe el a ricibí di nan. Un empleado di e compania a trece e auto pa pastoor dia 6 di November 1928, atardi.

1928 – Pa promé biaha cu tabatin un procesion na Savaneta na ocasion di fiesta di adoracion cu a ser haci pa parokianonan. Pastoor semper a kere cu esaki tabata un fracaso. Un año promé, por ehemplo, tabatin hopi boroto di mirones tras di muraya, y hasta bringamento. Nan a laga hendenan di otro parokia, especialmente di Noord, participá den esaki, y e parokianonan mes a keda fuera di curá di misa. Esnan cu mester a carga e lanternanan a yega laat of no tabata bini mes. Pastoor Hendriks a avisá su parokianonan cu si cos sigi asina, e ta sinti su mes obilgá di pidi Obispo pa kita procesion na Savaneta. Pero e aviso a yuda hopi pasobra despues e parokianonan mes a cana den procesion y e hombernan bistí na preto. Congregistanan tur a bisti nan cinta blou y debotonan di Sagrado Curason a bini cu nan cinta corá.

1928 – Durante tempo di cuaresma e altar, preekstoel, y mesa di comunion a wordu poní den misa Santa Anna door di Pancho Ruiz cu ayudo di Wachi Tromp, Cheppi Giel, y Fermin Frank. E altar aki tabata den un misa na Scheveningen, Hulanda. Tempo cu nan mester a kibra e misa aki pa reconstruccion, e pastoor a regalá esakian na Mgr. Vuylsteke cu e condicion cu tur gasto mester wordu cubri door di misa di Noord. E altar principal, cortá den palo di eik ta un bunita ehemplo di e neogotiek di 1870. Tur esakinan a wordu trahá na 1850 door di e artista di Brabant, Hendrikus van der Geld cu a nace na 1914 y a muri na 's Hertogenbosch (Den Bosch), un ex-alumno di e academia di Arte di Amberes na Antwerpen. E obra aki a wordu premiá den e exposicion di Arte religiosa cu a wordu celebrá na Roma na año 1870 durante e Promé Concilio Vaticano. Sr. Antonio Ruiz, omo di tata di nos talentoso musico, Sr. Tino Ruiz, a arma e altar, cu a bin na pida pida.

1929 – Sr. D. J. Smith, e tempo ey hefe general di construccion, a laga traha den su oficina un plan extenso y presupuesto di e misa nobo cu mester a wordu trahá na San Nicolas. Ademas el a logra haña un suma di Fls.12,500.00 como regalo pa e misa ey.

1929 – E brug di Spaans Lagoen a wordu trahá y te na Juli 1970 a funcioná como e caminda cu a conectá San Nicolas cu Oranjestad.

1929 – E promé caminda di asfalt a wordu trahá na Aruba.

1929 – E promé misa Sta. Theresita a wordu bendicioná na año 1929. Na año 1935 esun actual a wordu trahá.

1929 – Dia 29 di Januari 1929 Lago a cuminsa su operacion y cu e promé barí di azeta a pasa door di e plantanan. San Nicolas tabata den un inmenso desaroyo.

1929 – Nassaustraat a wordu asfaltá pa promé biaha.

1929 – E Americano Jack Emery, cu tabata un empleado di Lago a originá cu cultos religioso y di eynan a nace e Community Church den Seroe Colorado na año 1939.

1930 – Dia 4 di Augustus Mgr. Vuylsteke a muri.

1931 – Distribucion di awa den tubo; constitucion di Camara di Comercio y Industria.

1931 – A traha waf na Paardenbaai despues di habrimiento di e promé pier den L-vorm.

1931 – Na año 1931 e hendenan por a busca cuminda di primera clase cu hopi carni na cushina di Pan American pa muchanan di school. Pa motibo di problema cu transportacion, nan a stop di busca esakinan an 1932.

1931 – Tabatin un Vereniging Santa Rosa na Noord. E tabata un grupo di mucha muhernan bao guia di souernan. Nan tabata cose y traha flor, etc. pa misa.

1931 – San Nicolas a haña su mesun parokia Santa Theresita, di cinco parokia. Dia 9 di Februari 1931, a nombra Pader Hendriks como e promé pastoor di San Nicolas. Dia 14 di November 1931, Pader Verriet a bira Obispo.

1932 – E promé waterleiding a wordu trahá na Oranjestad; na San Nicolas 1934 y Balashi te 1959 te ora cu e nobo a wordu trahá.

1932 – Dia 16 di September 1932, a construí School Santa Theresita na San Nicolas. Entre e misa y e school tambe un cas pa e soeurnan. Dia 9 di Januari 1933, e school a habri su portanan. E tempo ey tabatin 273 alumno. Tres soeur Dominicano tabata asocial na e school, di cual soeur Philotea a keda nombrá como e promé cabesante di Theresiaschool. Tabatin juffrouw Lucy Marten cu a haci hopi trabao den parokia, organista di misa, aklea di welpen y directora di E.K. Despues el a drante combento di Soeurnan di Roosendaal y a traha como Soeur Berchmans na Corsow. Na e promé grupo tabata pertenecé tambe juffrouw Nicomeda Thijsen y na aña 1935 juffrouw Bets de Kort cu a ser trasladá for di Savaneta pasobra no tabata permití pa kwekelingnan duna les mas.

1932 – Misa St. Franciscus, trahá na aña 1919, e di cuatro misa cu e mesun nomber y lugar.

1932 – Na aña 1932, Savaneta a haña su mes dokter, annex Botica, caminda Shon de Kort tabata reina durante casi 40 aña. Na Savaneta tabatin dokter Coco Arends, Gelfman, Engelbrecht, Spitzer, de la Fuente, Emmanuels, Turner, Brands, Oostendorp, Dennert, Ponse, y Tromp.

1933 – Na Januari e promé zusteran dominicanes, Philotea, Maria-Jozef y Eucheria a yega San Nicolas. Na fin di siman nan tabata bolbe Playa. Zuster Philotea tabata cabesante di Theresiaschool te na Juli 1934 pasobra e mester a bolbe Hulanda riba conseho di dokter. Zr. Magdala a bira cabes di school te na 1938 pasobra e mester a bay St. Maarten pa siña Ingles. Despues, cu conocimiento di Ingles, el a bolbe San Nicolas y a tuma un grupo di E.K. na su encargo te na 1950, despues di 20 aña di sirbishi, el a bay cu cuatro luna di vacacion.

1933 – Pastoor Hendriks a haci masha hopi pa San Nicolas y no ta pornada cu a nombra un caya grandi na San Nicolas, esta “Caya Pastoor Hendrik” cu antes tabata “Ceintuurbaan”.

1933 – Dia 28 di Augustus 1933, Pascuala a cuminsa cu su carera como maestra na Savaneta. Na aña 1968 tabatin fiesta pé ora el a cumpli 35 aña como Juffrouw Pascuala. El a traha tres aña mas te na su morto na aña 1971.

1933 – Desde cuminsameno, 1931, tabatin un congregashi di 40 miembro na San Nicolas, esta “Hermandad di Santisima Rosario a wordu fundá dia 17 di September 1933. E miembronan a tuma riba nan e obligacion di resa tur dia un rosario.

1933 – R. K. Voetbalbond Noord a wordu lamtá. E meta tabata pa tene e muchanan for di bond neutral di Playa.

1933 – Den añanan anterior educacion religioso tabata consistí principalmente den contamento di historianan di bijbel, segun aña liturgico: creacion, nacimiento di Hesus, Semana Santa, Pascu Resuerccion, etc. Despues a bin Kleuterschool pa duna religion na un nivel mas adaptá na alumno. Muchanan ta siña expresá nan sentimento religioso den pintura, cantica y den conta of hunga un historia religioso.

1933 – Tur school tabata usa “Catechismo”, un buki di catesashi cu masha hopi pregunta y contesta. Muchanan mester a siña dies pregunta tur dia. Segun esey bo tabata haña un cifra pa “Religion” riba raport. Durante 1963-1968, nos no a usa buki di catesashi di nos mes dioceses, pa cada klas un otro buki, bunita ilustrá y hopi mas adaptá na nos muchanan. E mesun aña soeur Juliette a bira cabesante di “Centro Katechetico” y desde e tempo ey e tabata

pasa school pa school pa animá, stimulá y mehorá lesnan di religion. E meta tabata pa jega na un conscientisacion mas profundo posibel di nos maestro y maestronan, cuminsando na Academia Pedagogico (APA) y asina di nos muchanan.

1934 – *Den un cas di palo enfente e misa di San Nicolas, unda ta of tabata biba Sr. Eugenius Hassel, e promé Zeemanshuis a ser inaugura. Motibo di esaki cu Pastoor Exler su preocupacion di mas grandi tabata e situacion di e marineronan cu tabata bishitá Lago. Ora cu a contruí un misa nobo na 1935, a usa e tablanan di e misa bieuw pa traha un otro net na skina di Weg Seroe Preto.*

1934 – *A lamta un muraya rond di santana na Zeewijk y na October 1934 a cuminsa dera morto eyden. Promé cu esey tabata dera den santana di Savaneta.*

1934 – *Dia 4 di april 1934, un solemnidad particular a tuma lugar na parokia di San Nicolas. Nuebe homber, nací na China, variando den edad di 20 te 43 aña, boluntariamente a pidi pa drenta Iglesia Catolica, a ser bautisá pa Mgr. Verriet, kende a bin Aruba special pa e ocasion aki, acompañá pa su secretario, Pader C. van de Looy. E hombernan Chines a ser bautisá promé cu sacrificio di misa, bao di cual nan a ricibi promé Santa Comunion, mientras despues di misa nan a ricibi un otro sacramento, esta confirmacion. Un di nan, Choy Koc, a casa pa misa mesun dia cu Maria Julianan Gomez. Otro tabata e conocido comerciante, Won Kin di Weg Seroe Preto, kende a casa cu Angelica Geerman den misa di Santa Cruz, riba 29 di Augustus di e mesun aña. Chong Hong cu a casa un aña despues, na November 1935 cu Marianita Croes (Shanghai Store) na San Nicolas; y Hoo Nang cu na April 1936 a escoge Oney Althea Williams como su novia y cu a bay biba den de Ruyterstraat.*

1934 – *Dia 8 di Juni, a funda “Confradia di Sagrado Curason” na San Nicolas cu tabatin 150 miembro. Nan a ricibí como señal di miembro, un medaya na un cinta cora, cu nan tabata bisti ora di solemnidadnan di misa. Na 1936 e cantidad di miembro a bira 300.*

1934 – *Na December Pastoor Exler di San Nicolas a cumpra un tereno patras di Theresiaschool for di Sr. Bibi Maduro pa Fls.3,000.00, pa construí un school pa fraternan y cu por wordu usá como lugar di hunga pa muchanan. Na Februari 1935 nan a dicide pa contruí un misa nobo y un teatro. Esaki a bira Club Cecilia. E teatro por a wordu usá como un segundo misa, den caso di emergencia. Dia 15 di Mei nan a cuminsa construí e teatro cu a keda cla dia 23 di Augustus. Dia 20 di December e teatro a wordu usá pa misa mientras tabata traha e misa nobo, dos bes mas grandi, di tabla. Dia 22 di December e misa nobo a wordu bendicioná pa pastoor mes, como cu Mgr. Verriet no por tabata tey. Na September 1936 a cuminsa construccion di e school di fraternan.*

1934 – *A traha e promé Watertoren na San Nicolas.*

1934 – *B. J. Arends & Sons a lamta nan negoshi.*

1934 – *Dia 23 di December 1934 e avion Fokker-18 di KLM a baha na Aruba riba pista di Savaneta pa promé biaha, via Corsow. Di Aruba el a pasa riba Boneiro y no por a baha pa motibo cu no tabatin lugar pa aterisá.*

1934 – *Rufo Wever (qepd) a cuminsa pone piesa riba caha di orgel. Antes piesanan tabata wordu poní pa Aruba pa un tal Sr. Sprock y tres otro mas na Corsou. Awor ta Aruba ta pone nan pa Antiyas Hulandes.*

1934 – *Inauguracion di e promé hotel na Aruba, esta Hotel Caribe, den e cas unda tabata situá Spritzer & Fuhrmann.*

1934 – *E promé accidente di trafico basta serio cu a socede na Savaneta, promé cu nan a asfaltá e caminda principal, tabata entre e auto di Sr. Dominico Schwengle A-95 y un truck. Dominico a bai keiro na Santa Cruz cu su amigonan, José Bisslick, Lorenzo de Mey y Hacobo*

Arends. Den un otro auto tabata sigi, Candido Kock, Nemencio Koolman y Alfons van der Linden. Fiesta na Santa Cruz a cay aden pasobra tabatin desorden y bringamento, asina cu banda di 10'or di anochi nan a yega Savaneta. Dilanti di cas di Foyan Arends e accidente a tuma lugá. Dominico a heridá su pia, Lorenzo a kibra dos sleutelbeen. Hacobo a perde tur su dientenan y Joe a sinti lomba.

1935 – Dia 24 di Juli 1935, gezaghebber ta manda un aviso cu ta participá cu desde 1 di Augustus di e aña ey tin ocasion pa duna op, reconocé yiu, kita nomber, duna man, casa, etc. na cas di Izaak Maduro na Sta. Cruz y na cas di Enrique F. Arends na Savaneta. Na Sta. Cruz tur Diamars di 1:30pm pa 4:30pm y na Savaneta tur Diahuebs dia 1:30pm pa 4:30pm. Oficina di Burgelijke Stand (Estado Civil) na Oranjestad lo ta cerá riba e atardinan ariba mencioná.

1935 – Inauguracion di e aeropuerto cu na 1942 y 1950 mester a hacié mas grandi., despues el a bira Aeropuerto Princes Beatrix. Na 1950 a traha un pista cu na 1952 y 1960 mester a haci mas grandi pa por acomodá jumbo jets.

1935 – Lago a habri su Lago Vocational School y a terminá na aña 1957 pa motibo cu gobierno a cuminsa cu su Technische School na Playa.

1935 – Na 1935, den periodo di Pastoor Hendriks, dos hala na misa a wordu construí. Esaki a wordu prepará pa Pastoor Paanakker durante su estadia di tres aña na Savaneta. Misa a bira mas bunita y poco mas grandi, nan a drecha murayanan y pafó bon gepleisterd. A traha koor nobo y plafond. E trabao a dura 4 luna, y mientras tanto pastoor tabata haci misa di Diadomingo bao di hadrei di school. Pastoor Hendriks tabatin 65 aña y a lamta un organisacion pa homber y hobennan bon catolico. E meta tabata: recreacion, desaroyo di hubentud riba tereno religioso y cultural, contacto cu pastoor cu hubentud mas grandi cu 18 aña. Nan a cuminsa cu 65 miembro y a tene lectura y debate.

1935 – Na 1935, e famoso cantante Argentino di tango, Carlos Gardel, a bishita Aruba y Rufo Wever a toca cuné. Inspirá pa e cantante aki, Rufo a lamta su grupo di tango “Los Trovadores Musicales”. Esaki tabata e promé conhunto Arubano cu a toca na Radio Curom na Corsow. E aña aki el componé su promé wals “Arubanita”.

1936 – A inaugurá e promé Parlamento di Antiyas Hulandes (Staten), por lo cual Aruba tambe tabata pertenecé.

1936 – Na 1936, ora nan a traha e club di Savaneta, henter e instalacion di lus y coriente tabata regalo di Sr. L. G. Smith, gerente general di Aruba plant of the Standard Oil Company of New Jersey, kende tabata un bon amigo di Pastoor Hendriks.

1937 – Frerenan a yega Aruba. Nan tabata 13 y den curso di añanan 62 Frere a traha na Aruba. Na 1955 tabatin 42 Frere, e grupo di mas grandi na “Huize de la Salle” na Playa y un grupo mas chikito na “Huize Maris Stella” na Savaneta.

1937 – Na October 1937, Pastoor Hendriks a manda un peticion pa gobernador na Corsow, pa e duna permit na school di Savaneta pa nan bay duna les di Ingles. Gobernador ta contestá cu esey no ta permití, pa motibo cu soernan di Savaneta no tin diploma pa siña muchanan Ingles. E ora ey a dicidí pa duna les despues di oranan di school, pa esnan cu tabata interesá. Nan a cuminsa cu 17 mucha homber di 5e y 6e klas.

1937 – Excepcional tabata e cantidad di awa cu a cay for di September 1937 te cu Maart 1938. Mas o menos pa 9'or di anochi awa a basha manera rionan for di cielo. San Nicolas a cay 150mm; Savaneta 68½m; Santa Cruz 140mm; Playa 255mm; y Noord 180mm. Na Savaneta tabatin un comedia e anochi ey y ningun hende por a bay cas. Esnan cu a bay cu auto a keda pegá den lodo. Te 1'or di mardugá tabatin hende den sala.

1937 – A ser fundá Sociedad Bolivariana.

1937 – E promé school a habri na San Nicolas.

1937 – Inauguracion di e caya San Nicolas pa Oranjestad cual a haña e nomber Loyd G. Smith Boulevard, un director na Lago entre 1933 – 1946. Despues e caminda aki a wordu expandé ta na Palm Beach. Lloyd Gaston Smith a nace na aña 1891 na Normal, Illinois y a muri 1958.

1937 – Hospital di Lago a wordu trahá y a costa dos cien miyon dollars.

1937 – Desde cu Lago a establecé na Aruba, hopi inversionnan a wordu hací door di Lago. Miyones di dollar a bay na construccion di e planta. Masha hopi Arubiano a haña trabao te cu a yega un momento cu no tabatin Arubiano mas pa traha den e refinery. Esey a haci cu mester a importá trahadornan di pafó. Esaki a haci cu no tabatin suficiente cas pa tur e hendenan aki y Lago a cuminsa traha cas den Colony y a traha e promé 150 cas na Lago Heights pa empleadonan cu a bin for di Mar Caribe. Asina Lago a sigi traha mas cas, mencioná den e siguiente añanan.

1938 – Na ocasion di nacemento di Princes Beatrix, tabatin fiesta pa muchanan di school. Pa cada school nan a ricibí, por ehemplo na Savaneta nan a ricibí 50 cen pa cada mucha, mientras cu na schoolnan di gobierno un florin. Cu indignacion Pastoor Hendriks ta mencioná e inhusticia aki. Pa pueblo mes no tabatin fiesta. Na Playa y San Nicolas nan a distribí un monton di placa pa weganan, pero e districtonan no a haña ni un cen preto. “Pakiko.....e hendenan di otro districtonan no ta subdito di Oranje anto?”

1938 – Libertador Gilberto F. Croes, nos Libertador a nace dia 25 di Januari 1938.

1938 – Rotary Club a wordu lamtá.

1938 – Rufo Wever, cu su 21 aña a cuminsa cu e trabao di cah'i orgel. E tabata e promé persona cu a cuminsa traha cilindronan pa cah'i orgel na Aruba y el a haci esaki pa 33 aña.

1939 – Dia 20 di Mei 1939, sindicato di trahadornan di gobierno a wordu fundá, esta NAAB, cu a bira SEPA y despues a bira SEPPA.

1939 – Lago a traha 75 cas na Essoville y Lagoville cu 67 cas.

1939 – Inauguracion di Club Caribe.

1939 – Despues di seis aña cu trabao duro na San Nicolas, Pastoor Exler a bay for di parokia di San Nicolas, un vacacion bon merecí. Dia 18 di April, cu e avion “De Snip” a yega Pastoor J. M. Holterman, un figura imponente di 32 primavera. Un aña e tabata pastoor di Soto na Corsow y cuatro aña di Marigot, na e parti Frances, na St. Maarten, cu e tempo ey tabata confiá ainda na encargo di e padernan Dominicano Hulandes. E parokia a drenta den un era nobo cu nan a yama “Era di e Chief”, un nomber cu su padernan kapelaan a duné algun aña despues. Pronto el a proba di no ta grandi y robusto di posturaso, pero tambe di karakter. E tabata un pastoor cu tabata bishitá su parokianonan na tur momento y tur atardi bo ta miré bistí cu su paña blanco di pastoor cu su cachó pastoor Aleman cu tabata yama “Korporal”. E tabata cana te na Seroe Blanco, masha hopi energia e tabatin pa uni su parokiananon.

1939 – Nan a cuminsa cu construccion di un school nobo na Noord, y dia 5 di Januari 1940 el a wordu bendicioná y a haña e nomber di St. Aloysiusschool.

1939 – Na 1939, door di intercesion di Pastoor Hendriks nan a traha e caminda di asfalt cu a bira e caminda principal entre Oranjestad y San Nicolas. Esaki a cambia e caracter den varios districto, especialmente Savaneta, cu no ta un bebouwde kom. Masha hopi molester di auto cu ta core duro riba e caminda ey a trece cuné un desorden di otro mundo y e hendenan mester a custumbrá cu esaki pa por a pega soño anochi of hasta scucha nan mesun combersacion.

1939 – Dia 15 di Augustus 1939, hopi hende na Savaneta a recordá Pastoor Hendriks su hubileo di 40 año como sacerdote. Petronilia Kock a drecha misa y a traha un cantidad di flor pa e ocasion. Tabatin fiesta for di Diamars mainta te Diabierna anochi. Den misa y despues den sala di recepcion tabata presente: Gobernador Wouters, Obispo Verriet, Gezaghebber Wagenmaker y hopi otro mas. Dia di Aña di La Reina a yega un telegram: “Pastoor Hendriks Aruba, Hartelijk gelukgewenscht met benoeming tot Officier in de Orde van Oranje Nassau. Wouters”. Gezaghebber Wagenmaker a bini den compania di Dr. Dussenbroek cu tabata promé landraad, e hues di Aruba y tur padernan pa entregá insignenan di e distincion aki.

1940 – Pa promé bes cu un kapelaan a keda nombrá pa San Nicolas den persona di Pader J. Berlage kende a dedicá su mihó capacidnan na e parokia te medio di 1946.

1940 - Dia 10 di Mei 1940 cos ta bira complicá den e segunda guerra mundial ora Marina Real Hulandes ta cera rond di e barco Aleman “Antilla” cerca di Malmok. E capitán a nenga pa entregá e barco y ta pegé na candela. Ainda nos por mira e barco for di e beachnan na Palm Beach. Awor e barco a bira un sitio turistico pa e turistanan mira cantidad di piscá door di e vloer di glas di e botonan. E barco a bira un bibero pa e piscanan.

1940 – Na October 1940, e oficina mayor, General Office Building, a wordu trahá.

1941 Eucharistische Kruistocht (E.K.) devotieto het H. Sacrament (devocion di sagrado sacramento) a wordu lamtá na Noord.

1941 – Ora Pastoor Hendriks tabatin 71 año di edad, el a pidi su retiro. Esaki a cay duro pé pa despedí di e pueblo di Savaneta cu tanto el a stima, pero e tabata sinti cu e no por a carga e responsabilidad pisá ey mas. El a bay Corsow caminda el a pasa su ultimo dianan. Un dia promé cu e kier a bishita Aruba pa hiba un reliqui di Santa Teresita pa misa di San Nicolas, el a haña un atake di curason. Cu Dios duné descanso.

1941 – Na 1941, Rufo Wever, den un accidente di auto ta perde su man robes. Apesar di e tragedia aki, den su bida el a superá esaki. El a keda componé. Cu yudansa di un man artificial, cu mes a diseñá, Rufo a cuminsa toca atrobe. Promé el a laga traha un man na Alemania, despues e mes a traha uno. El a adaptá su estilo di toca remarcablemente. Cu su man drechi e tabata toca e tema y parti di e ritmo, cu su man robes e tabata reforsá e harmonia tocando e tononan di bas. Cu yudansa financiero di Sticusa, Rufo a publica 15 piesa di piano. El a graba diferente disco y a presentá na radio y television. Tambe e tabatin su mesun show, “Atracciones Rufo Wever”.

1941 – Dia 18 di September 1941, Charles Brouns Sr. y su señora Marie a habri Charlie’s Bar na San Nicolas. Despues cu e tata a muri, e yiu, Charlie Jr. a sigui cu e negoshi. Despues cu Charlie Jr. a muri, su señora a sigi cu e negoshi.

1942 – Aruba Country Club a habri na Palm Beach. Esaki mas bien tabata un club di Polaconan na Aruba y ainda por mira e edificio.

1942 - A lamta Liga di San Hose na Noord, consistiendo di mucha hombernan soltero for di 14 año. Tambe tabatin Sagrado Curason, un organisacion pa homber y muhernan casá. Den e mes tempo aki a lamta Congregacion di Santisima Rosario. E meta tabata pa resa rosario tur dia.

1942 – Dia 17 di Februari 1942, e año cu Segunda guerra mundial tabata formando peligro, e promé torpedo Aleman den e hemispherio occidental a wordu lansá riba e refineria di Lago. Nan e cende y sink varios tankero na candela. Hopi hende a muri pafó di waf di Lago. Durante e Segundo guerra mundial, na Aruba Lago tabata refiná un di cada 16 galon di benzina cu e aliadonan tabata usa. Un di e torpedonan a raca cas di Sra. Cornelia Geerman di

Bernardstraat, awor Graf von Zinzendorfschool. Hopi hende di San Nicolas mester a bay keda na Playa of Santa Cruz pa motibo di e peligro.

1942 – *Despues di e Segundo guerra mundial Catoliconan Arubano, algun año despues di e guerra a dicidi pa construí un kapel di debocion na e lugar unda antes tabatin kapel di rosario.*

1942 – *E año cu e oficina di gobierno a wordu construí na Oranjestad como residencia pa e oficialnan durante Segunda Guerra Mundial. Na año 1945 el a ser usá como un hotel di gobierno. Desde October 1952 e ta e oficina principal di e gobierno insular.*

1943 – *Despues cu e Segundo guerra mundial a stabilisá, Lago tabatin 8,300 empleado di cual 800 tabata di exterior.*

1943 – *Bubali Sport Club a wordu lamtá na Noord. Otro organisacionnan tabata: Deportivo Nacional, Jong Aruba, King Bucu Jrs., Tropical Sport Club di Tanki Leendert, Jolly Girls, Noord Volley Masters, Airkem, y Valiant.*

1943 – *Verkenner na Noord a wordu lamtá.*

1943 – *Diadomingo, dia 11 di Juli 1943, Club Don Bosco na Noord a wordu bendicioná y a habri su portanan pa hubentud. Riba iniciativa di Pader A. Roghmans, e club a wordu trahá como centro social y hubenil di e parokia. Dia 15 di September di e mesun año Mgr. P. Verriet a bin instalá e promé grupo di verkenner Catolico den e club.*

1943 – *Lago a traha e planta di mas grandi, Catalyst Cracking Plant (PCAR) y a cera trinta año despues.*

1943 – *Inauguracion di Hotel Strand, despues el a cambia pa varios number, e.g. Coral Strand, Talk of the Town, etc.*

1944 – *Club Tivoli a cuminsa celebrá carnaval den nan mes circulo.*

1944 – *Dia 30 di Augustus 1944, statuut di “Noord Central” a wordu aprobá pa practicá diferente ramo di deporte. E fundador, Sr. Egbert Carrilho, a cuminsa cu Korfbal y door di e deporte aki el a bay pa basketball na año 1955. E ekipo tabata patrosiná pa Rio Club, Seven-up y desde 1963 door di Viana bao number di Valiant y na 1977 door di Dodge Lancer. E tabata un ekipo di damanan di Noord, Oranjestad, y San Nicolas. E ultimo tres añanan solamente door di damanan di Noord. Nan a participá den varios weganan local y internacional. Pa seis año largo nan a mentené e titulo maximo, entre 1969 te cu 1974. Na April di año 1975, e ekipo a haña un sla duro ora cu e fundador, entrenador y alaves manager, Sr. Egbert Carrilho a fayece.*

1944 – *Dia 29 di Februari 1944 Princes Juliana a bishitá Aruba pa promé biaha. El a bishitá Hospital Militar cu tabata net e tempo di Segundo Guerra Mundial. Princes a wordu ricibí pa Doctor Adriaan Dussenbroek, cu a fayece na año 1965, y tambe pa Gobernador P. A. Kasteel, Zuster Priorin Wynanda y Gezaghebber Isaac Wagemaker.*

1945 – *Dia 15 di Maart 1945 Lago a refiná su promé biyon barí di azeta. Na oficina principal, GOB, tabatin un ceremonia pa tur empleado y L. G. Smith, director di Lago a hiba palabra.*

1945 – *Dia 10 di Juli 1945 e edificio di Iglesia Alianza Evangelista a ser lamtá, aunque e iglesia mes a cuminsa y a reuní den otro lugarnan promé. Nan meta principal ta pa alcansá e hende den su ser intregal, es decir, su curpa, su alma of parti emocional, intelectual y su spiritu, su relacion personal cu Dios. Nan tin orientacion spiritual pa tur edad.*

1945 – *Dia 2 di Augustus pa promé biaha e año escolar a ser cerá solemnemente, anochi den teatro Cecilia na San Nicolas, pa e mucha homber y muherman cu a pasa di seis klas cu exito. Algun mucha bao guia di e cabesante di Don Boscoshool, frere Johannes a presentá un comedia. Gerald Peterson y Alma Berenos tambe tabata na Don Bosco y segun inspector*

Goslingha, e school basico di mas mihó di Antiyas. Tambe pa promé biaha despues di 14 año tropico, Pastoor Holterman ta bay cu vacacion. Pader Berlage ta re-emplacé y pader Latour ta bira su asistente.

1946 – Den tempo di Pastoor Exler tabatin un club di debate di Americanonan na San Nicolas. Dia 8 di Mei 1946, Charles Quirk y Paul Gordon a yega cerca pastoor Berlage pa papia tocante un club catolico pa Americanonan, na un base mas extenso cu e club di debate di antes. Nan a pensa tocante un asociacion cu varios seccion, segun interes di e miembronan. Di e manera aki e “Christopher Club” a cuminsa dia 11 di Juni 1946 den patio di famia Schwartz como un asociacion riba un base religioso, educativo y social cu tabata reuni tur luna. Nan a percurá pa les di catesashi pa muchanan Mericano. Despues nan a funda pa hobennan “Catholic Youth Organisation”, yamá tambe “Newmanclub”.

1946 – Un esfuerso a wordu haci pa reanudá e explotacion di oro na un manera mas moderno, sin embargo esaki no a resultá rendable. Ainda ta pensa cu Aruba tin oro.

1946 – Pastoor Holterman ta bolbe na medio di 1946 na San Nicolas, pader Bernard Jansen ta bira Kapelaan aki y pader Berlage ta bandoná e parokia pa bira Pastoor di Saba. E parokia ta perde un trahador di primera clase. E tabata un hende zeloso, sirbicial, cariñoso, cortes, un religioso excelente y colega agradabel.

1946 – Dia 22 di December 1946 e promé banco, Aruba Bank, a habri su portanan na San Nicolas.

1946 – Instalacion di e Asociacion di Camara di Comercio y Industria.

1946 – Inauguracion di Arubaanse Kunstkring of Circulo Arubano Pro Arte.

1946 – Schaakvereniging Aruba a wordu lamtá.

1947 – Dia 18 di Januari 1947, a funda un seccion di e asociacion papal di Sta. Infancia na San Nicolas.

1947 – Entre 28 di September 1947 y 11 di Januari 1948, e lidernan politico, Henny Eman sr., su yui Albert (Shon-A), y Aristedes Wever a organisá no menos cu 42 encuentro den tur bario pa compilá firma pa nos por logra nos autodeterminacion. Un total di 2147 hende a firma. Shon-A a entregá e peticion na Su Mahestad na 1948. Riba 18 di Maart 1948, durante e conferencia di Mesa Rondó el a convence Corsow y Surnam cu Aruba tin e derecho di tin un posicion extraordinario dentro di Reino. Dia 30 di Juli 1947 tambe tabatin un peticion cu a wordu entregá y firmá pa 95 firmante.

1947 – Na Juli, Pastoor Holterman a cumpra un pida tereno di Sr. Jan Hendrik Kock, banda di Lago Sport Park na Ceintuurbaan cu intencion pa traha un school di mucha homber y un cas pa frerenan.

1948 – E trabao di club di frerenan na San Nicolas ta data for di año 1948. Frere Innocentio kier a haci algo pa e hubentud cu tabata bay school ainda y a funda e grupo “St. Jansknepen”. E nomber a bin di Jean Baptist de la Salle.

1948 – Dia 18 di Maart, 1948, e delegacion di Aruba na e promé conferencia di mesa rondó a presentá un peticion na e Gobierno Hulandes pa solicitá pa un Status Aparte den Reino, apart for di constelacion Antiyano. Esaki a inducí na e formacion di cuatro teritorio insular cu propio gobernacion. Pero na Januari 1, 1986, Aruba a bira un entidad separá den e Reino Hulandes. Cu Aruba su status nobo a haci cu e Reino Hulandes tin tres componente separá; Hulanda, Antiyas Hulandes y Aruba. E gobierno di Reino Hulandes ta responsabel pa e defensa y asuntonan den exterior di e Reino. Basá principalmente riba un sistema Occidental di democracia parlamentario, Aruba ta wordu goberná door di un parlamento interno y e hunta di ministronan escogí door di miembronan di parlamento. Poder ehecutivo ta wordu tení pa e

Ministro Presidente y su gabinete. E gobernador, apuntá pa Su Mahestad La Reina Hulandes, ta un cuerpo independiente representando La Reina.

1948 – *Trabao di Wit-Gele-Kruis a cuminsa na Aruba na 1948 y a bira un fundacion independiente dia 28 di Juli 1959 bao nomber Fundacion pa higiena popular Cruz Blanco-Geel Aruba. E fundacion a cuminsa florecé manera ningun otro. Tabatin 65 miembro, 2 soeur, 2 auto. Na e promé lustro, na año 1964, nan tabatin 1460 famia miembro, 9 zuster tabata traha cu tabata usa 8 auto. Asina nan a sigi crece cu durante nan di cinco lustro tabatin 4,000 miembro, 23 nurse, 4 secretaria pa haci trabaonan administrativo y 8 wijkgebouw. Na 1965 a habri oficialmente oficina di Wit-Gele Kruis na San Nicolas, cu a haña bishita di Reina Juliana.*

1948 – *Na October 1948, a cuminsa un tempo di “The Holy Name Society” y “Liga di Santo Number” na San Nicolas, un sorto di congregashi pa hende homber pa cual tabatin hopi interes.*

1949 – *Dia 20 di Januari 1949, Pastoor Holterman a cuminsa cu “Cruz Blanco-Geel” na San Nicolas. Fuera di e cuidansa medico cu ta di balor inestimabel y na cual hopi babies ta debe nan bida y hopi anciano nan bida mas largo, e bondad cu zusteran a cria, e confiansa cu nan ta merecé y e cantidad di hora, nos no por midi. Dia 2 di October 1965, Reina Juliana a inaugurá e edificio nobo.*

1949 – *Lago tabatin 8,300 empleado; 1960 – 5,134; 1965 – 2,305; 1977 – 1,628 y menos di 1,000 na Januari 1984.*

1949 – *Sr. Casey Eman a lamta un fabrica Aruba Aloe Product Company cu ta extract e azeta aloine. Na 1951 el a producí 30% di producto mundial.*

1949 – *Inauguracion di Hotel Scala (no ta existí mas).*

1949 – *Inauguracion di Biblioteca Publico di Aruba.*

1949 – *Nan a traha misa Santa Filomena na Paradera, asina a bira di seis parokia di Aruba.*

1949 – *Dia 16 di September 1949, Sra. Francisca Henriquez-Lacle, mihor conocí como “Shon Kita” a scirbi su promé carta pa Mgr. Zeppenveldt pa pidi aprobacion pa traha Kapel di Alto Vista. Un dia Shon Kita a bay papia cu Mgr. Zeppenveldt, el a bisa Shon Kita: “Pa cabrito boso ta traha un capiya”.*

1949 – *Liga di Maria a lamta na San Nicolas. Meta tabata: Protehá bienestar spiritual di hende muhernan den parokia, asistiendo nan pa observá practica di bida catolica y educá nan yiunan den caminda di Dios. Sra. Marianita Chong tabata presidente.*

1949 – *Tabatin 49 verkenner, 72 mucha muher verkenner y 87 miembro di Club Don Bosco na San Nicolas.*

1949 – *Tin un storia cu pader Frunt, tempo el a yega San Nicolas na 1949, el a manda pastoor Holterman e noticia cu lo e bini cu “bapor di guera”. El a haña contesta: “Bonbini. Stop. Cañon di costa ta poní na posicion”. Un otro tabata un telegram di 1950, Pastoor Holterman tabata na Corsow pa un reunion, e telegram: “Mi a kibra pia. No ta bolbe”. Pastoor Frunt a contestá mesora: “Dios gracias. Stop. Diadomingo colect especial pa pia falso”.*

1949 – *Frerenan di de La Salle a tuma over St. Aloysiusschool, school di mucha homber na Noord.*

1949 – *Frere Alexander tabata e promé cabesante di school di Savaneta di mucha homber, for di año 1949 te cu 1960. El a traha tambe riba varios tereno den actividadnan parokial y tabatin un influencia enorme riba hubentud masculino. Frere Servatius tabatin un laso personal cu hopi mucha homber y nan famianan. Soeur Ludwigin, fuera di su trabao di*

school a guia e koor di misa y un grupo di E.K.; soeur Rosalie te na 1961 a prepará un cantidad di mucha pa ricibimento. Soeur Amantia, Eucheria, Serafique, tur a duna nan forza y energia na bienestar di e pueblo di Savaneta. E school di mucha homber y mucha muher, Antoniusschool y Heilig Hartschool a keda poco aña dos school mixto, te na 1974, y despues nan a bay hunto den un school grandi bao di direccion di e dinamico Jeffrouw Nina Schwengle.

1949 – Inauguracion di Centro Cultural Aruba.

1950 – Tropical Country Club a habri su edificio bao guia di Sr. Severiano Luydens. E tabata un centro recreativo, pero pa falta di cooperacion el a stop di existi.

1950 – Despues di e segunda guerra mundial Lago a sinti e necesidad pa modernisá e compania debí na e competencia den region unda ta haña e consumidornan di Lago. Consecuencia di esaki a bin un automatizacion enorme despues di aña 1950. Aki ta unda Lago a cuminsa cu su programa di lay-off. A reducí cantidad di trahador for di 8300 den 1949 (aña culminante) pa 7817 y den 1950 pa 5134, y pa 1596 den principio di 1971. Di e 1596 empleadonan, 1177 tabata Arubiano; 259 Antiyano; 44 Surinameño; 74 Norteamericanos; 13 Canades; y 20 otro diferente nacionalidad. Tambe di e 361, a forma parti di gerencia y di e total aki, 190 tabata Arubiano.

1950 – E aña cu Charles Brouns a habri Lido, Mimi Marchena a habri Marchena Bar y Hotel. Mester a drenta cu bachi den Lido. Colony tabata separá y tabata manera un “Little America”.

1950 – Dia 23 di April 1950, pader Bernhard Jansen di San Nicolas a organisá un celebracion grandioso di St. Joris pa verkennernan di henter nos isla. Despues di un sacrificio di misa na Noord un parada grandi cu conhunto di musica dilanti, cu St. Joris mes den e fila, a pasa banda di mainta den cayanan di Oranjestad y merdia den San Nicolas unda a cera e dia cu un kampvuur banda di Lago Sport Park.

1950 – Pieterboer School a wordu trahá na San Nicolas.

1950 – A inaugurá Iglesia Protestant na Playa.

1950 – Na fin di añanan '50 tabatin cinco directiva di schoolnan catolico: Stichting Catharina (soeurnan dominicanes), Zusters Franciscanes v.d. H. Antonius (Santa Cruz), Stichting Edward Michelis (San Nicolas), Stichting Bethanie (Noord), y Schoolbestuur de la Salle (frerenan). Tur tabata religioso of religiosa. Na aña 1971, e cinco fundacionnan aki a bira un solo fundacion, SKOA (Stichting Katholieke Onderwijs Aruba). Frere Bonifatius tabata e promé director. Ainda e oficina ta na Huize de la Salle.

1950 – Un urna di indian a wordu descubrí na Savaneta cu a data di 1200, mas o menos.

1951 – E chief, Pastoor Holterman, a bandoná parokia di San Nicolas. Pastoor Frunt ta bisa cu tur hende ta sinti duele di miré bay, yoramaneto no ta caba, y su cachó, Korporal, cu tanto tabata su amigo di cerca, tambe ta muri di tristesa.

1951 – Realisacion di e autonomia di Aruba. Den e aña aki a eliminá e gobierno colonial di Antiyas Hulandes y nan a forma cuatro teritorio completamente autónomo. Aruba a haña gobierno insular propio cu ta administrá su propio fondonan.

1951 – E aña cu Aruba a producí 7500 kilo di aloe of sea 30% di e Mercado mundial.

1951 – Dia 27 di Augustus, Lago a experienciá su promé welga. For di April, door di e sindicato di e empleadonan, Lago Employees' Council (LEC), e obreronan tabata pidi salarionan mas halto. Un mainta tempran, sin aprobacion di e sindicato, 3,500 trahador a welga. E Americanonan no a strike y hunto cu hopi empleado local a keda mantené e operacion di e refineria, sin embargo e produccion a baha pa un tercera parti. E empleadonan local como miembro di gerencia, nunca no a wordu permití pa uni nan mes den e sindicato y tampoco nan

por a welga, esey tabata e reglamento. E compania den purá a ofrecé 16% (Fls.12.25 mas pa luna) den nan salario, pero mas y mas empleado a uni nan mes den e welga. Empleadonan tabata furioso, hende muhernan tabata tira appelsina y mango, y otronan tabata tira botter. E welgistanan no tabata contento ora polis a tira den halto over di nan cabes. Un di e welgistanan a puntra e polisnan si e bala tabata real. E polisnan a contestá: “Claro, boso tabata tira botter riba nos”. “Si, pero e botternan tabata bashí”, e welgista a contestá. Despues di cinco dia di negociacion, e Mediador di Gobierno Hulandes a convencé e 6,000 welgistanan pa aceptá e compania su aumento den salario. E compania a bay bek den su operacion normal e ora ey.

1951 - Dia 30 di Augustus 1951, e imagen pa Kapel Alto Vista a yega, pero pa motibo cu e kapel no tabata trahá ainda, nan a poné den misa di Noord.

1952 – Dia 4 di Juli 1952, Lago a rafiná su di dos biyon barí di azeta.

1952 – Imeldahof ta un internaat catolico cu a lamta na Noord, caminda muchanan cu pa un of otro motibo no por lamta den nan mesun famia, por haña un lugar pa biba. E ta situá na pia di cero Boegoeroei y pazuid di Club Don Bosco. Tambe e tabata pa duna nan un educacion adecuado, asina cu nan por desaroyá nan mes, tanto mentalmente como fisicamente. E nomber Imeldahof ta bini for di soeur Imelda, cabesante di tur soeurnan di Bethania na Hulanda. Dia 15 di Januari 1952, siete soeur Dominicanes di Bethania na Venlo a bin Aruba pa lamta un instituto pa muchanan. Nan a tuma St. Annaschool over di e soeurnan Dominicanes di Voorschoten. Na 1954, cuatro paviljoen a keda construí y e promé muchanan por a drenta. E promé muchanan cu a bini pa keda na Imeldahof a wordu repartí den grupo di 14 y 15 den un paviljoen.

1952 – Dia 19 di Maart 1952, riba dia di fiesta di San José, Mario Lacle, ruman di Shon Kita a cuminsa traha un kapel nobo di Alto Vista. El a wordu trahá riba e mesun fundeshi y a bin cla dia 23 di Mei 1952. El a wordu bendicioná riba Diadomingo, 25 di Mei 1952, pa Mgr. van der Veen. Den capiya di Alto Vista ta keda wardá un crucificado bieuw di 30 centimeter di largura cu sacerdotenan a pone na e altar y nan tabata haci misa eyan. Ora e Misa di Alto Vista a keda isolá y bandoná, Gabriel Ruiz a bay wardé na su cas. Despues el a pasé pa su nieta Maria Johanna Ruiz. Despues el a pasa pa Maria Luydens y Francisca Henriquez-Lacle y nan a duné bek na e capiya na 1952. Tin hende ta bisa cu esey no ta e crucificado bieuw di Alto Vista, ma esun di misa bieuw di Playa na Schipau. Por ta cu Gabriel a poné na e misa ey y despues cu e misa a basha abou, Gabriel por a hibé su cas. Gabriel tabata un platero y el a nace na Corsow. Eynan el a casa cu Maria Celestina Brion, ruman di Pedro Luis Brion. Nan tabatin 8 yiu. Maria a nace na Corsow na 1786 y a muri na Aruba na 1853. Pedro Luis Brion tambe tabata na Aruba rond di 1809. Parti di e famia Ruiz cu ta biba na Aruba ta sali di Guillermo Ruiz, un platero mescos cu Gabriel Ruiz.

1952 – Nan a cuminsa cu construcion di St. Annaschool nobo.

1952 – Soeurnan Dominicanes di Betania a yega Aruba y a bay biba banda di misa di Noord.

1952 – Wilhelmina Stadion a keda inaugurá na April 1952 cu Jani Brokke huramentando na nomber di e atletanan y gobernador Strucken cu a schop e promé bala pa e promé wegá. Durante e inauguracion aki tambe a presentá un grupo di algun cien gimnasta, alumnonan di school cu un show special.

1952 – Pa ampliacion nobo e Puerto de los Caballos na Playa a haña su extension actual. E waf tin dos kilometer di largura.

1953 – Confraternia di La Birgen di Alto Visa. Tur 25 di luna tabata celebra un sacrificio di misa y cu ricibimento y un bishita na Alto Vista.

1953 – *Nan a cuminsa cu bewaarschool den St Annaschool bieuw na Noord. A cuminsa cu 70 mucha bao guia di Maria Semeleer y Ambrosia Jacobs.*

1953 – *Arubaanse Muziekschool a wordu lamtá. Despues nan a duné e honor na Rufo Wever y a yamá Scol di Musica Rufo Wever. E school aki a haña su promé director den persona di Sr. Arie Louis Born, un musico y docente di piano. Canto coral y teoria. Lesnan a cuminsa na cas di Sr. y Sra Born na Mozartstraat 3, Oranjestad, cu les di piano, fió, canto y teoria. Pronto a sigi lesnan na San Nicolas y na bungalow di Sra. O. S. Mingus, Presidente di Lago. Na final di 1955, Sra. Born a bandoná Aruba y Sr. P. N. J. Treijtel a tuma over temporalmente. Na Augustus 1956, di dos director tabata den persona di Sr. Rien Hasselaar.*

1953 – *A inaugurá Trocadero Restaurant cu bista pa lama.*

1953 – *Dia 12 di Juni 1953, e bapor Santa Rosa di compania Grace Line a bishitá Aruba pa promé biaha.*

1954 – *Na fin di aña 1954 a bin Aruba a bordo di un tankero di Lago un matros alcoholico. Via polis di Lago e persona aki por a haña contacto cu Dr. Turfboer, kende tabata trata empleadonan di Lago cu problema di alcoholismo. E matros aki a conta e dokter tur cos tocante Alcoholico Anonimo, a papia tambe mas cu un ora cu un pacient na hospital di Lago, cu tabata recuperando for di efectonan di abuso di alcohol. Esey nos por considerá e nacimiento di movimiento di A.A. na Aruba. Dr. Turfboer a yuda cu su tempo y capacidadnan lamta e promé grupo di A.A., e grupo Divi-Divi, dia 13 di September 1955. E alcoholico, mencioná ariba, a bira e promé secretario.*

1954 – *A cuminsa un instituto di Desaroyo y Formacion Popular na Noord. E meta tabata pa desaroyo di mayornan y hubentud.*

1954 – *Dia 24 di November 1954, imagen di La Birgen di Alto Vista a wordu coroná cu 78 piedranan precioso. Henter e pueblo a duna nan Mama su Corona. Tabatin pobernan cu a duna nan trouwring of otro prenda cu tabatin balor pa nan. E corona a pasa den tur parokia, riba un Diadomingo. Balor di e corona a bira Fls.4,500.00 y ta trahá pa e artista Bob Anink di Blaricum, ruman di Pader B. Anink, pastoor di Noord entre 1956-1960.*

1954 – *Imelda Hof a habri y durante e promé añanan e tabata completamente na encargo di soernan di Betania. Desde 1970 laiconan a drenta den sirbishi.*

1954 - *Lago Home Building Foundation a traha mas di 458 cas.*

1954 – *Estado colonial, 15 di December a bira e Dia Nacional di Antiyas Hulandes. Aruba a bira parti di Antiyas Hulandes.*

1954 – *A inaugurá Radio Kelkboom, e promé radio stacion di Aruba.*

1954 – *Na proposicion di Club Tivoli, tur e organisacionnan a bin hunto den un comité di carnaval cu e fin di haci e carnaval un fiesta pa celebrá anualmente. Pa promé biaha a pasa un desfile grandi den Playa.*

1955 – *Na October, Parokia di Cristo Rey a cuminsa na Brazil, di siete parokia, cual ta nificá cu un parti di parokia di San Nicolas hunto cu un parti di Savaneta a forma un unidad nobo.*

1955 – *Dia 15 di October 1955, Frere Alexander a lamta e ekipo di Rapid como un grupo di volleyball pa mucha hombernan na Savaneta. Un grupo di mucha muher a sigi poco despues. Despues Frere Servatius y Johannes a tuma over. Especialmente Frere Johannes ta esun cu hopi aña a traha duro pa hiba e club na un nivel halto.*

1955 – *Maris Stella, cas di Frerenan a lamta.*

1955 - Na November 1955 un grupo di cuatro soeur di Divina Providencia a yega San Nicolas, pa tuma over algo di e trabao di soeurnan Dominicanes. Nan tabata biba den e casita den curá di misa.

1955 – Pader Anink a funda un E.K. na San Nicolas special pa esnan di habla Ingles. Tur dos grupo hunto tabatin 50 miembro. Na aña 1961, E.K. a disparcé na San Nicolas.

1955 – Un ehemplo cu ta demostrá cla cu laiconan di Aruba a sinti nan responsabel pa mision di iglesia, tabata e fundacion di Centro Apostolico Aruba dia 31 di Augustus 1955.

1955 – Su Mahestad La Reina Juliana, durante su bishita na Aruba, a baila e promé wals cu Rufo Wever a componé, esta e wals “Arubanita”. Despues Rufo a componé otronan manera: La Encantadora, Annette cu el a dedica na su mama, Mi Aruba Stimá, Aruba, Brisas di Aruba, Aruba Tiera Bunita, Mambo di Aruba, y Aruba Dushi Tera cu el componé hunto cu su amigo, Padu Lampe. Durante Rufo su bida, el a producí mas o menos 400 composicion den diferente ritmo manera wals, tumba, bolero, samba, mambo, porro, merengue, danza, polka y mazurka. Ademas e tabata un areglista.

1955 – Aruba Sport Unie (ASU) a ser fundá. Un organisacion pa tur deportistanan, clubnan, y bondnan pa participá den tur ramo di deporte. Normalmente competencianan tabata wordu tení pa un siman largo. Nan tabata eligí Reina di Deporte, Figura Deportivo. Por ehemplo, na 1955, Julian Pemberton tabata e promé Figura Deportivo y Srta. Aida Jacobs na 1957 e promé Reina Deportivo y tin asina hopi pa mencioná.

1955 – Den e eleccion di eilandsraad dia 13 di Juni 1955, Partido Patriotico Arubano (PPA), tabata e ganador cu 14,414 voto y mas 9,627 rechtzetel.

1955 – Dia 15 di November 1955, e escudo di Aruba a wordu aprobá pa Parlamento di Aruba. E escudo a wordu diseñá pa Artelier na Hulanda e mesun aña.

1955 - E promé barco di turista “Tradewind” a drenta waf di Playa. Di 1956 pa 1970 Prudencial Grace Line cu tabata bini cu carga, a cuminsa bini cu barconan crusero tur siman. Na 1970, 142 barco crusero a bin; na 1956 3000 tursita a bishita Aruba; na 1968 52,000 y na 1970 tabatin 75,042.

1955 – A inaugurá un restaurant flotante, “Bali Restaurant”.

1955 – For di cuminsamento di existencia di emisoranan, iglesia tabata presente den cas di hende via radio. Oracion di mainta of anochi, charlanan tocante religion of doctrina cristian, lesnan di bijbel, program pa enfermonan, pa hobennan, transmision di sacrificio di misa of bendicion na fin di aña. Na aña 1955, Centro Apostolico Aruba, un grupo di maestra y maestronan, cu a caba di regresá Aruba pa traha pa nan pueblo, na varios ocasion a tuma encargo pa un programa na radio, manera na ora di Promé Santa Comunion, dia di enfermonan, etc. Lastimamente e grupo ey no a sigi despues di 1965.

1955 – Mas o menos 55 aña pasá, Gezaghebber Dr. L. C. Kwartz a decretá cu no mag tira clapchi den menos di 250 meter for di hospital ni durante servicio di misa. E tempo ey San Nicolas a wordu prohibí tiramento di vuurpijl. Tambe e tempo ey gezaghebber, diputadonan y tambe hefenan di departamentonan di gobierno y funcionarionan publico cu puestonan halto den gobierno, tabata ricibí nan regalo di Lago den forma di un cena di Pasco cu show especial, ofrecí pa Lago pa e bon cooperacion entre nan dos. Esaki tabata tuma lugar na Golf Club, Easo Club y despues na Aruba Caribbean Hotel. Tambe Lago tabata cende su Cat Cracker cu tabata un bista masha bunita.

1956 – Na 1956 tur parokia hunto a cuminsa ricibí algun share for di Landsloterij. E placa tabata destiná pa esnan menos fortuná, y pa partié tan bon posibel, a lamta dia 16 di Januari, fundacion di Sint Dominicus Liefdewerk. Directiva di e fundacion ta parti e placa

igualmente ba0 di ocho parokia. E suma tabata mas o menos tres share di Fls.2,500.00 pa aña, no ta algo di gaba. Directiva a manda un peticion pa gobernador di Antiyas pa por haña algun share mas, pero nunca a haña contesta. Pa yuda, pastoor tin cu pone placa acerca for di entrada di misa.

1956 – Gobierno a habri un “nutriculture farm”, tin bes tabata wordu jamá “Hydroponics Farm” na Paradijs. Despues di un fracaso, e tabata bao guia di Sr. B. Kamps y awor Fantastic Garden ta ocupá e lugar.

1956 – Na Dublin, Irlanda, Sr. Frank Duff, cu a muri na 1980, a funda Legion di Maria, dia 7 di September 1921. Aruba a forma e apostolado na Aruba na aña 1956. Awor den cada parokia tin un grupo, nuebe en total, di cual Savaneta y San Nicolas ingles ta existi mas cu 25 aña.

1956 – A establecé un A.A. na Noord, bou guia di Sr. Antonio (Tony) Semeleer, cu e meta pa yuda e personanan kita for di alcohol. E mesun aña aki a lamta Union Hubenil Noord cu tabata un sesion di Jeugdcentrale La Salle. Nan tabatin un team di futbol hopi activo y pa motibo di baymento di Frerenan y e presidente, Sr. Pedro Figaroa pa Hulanda e organizacion a stop di existí.

1956 – Na San Nicolas tabatin un coro grandi di mucha muher cu tabata carga e nomber di “Vivons en Chantant”. Despues a incluí hende homber tambe.

1956 – Pastoor Standenmeijer a lamta Legion di Maria, un grupo cu ta un bon yudansa den parokia di Savaneta, riba tereno di apostolado bao di enfermeronan y ancianonan. Dia 9 di Mei 1956, nan a tene nan promé reunion. Tur siman tabata bini hunto pa resa y pa duna relato de trabao cu nan a haci, den nan parokia y otronan. Dia 4 di Mei, e seccion Ingles a keda fundá den presencia di pastoor de Haas, pader Anink y pader van der Maas.

1956 – Dia 26 di Juni 1956, St. Annaschool nobo a wordu bendicioná y na 1958 el a haña dos lokaal acerca.

1956 – Aruba Volleyball Association a wordu lamtá. Na aña 1974, Sr. Fredis Refunjol tabata Secretario.

1957 – Dia 10 di Maart, Mgr. Holterman, como e Obispo nobo, a bishitá San Nicolas pa promé biaha oficialmente. Esey a bira un homenahe entusiasma “na nos pastoor cu a bira monseñor”. Henter e parokia tabata riba pia pa muestra e ex-pastoor con contento nan tabata cu su halsamento na e puesto halto di Obispo. Miles y miles di hende a bini hunto for di extremonan di San Nicolas y polis mester a tuma medidanan particular pa mantené orden pa motibo di e trafico enorme cu tabatin. Ora Monseñor a drenta misa, tabatin un batimento di man espontaneo y largo. Idiomanan den e parokia aki por a trece un distincion den e parokianonan, pero e entusiasmo y alegria a mara nan tur hunto. E recepcion a tuma lugar den curá di Filomenacollege, koor di Vivons en Chantant, bao di direccion di Sr. Bongers y banda di frere Pedro a percurá pa musica. Hopi hende prominente a dirigi palabranan elocuente na Mgr.

1957 – Un grupo di 16 soeur Franciscanes di Aruba a yega Aruba riba peticion di soeurnan Dominicanes, pa tuma over un parti di nan trabao. Hopi yudansa e soeurnan aki por a duna na desaroyo di cuida medico, tanto den hospital como den barionan. Ora nan a yega Aruba, hospital San Pedro tabatin lugar pa 90 pacient. Den curso di añanan esey a crece bira 220. E hospital nobo, “Dr. Horacio Oduber” tin lugar pa 270 pacient. Na San Pedro Hospital, soeurnan a cuminsa cu cursonan pa nurse y ziekenverzogster. Tambe soeurnan Franciscanes a bolbe lamta y expande trabao di Wit-Gele Kruis, loke a crece y a bira un fundacion cu varios oficina den tur districto y mas o menos 4,000 miembro. Nan a cuida ancianonan, trahando den Michael Paviljoen y awor Maris Stella bou Stuchting Bejaardezorg Aruba (S.A.B.A.) cu ta cuida

awor 130 anciano. Otronan ta traha cu personanan handicap of mentalmente retardá. E grupo mas grandi di soeur na Aruba tabata 42 na aña 1962. Awor nos tin 15 (dos Arubiano) cu ta keda na convento di Santa Cruz.

1957 - Aña cu Sr. Henny Eman Sr., lider di AVP a fayece. Shon "A" Eman, su yiu a tuma over e partido.

1957 – Tabatin siete zuster na San Nicolas. Despues di instalacion di "Nos Cas Pa Mucha Chikito" na 1958, nan a traha "Rayo di Solo" y e school di mucha chikito "Arubanita".

1957 – Na aña 1957, algun famia di Tanki Leendert a bay ta pertenecé na parokia di Playa y e linea di particion entre Noord y Playa a bira e linea di Ponton pa Hato.

1957 – Dia 25 di Mei 1957, Niño Hesus tambe a haña un corona di oro. Pastoor J. Burgemeester cu asistencia di pastoor Anink, pader B. Fick y pader C. v/d Looy a haci e ceremonia den kapel di Alto Vista.

1957 – Na aña 1957 Pastoor Holterman ta bira Obispo di Willemstad.

1957 – Na September 1957, Sr. Rien Hasselaar, director di Scol di Musica" a lamta "Arubaanse Oratoriumkoor".

1957 – Dia 15 di Februari 1957 a inaugurá Hotel Basiruti, e promé hotel di piso abou di Palm Beach y tabata pertenecé na Sr. Ch. J. Neme. Pa yega na e beach aki mester a pasa riba un caminda di santo. Ora e lugar a bira un lugar turistico y pa hacié mas atractivo, un boulevard a wordu construí di Playa pa West Punt. E boulevard aki a costa 1.3 miyon florin plus gastonan di iluminacion di Fls.175,000.00. El a wordu inaugurá dia 1 di Mei 1958.

1957 – Pa motibo di binimento di fabricanan y hotelnan, a construí un Planta di Awa entre 1957 y 1959.

1957 – Na Maart 1957 Lago a cuminsa cu su Lago Scholarship Foundation.

1958 – A lamta St. Annastichting na Noord y e meta tabata pa yuda esnan menos fortuná.

1958 – Na aña 1958, "Katholieke Verkenner" na Aruba tabata conta cu mas o menos 800 verkenner y welp. Hopi persona cu a bin traha aki fo'i Hulanda como polis, maestro of marinero, tabata guía e gruponan, hunto cu varios persona di Aruba mes. Casi tur parokia tabatin verkenner. Pastoor tabata actua como aalmoezenier y tabata frecuentá e gruponan. Na 1965, Aruba a haña su propio comisario di districto. Promé Aruba ta cay bou Corsow. Aruba tin su mes fundacion. E ta miembro di fundacion Antiyano hunto cu Corsow y Boneiro.

1958 – Princes Beatrix a bishitá Noord dia 11 di Februari 1958.

1958 – Tur school tabata usa "Catechismo", un buki di catishashi cu masha hopi pregunta y contesta. Muchanan mester a siña dies pregunta tur dia. Segun esey, bo tabata haña un cifra pa "Religion" riba bo raport. Den añanan 1963-1968 nos a usa un buki catishashi di nos mes dioceses, pa cada klas un otro buki, bunita ilustrá y hopi mas adaptá na nos muchanan.

1958 – Dia 15 di November 1958, e teatro "Cultureel Centrum" a habri y "Arubaans Oratoriumkoor" a canta na e apertura bao di direccion di Sr. Rien Hasselaar, director di Scol di Musica. Dia 10 di December 1958, Arubaanse Muziekschool a duna su promé presentacion di alumnonan den Cultureel Centrum.

1958 – Dia 1 di Februari 1958 Princes Beatrix a bishitá Aruba pa di promé biaha

1958 – Pader Erkamp y parokianonan di San Nicolas a crea e grot di Lourdes na Seroe Preto, na San Nicolas. E aña ey tabata un aña importante pasobra tabata 150 aña pasá cu La Birgen a aparecé dilanti di Bernadette. Mgr. Holterman a bendicioná e statua di La Birgen cu a pisa 700 kilo. Sra. Maria Geerman a hunga un rol importante den desaroyo di e grot aki. Su deseo tabata pa wordu derá den e mesun caha cu a carga La Birgen y su deseo a wordu cumplí. Elmar a zorg pa un palo di lus permanente, asina cu e statua por keda iluminá henter anochi.

Tur aña, riba 11 di Februari (fiesta di Lourdes) un procesion ta sali for di misa Sta. Theresita na San Nicolas pa e grot, unda tin un sacrificio di misa. Dia 10 di December 2004, na edad di 83 aña, Mgr. Holterman a fayecé na Nijmegen, Hulanda. El a traha 50 aña na Antiyas y Aruba. El a traha 9 aña na San Nicolas y 12 aña na Playa. Su entierro a tuma lugar na Nijmegen, Hulanda, dia 16 di December 2004.

1958 – A lamta e Scol di Muziek, fundacion “Teatro” situá den L. G. Smith Boulevard. E Fundacion Teatro Arubano “Mascaruba”.

1958 – Turismo a cuminsa en grande na Aruba.

1958 – Lago a duna un tereno cerca di su concesion e nomber Seroe Colorado, y tambe yamá Lago Colony.

1959 – Dia 9 di Februari 1959, Lago a refiná su di tres biyon barí di azeta.

1959 – Dia 19 di Mei 1958, Mgr. Holterman ta pone e promé piedra pa e misa nobo di Savaneta y dia 5 di September 1959 y ta bendicioná e misa nobo solemnemente y festivamente., Esey ta tempo di Pastoor Standenmeijer.

1959 – Dakota a haña su misa di La Birgen di Fatima, cu a bira un total di ocho parokia na Aruba. Kapelnan ta: Alto Vista, Emanuel na San Nicolas, Monte Calvario na Tanki Leendert, Cristo Sufriente na Madiki, Santa Famia na Pos Chikito, Sitio di Oracion Dr. José Gregorio Hernandez, Centro Educativo Cristian, y Centro di Blue Army.

1959 – Huishoudschool a cuminsa den dos lokaal di St. Annaschool na Noord. Nan a keda eynan te na aña 1972, ora cu nan a bay e edificio nobo na Montaña cu a haña e nomber “Paso Sigur Huishoudschool”.

1959 – Dia 18 di Juli 1959, a inaugurá e promé hotel di piso halto, Aruba Caribbean Hotel cu a costa ocho miyon florin.

1960 – Dia 29 di Januari, Credit Union Santa Theresita na San Nicolas a iniciá cu 35 miembro cu despues di un aña a bira na 253 miembro. Bao direccion di Sr. Ferdinand Groeneveldt e organisacion a bira esun mas grandi di Antiya Hulandes na 1962 cu 650 miembro.

1960 – Dia 2 di Juni 1960, Credit Union Sagrado Curason a cuminsa na Savaneta. Na 1964 e ta haña un sla duro, pero gracias na e trabao di Juffrouw Bets de Kort cu a rebibé bek, cu despues ta bira un di e mihornan di Antiyas.

1960 – Na Colegio Arubano tabatin e sistema cu den añanan ’60, catoliconan tabata haña les di un pastoor, protestantnan y un domi.

1960 – Na fin di decada ’60, ora 30 di Mei a sosodé cu nan a kima Punda, turistanan Venezolano a cuminsa bin bishita Aruba cu mas frecuencia. Barco crucero a cuminsa bin y asina San Nicolas a drenta den un largo periodo di descandencia economico. Hopi comerciante a move bay Playa unda turismo y mas poblacion tabata duna mihor oportunidad di crece.

1960 – Den e periodo di aña ’60, no solamente a bin modernisacion na Lago, pero tambe el a bira un di e promé refinarianan cu a haña computer pa instalá den e plantanan y movimiento di azeta, cual e empleadonan mes a manehá nan. Lago a sigui reducí su empleadonan, pero e produccion a keda halto y hasta el a competí cu refinarianan di Esso mes. Lago su meta tabata pa baha e cantidad di empleadonan pero sigui producí e mesun cantidad di azeta. E produccion a subi for di 230 mil barí pa 440 mil barí pa dia, esun mas halto na aña 1965. Durante e periodo aki Lago mester a traha varios planta di Hydrogen Sulfide pa baha e azufre den e azeta y e plantanan aki a wordu trahá riba un lagoen gedempel. Aki ta unda Aruba a crece den tamaño. Den e periodo aki tambe Lago a contratá masha hopi contratista pa traha

den e refinaria y hopi cu a laga Lago y bin traha bek pa contratistanan, hacienda e mesun trabao.

1961 - Dia 12 di April 1961, a wordu lamtá na Noord, Antilliaanse Meisjes Gilde (A.M.G.). E ta un organisacion catolico di hubentud na Antiyas cu tin como meta pa yuda su miembronan pa bira cristiannan formal y adultonan cu por respalda nos comunidad den tur sentido.

1960 – Cooperativanan di Spaar y Fiansa (Credit Union) a lamta na Aruba. Pader Römer, cu e a promové e sistema aki na Corsow, a animá hendenan di Aruba pa haci mescos. Na 1960 a lamta nuebe cooperativo na Aruba, un den cada parokia y ademas un pa chaffeurnan di taxi.

1960 – Aruba Chemical Industries ta cuminsa opera cu mas o menos 71 trahador.

1961 – A lamta Independent Oil Workers Union representando e trahadornan di Lago.

1961 – E busto di Lloyd Gaston Smith a wordu inaugurá.

1961 – A bin un mulina completo pa restaurant y club nocturno “Oude Molen”. E mulina aki a wordu cumprá na Groningen, Hulanda.

1961 – Dia 1 di September 1961, Jan Bezems a bira cabesante di St. Aloysiusschool na Noord hacienda esaki un school dirigi pa laico.

1961 – Credit Union a wordu lamtá na Noord. Esaki ta pa duna e hendenan oportunidad pa spaar.

1961 – AMJG (Antilliaans Jongens En Meisjes Gilde) a cuminsa cu nan actividad na Aruba. E tempo ey e tabata yama AMG, pasobra mucha muhernan so por a bira miembro. Den promé añanan tabatin 50 leidster y mas cu 300 miembro na Oranjestad, Noord, Tanki Leendert, Paradera, Sta. Cruz, Dakota, y San Nicolas.

1962 - E gran fundador y lider di PPA. Juan E. Irasuquin a fayece.

1962 – E promé villa a wordu construí na Malmok. Un lugar cu antes tabata un lugar isolá a wordu transformá den un di e lugarnan di biba di mas exclusivo na Aruba.

1962 – A cuminsa un comision di mayornan, na Noord, bao guia di Jan Bezems. Despues el a bira inactivo y na aña 1973 el a bolbe wordu lamtá.

1962 – A lamta Noord Social Club y su meta tabata pa duna recreacion na e pueblo di Noord. Depues cu e organisacion a caba, e edificio a bira Club Gardenia.

1962 – A wordu lamtá na Noord, Liga di Famia, casnan di miembro di A. A.

1962 – Jolly Girls, un team di volleyball di Noord, a wordu lamtá na aña 1962 door di Angela Tromp y Jona Roza. Nan entrenadornan tabata Hendrik Ponson y Kenneth Alias.

1962 – E 150 Hudionan di Aruba cu tabata pertenecé na e rito asquenazi, a construí nan propio sinagoga, Beth Israel na Playa.

1962 - Na Januari 1962, Arubaaanse Muziekschool a haña un director nobo, Sr. Alfons J. Seyler.

Na 1962 Aurora Kleuterschool a habri su portanan den e cas Tanki Leendert 275 caminda nan a keda te dia cu e kleuterschool nobo a bin cla. Nan a pone e promé piedra dia 5 di Juni 1977 y nan a dreña nan school nobo.

1963 – Trabaonan di e Club di damas, “Camelia” a cuminsa na San Nicolas. Nan meta tabata pa atendé cu interesnan científico y social di su miembronan y ademas di yuda tanto posibel hubentud y esan cu ta den necesidad.

1963 – Inauguracion di e waf industrial na Barcadera.

1963 – Nos promé televisora nacional, Telearuba, a cuminsa dia 29 di September 1963 riba Canal 12, como un seccion di Telecuracao cu ya tabata operá pa tres aña. Pa motibo cu

Venevision na Venezuela ya tabata usa Canal 12 y cu tabata interferi señal di Telearuba, nos a haña obligá pa cambia pa Canal 13.

1964 – Calypso contest a cuminsa na Aruba. Na Aruba e tradicion aki a cuminsa cu e cantantenan: Lord Cobashi y Lord Boxoe.

1964 – “Stichting Kindervakantiewerk Aruba” (SKA) a haña su origen na San Nicolas tempo cu e damanan Filomena Wong y un grupo a yega na un idea pa percura pa un medio sano pa muchanan di casnan cu ta den circunstancianan dificil.

1964 – Construcción di Kapel Emanuel na San Nicolas a cuminsa na September 1964 y dia 25 di Maart 1965 Mgr. Holterman a bendicioné. Na 1983 nan a pone e altar central.

1964 – Fundacion “Het Geestelijk Gehandicapte Kind” a lamta. Esaki a cuminsa prepará un pasadia (dagverblijf) pa muchanan mentalmente atrasá.

1964 – Inauguración di dos hotel den Oranjestad, Hotel Central y Hotel Cactus Inn.

1964 – Na Augustus 1964 cinco lamchi di cabrito ta nace mes dia y di e mesun mama. E doño di e cabrito tabata Sr. Maximo Krozendijk.

1965 – Bowling na Aruba no tabata conocí promé cu Aruba Tivoli Club a cuminsa cuné mas di 30 aña pasá. No a tarda mucho cu Lago (Aruba Esso Club) a cuminsa cu Bowling tambe y a construí nan Bowling Alley. E entusiasmo den e deporte aki a crece asina tanto den e añanan cu a sigi cu na 1965 S.V. Caribe tambe a construí nan Bowling Alley. Dia 9 di September 1966, un grupo formá door di Bowlerman di Aruba Esso Club, Aruba Tivoli Club, y S.V. Caribe a dicidí pa forma un bond, cu for di e tempo ey a wordu yamá A.R.B.A.S. (Aruba Bowling Association). E tarea di e bond aki tabata pa promové e deporte aki den tur sentido. Esaki a resultá den un logro grandi. Na September 1973, A.R.B.A.S. hunto cu C.U.B.O.A. (Corsow) a forma un Federacion Antiyano di Bowling (N.S.B.O.F.E.), cual organisacion na su turno a bira miembro di F.I.Q., e federacion mundial di Bowling.

1965 – Na September 1965 a construí Kapel Emanuel na San Nicolas, tempo Pader Bernardinus van Baars tabata pastoor di San Nicolas. E Arquitecto Virgilio Kock a diseñá e kapel den forma di e letter “V”. Dia 25 di Maart 1965 el a wordu consagrá pa Mgr. Holterman, Obispo di Willemstad.

1965 – Mgr. a dicidí pa muchanan no ricibi promé cu 2e klas, pasobra den 1e klas nan tin mucho problema cu tur cos nobo na school; e idioma y hopi otro cos cu ta exigi atencion.

1965 – Mayoria di e organisacionnan aki a lamta e mesun tempo cu Consehonan Parokial, por ehemplo: Asistencia Social, Ayudo Parokial, St. Vincent de Paul Society, y meta y trabao ta tur igual. ARSCA (Arubaanse Raad voor Sociale en Charitieve Arbeid) ta coordiná diferente actividadnan.

1965 – Dia 19 di Januari 1965, Lago a refiná su di cuatro biyon barí di azeta.

1965 – Dia 7 di December 1965, e promé reunion di “Conseho Parokial Sta. Theresita a tuma lugar.

1966 – Inauguración di Hotel Manchebo Beach.

1966 – A forma Federatie Antilliaanse Jeugzorg, kring Aruba. Pastoor Erkamp a bira presidente. Hopi fundacion y organisacion social, educativo, cultural, y medico cu tabata traha cu hubentud, a bira miembro. For di November 1981, kring Aruba tin su mes oficina na Dakota. Sra. D. Booi-Staring ta coordiná tur trabao, ta duna conseho na miembronan y ta intermediá. Tambe e ta organisá tur aña bendemento di stampia pa mucha.

1966 – Cu apoyo di pader Jac. Janssen “Grupo di A.A. (Alcoholicus Anonymus) di San Nicolas a tene nan promé reunion dia 23 di Februari. E persona di contacto y lider di San Nicolas tabata Sr. Marcial Kock.

1966 – Trio Los Arubeños a wordu fundá pa Rey Lampe y tabatin como integrantenan Roly Werleman y Chinto Geerman. Despues Roly a bay studia den exterior pa mecanico y su ruman Catey a re-emplacé. Pa e siguiente 13 aña nan a toca hunto y Chinto despues mester a sali pasobra e no por a cumpli cu compromisonan debí na trabao di warda. A acercá Mario Croes pa forma parti di e trio y constelacion aki ta existí te dia di awe. Un trio di cual cada integrante a ricibí condecoracion na aña 1994 pa nan perseverancia y promocion di nos cultura y formacion como trio. Nan a toca masha hopi biaha den exterior y a producí un CD navideño algun aña pasá cu a wordu considerá un di e CDnan clasico mas bunita di Pasco. Na añanan '50 tabatin como 30 trio na Aruba y algun di nan tabata: Trio Los Madrigales, Trio Los Conquistadores, Trio San Rafael di San Nicolas y Trio Quisqueya, Trio Los Aventureros, Trio Caribe, Los Romanceros di rumannan Koolman, Boysie Croes y su Trio Oriental, Etty Toppenberg y su Trio Huasteca, cu tey ainda.

1967 – Partido AVP cu ocho asiento hunto cu UNA, PIA, PRO cu tres asiento a forma e gobierno, unda e maestro di school, Sr. Betico Croes (AVP) a bira Diputado di Enseñansa. Despues di e problema di 30 di Mei 1969 na Corsow, Sr. Ernesto Petronia di PPA tabata e promé Promé Ministro di Aniyas Hulandes.

1967 – Na aña 1967, Srta. Bernadina Richardson a cuminsa cu Coro Hubenil na Savaneta, cu a lamta 1966 como grupo di aguinaldos. Sirbidornan di misa tabatin hopi cos di haci den liturgia anticuá. Nan tabata bisti manera sacerdotenan chikito cu toga, superpli of roket.

1967 – Noord a haña un kleuterschool nobo cu a wordu bendicioná dia 31 di December 1967. Su number tabata Cayena Kleuterschool.

1967 – A lamta Region di Maria, na Noord, pa miembronan cu ta resa y otronan activo. Tambe a lamta Jeugcentrale Washington, un mission Evangelista, na Noord. E ta conocí tambe bao number di Centro Hubenil Washington, un lugar pa recreasion y campamento, etc.

1967 – Inauguracion di Aliance Francaise.

1967 – City University di New York a habri un centro di investigacion na Aruba, pa arqueologia y antropologia.

1967 – Un epoca nobo a cuminsa na San Nicolas cu binimento di e kapilaan nobo, A. Heyliger, cu a nace na St. Eustatius, como promé sacerdote Antiyano.

1967 – Na December 1967, Mgr. Holterman a duna permiso pa ricibí santa hostia riba man. Sin embargo, esnan cu ainda kier acceptá e santa hostia riba nan lenga, a sigi manera costumbrá, basta no pensa cu esey ta mas santo.

1967 – Den tempo di Pastoor Vismans, parokianonan na Savaneta a saca un boletin “Savanoticia” pa un forma di evangelsacion. Esaki a sali pa di promé biaha dia 1 di September 1967. Savanoticia a sali regularmente te na Maart 1970, ora cu Sr. Donny Christiaans cu den e tempo ey tabata presidente di Consejo Parokial, a bay laga parokia di Savaneta pa biba otro caminda. Na Maart 1972, Savanoticia a sali atrobe y e ta sigi duna informacion riba tereno religioso, riba tereno di bijbel, educacion y bida cristian. Na 1974 Savanoticia a publicá e lecturanan cu a ser tení den misa cu ta trata di un of otro aspecto di responsabilidad.

1968 – Aruba Sheraton & Casino a habri. Awor e ta Aruba Grand Hotel & Casino.

1968 – “Conseho Parokial” ta ser mencioná pa promé biaha den Savanoticia, e noticiario di Savaneta y ta consistí di un comision pa actividadnan, un comision pa Asistencia Social y poco despues un comision pa mantencion di misa. “Asistencia Social” cu a nace for di Consejo Parokial y a bira un fundacion riba su mes na Juni 1970 cu e miembronan: Efraim de Kort, Boei Rafini, Hypolito Tromp, Mario Angela, Shon Té de Cuba, Duchí Cicilia y Lee de

Kort. “Organisacionnan pa Hubentud” cu nan troeplokaalnan bon mantené ta verkennen y welp, padvindter, y kabouteran por a existí, gracias na e poco personanan cu ta dispuesto pa duna nan tempo liber pa hubentud. Personanan manera: Jan Meelis, varios miembro di famia Christiaans, famia de Kort, y e rumannan Nina y Tila Schwengle.

1968 – Na October 1968, e kapel Cristo Sufriente na Madiki a keda cla y dia 1 di December Mgr. Holterman a bin bendicioné. Sra. Maria Tromp tabata e motor tras di e idea pa traha un kapel pasobra el a sinti falta di un cas di oracion. Hopi biaha el a constatá cu casnan di famia no tur ora tabata e lugar adecuado pa resa rosario cu un grupo di hende, manera nan tabata haci tur Diamars. Maria Tromp y algun otro dama a pidi pastoor Erkamp. El a contestá nan: “Pakiko semper ta pastoor, boso mes por hacié”. Nan a acceptá e desafío ey.

1968 – Country Club Noord a wordu fundá pa Sr. Pedro Tromp. Dia 18 di Februari nan a inaugura nan edificio situá na Saliña Cercá, un organizacion tanto social como deportivo.

1968 – Desde 1968, shampoo di fragante di crema di seda y deodorante efectivo a wordu trahá pa Aruba Aloe Company.

1968 – Na December e asociacion di damas “Magnolia” a cuminsa na San Nicolas cu 19 miembro bou presidencia di Sra. Elvira Quant-Goeloe. E ta consistí di famianan Boneriano.

1968 – Na fin di aña 1968, Arubaanse Muziekschool a crece te na 886 alumno cu e tumamento den servicio di un docente nobo pa A.M.V., Sra. Maybelline Croes.

1969 – Segun un ley cu tabata existí fo’i tempo di antiguo, Iglesia tabata nenga cierto hendenan entiero catolico. Antes iglesia lo tabatin su motibonan pa traha e ley aki. Dia 9 di Februari 1969, Mgr. Holterman, proclamá den un carta pastoral a haci e cambio aki. E motibo mas principal tabata cu ora hende no ta haña entiero catolico, fielman di nos diocesis ta considerá esey como un condenacion publico di e defunto, mientras su parientenan ta sintié como un berguensa cu ta cay riba henter e famia, mienras nan no ta culpable na conducta di e defunto. Ta imposibel cu Iglesia kier mantené un ley cu en realidad ta perhudicá amor cristian. Tur defunto cu pa medio di bautismo ta pertenecé na Iglesia catolico, y cu no a bandoná Iglesia publicamente, lo por haña un entiero catolico.

1969 – Nan a pone un estatua di doctor pafó di cas bou di un dak, na unda hendenan tabata bin resa y na aña 1972 un capilla na e mesun lugar, cu debotonan mes a yama “Sitio di Oracion Dr. José Gregorio Hernandez”.

1969 – Inauguracion di Hotel Holiday Inn y Hotel Divi Divi.

1969 – Aruba Zwem Bond a wordu lamtá y e statutonnan a wordu aproba na 1971.

1970 – Na aña 1970, nan mester a basha e misa bieuw di Savaneta abou, un monumento historico, un di e edificacionan mas bieuw di Aruba a bay perdí. E misa a keda bashí pa basta tempo te cu el a cuminsa basha aden y a un bira un peligro.

1970 – Dia 10 di April, Sr. Alex Hoo a sali eligí como e promé presidente laico na San Nicolas, Sr. Diogenes Martis vice-presidente, Max Kock como tesorero y secretaria Mederica Albus y hunto cu pastoor van Veen nan a forma e directiva diario.

1970 – Dia 26 di Mei 1970, a wordu fundá Centro di Bario Noord. E promé piedra a wordu poní na aña 1973 y dia 21 di April 1974 el a wordu habrí oficialmente. Hopi cursonan a wordu duná y varios deporte ta wordu practicá. Nan organisa dos feria: Feria Famoso II y III. Tur aña nan ta tene campamneto pa e muchanan di Noord.

1970 – Wit Gele Kruis a habri nan edificio na Noord pabao di misa. Den e edificio aki consulta ta wordu duná na mayornan cu baby.

1970 – Sitio di Oracion na Honor di Dr. Jose Gregorio Hernandez a cuminsa na Monserrat, Noord.

1970 – Den ultimo década mas bien clero catolico di Aruba a laga tende su voz den conflictonan social, welga y tambe na ora di cierto evento politico. Asina, por ehemplo, Pastoor Erkamp hunto cu domi metodista y protestant a laga tende nan stem durante welga di maestronan di school na April y Mei 1970. Nan a pidi VLA (Vakbond Leerkracht Aruba) y Bestuurscollege pa bolbe cuminsa papia cu otro. Den misa di Playa nan a lesa un declaracion, riba cual un di e partidonan a reaccioná. Na aña 1972 tempo cu ANAAB tabata den conflicto cu Bestuurscollege, clero a muestra su comprension pa derechonan di e sindicato, ma a pidi di su banda comprension pa henter e comunidad, cu a keda privá di su facilidadnan di mas necesario di bida (entre otro coriente). Despues clero a elogiá e manera cu e presidente di e sindicato a tene su miembronan calmo, cu no a haci uso di violencia. Tempo di referendum na 1977, un sacerdote y un domi tabata miembro di hoofdstembureau. Den asunto di FALPA un grupo di padernan a protestá na 1983 y a considerá libertad di expresá bo opinion como un derecho democratico. Por ultimo na October di e mesun aña clero a desaprobá den un declaracion extenso desaroyo politico na nos isla. El a condená violencia di palabra, agresividad excesivo, cu ta dañá derechonan di un hende of grupo di hende y ta boga atrobe pa libertad di expression y respet pa un y tur.

1970 – Den promé añanan di nos diocesis, varios pastoor tabata haci uso di e semanario catolico na Papiamento “La Cruz” pa publicá tur sorto di articulo, palabra pastoral y noticia parokial. Lastimamente, na Maart 1970 el a caba di existí y a bira “Mensahero” y despues di poco luna no a sali mas.

1970 – Inauguracion di Hotel Victoria.

1971 – Despues di e reduccion di personal na Lago, un total di 2140 tabata empleá pa varios contratista na aña 1971, pues mas cu e trahadornan cu a keda cu Lago. Pa suma: 1596(di Lago) mas 2140 (contratista) ta 3736 trahadornan den Lago e tempo ey.

1971 – Aruba a iniciá su lucha pa su libertad desde 9 di Februari 1971, fecha cu a funda e partido Movimiento Electoral di Pueblo (M.E.P.). E meta primordial di e partido aki tabata pa kibra e cadena di esclavitud di 12-8 y trece e libertad tan anhelá pa e pueblo di Aruba. Por corda ainda e cumbre politico entre e islanan Antiyano pa por a convencé nan di e hecho cu e constelacion Antiyano no ta un unidad berdadero y no ta faborecé Aruba. E persona clave cu Betico a apuntá pa concretisá e ideal aki tabata su man drechi den lucha, esta Sr. Nelson Orlando Oduber, e tempo ey Diputado emcargá cu cultura. No tabata facil, no por ta asina cu na cuminsamento di introduccion di himno y bandera tanto na Antiyas y Aruba a bochorná nos simbolonan di libertad. Aunque nan a yama e bandera pa bandera di MEP, ata tur otro isla awe tin nan propio himno y bandera. E inspiracion di Betico no tabata por nada.

1971 – Dia 14 di October 1971, Lago a refiná su di cinco biyon barí di azeta.

1971 – Na December 1971, Sr. Seyler, e director Arubaanse Muziekschool desde 1962, a regresá Hulanda.

1971 – A inaugurá Fundacion di Museo Arubano.

1971 – Dia 12 di September 1971, Aruba Karting Club, a wordu fundá, aunque preparacion a cuminsa for di Juli 1971 y a logra aprobacion di su statutonan.

1971 – Den 47 aña e poblacion di Aruba a crece di 8700 na 1924 pa casi 60,000 na 1971.

1971 – E barco di crusero di mas grandi di mundo e tempo ey, Queen Elizabeth II a drenta nos waf na Playa.

1971 – Na Augustus 1971, Kukwisaschool a habri na Pos Chikito

1971 – Cu excepcion di tempo di Auroa, misa di 5'or di mardugá no a sigi mas. Un di e motibonan tabata cu hopi hende ta wak television te laat of bay fiesta te mardugá. Esey a haci cu misa no tabata bon atendí. Na luna di April 1971, despues di a consultá pastooran y consehonan Parokial, Mgr. Holterman a introducí e misa di Diasabra anochi. Dia 13 di Mei, 1972, por ehemplo nan a celebra e promé misa riba Diasabara anochi. E cambio aki a resultá hopi positivo pa hopi hende.

1971 – Na aña 1971 “Wit-Gele Kruis” a habri su oficina nobo na Savaneta. Nan a haci uso di warda di polis, y despues na e cas Savaneta 62. “Casa Cuna” cu e incansable Louisa Koolman como mama di yiunan incontabel.

1972 – Un grupo di sacerdote y laiconan di Aruba y Corsow a bini hunto na December 1972 y Augustus 1973 pa un Curso di creatividad comunitario. Cuaresma 1974 clero di Aruba a saca un pamfleta “Na tur hende di bon boluntad”, un yamada pa pone man na obra, drechando casnan den mal estado. Dia 1 di Juni 1974 tabatin un reunion di esnan cu tabata interesá pa yuda, y asina nos por considerá e fecha ey como dia di nacemento di Drecha Cas Aruba. E movimiento aki a bira un fundacion dia 26 di Februari 1975, y tabata consistí di tres grupo di hobennan di Savaneta, San Nicolas y di Noord.

1972 – Desde aña 1972, parokianonan di Aruba a bin cu un Accion di Cuaresma pa nos spaar algo for di nos boca pa duné na un bon doel, sea na Aruba mes of pafó di Aruba. Entre 1972 pa 1983, masha hopi instancia a wordu yudá pa e accion aki.

1972 – A wordu construí un school basico na Tanki Leendert cu a habri su portanan na September 1972, bao guia di Felix Flanegin. Cu nombramento di Felix Flanegin como cabesante di Ora Ubao na September 1972, di Chin Figaroa como cabesante di St. Annaschool na Januari 1973 y di Betto Figaroa como cabesante di St. Aloysiusschool na September 1974, tur e schoolnan basico di Noord a bin bao guia di maestronan di Noord mes. Tambe Cayena Kleuterschool ta bou guia di Juffrouw Francisca Duarte, un juffrouw di Noord mes.

1972 – E director di Arubaanse Muziekschool nobo, Sr. Sjoerd van der Meulen, cu a reemplasá Sr. Seyler kende a regresá Hulanda na December 1971.

1972 – Dia 14 di Mei, 1972, a cuminsa cu un sacrificio di misa bao overdekte di school na Pos Chikito, tur Diadomingo mainta. Dia 12 di September 1972, a lamta un comision “Centro Parokial Pos Chikito y Sabana Basora”. E comision aki a cuminsa cu hopi brio bao direccion di Sr. Robby de Kort, pero parce cu nan a perde animo un poco. Un problema tabata pa haña un pida tereno. Na 1975, Pastoor Fick a bini na Savaneta y esey a trece un cambio den e projecto. Ora e comision a bolbe haci un sondeo unda mayoria tabata preferá un kapel enbes di un centro. Na aña 1976 a bini un statuut cu awor ta indicá cu ta e ta bira Kapel Pos Chikito y Sabana Basora. A bin un directiva nobo y via un encuesta, pueblo a scohe e nomber “Santa Familia”, cu Mgr. Ellis a aceptá. Mgr. a planta un cruz pabou di Kukwisa School, caminda den futuro cercano e kapel lo wordu construí. Asina cu permit tabata cla, nan a cuminsa cu contruccion di e kapel.

1972 – Santa Oleo no ta mata hende, e ta duna un poco alivio. Na November 1972, Papa Pablo VI a decretá un ceremonia simplificá, asina cu awor solamente frenta y mannan ser huntá, y no manera antes: wowo, horea, nanishi y boca.

1972 – Dia 24 di april 1972, Comision di Mayornan na Savaneta a wordu lamtá. Nan ta organisá varios actividadnan manera anochi pa mayornan, recreacion pa muchanan den vakantie; a recaudá placa pa regalá school un mesa grandi pa handenarbeid y pa drecha wirenan rond di curá. Un di e presidentenan tabata Sra. Flora Webb.

1973 – Na November 1973, pasadia Bebito Pin a habri su portanan y dies chikitin por a bay eynan. E grupo di San Nicolas por a mezcla cu otro gruponan, di manera cu pariba di brug esun di Savaneta so a keda existí.

1973 – Na Januari 1973, durante periodo di Sr. Sjoerd van der Meulen (1972-1974), como director di Arubaanse Muziekschool, a cuminsa cu lesnan den School di Arte na San Nicolas.

1973 - Dia 18 di Mart 1973, despues cu Betico Croes no kier a participá mas den combersacionnan cu Hulanda, el a lamta un protesta net cu e Comision di Reino tabata na Aruba. Un Wilhelmina Stadion yen cu 6 pa 8 mil hende pa sugerí na nan cu nos kier nos Status Aparte dentro di Reino.

1974 – Na aña 1974, 50 cas di pueblo a wordu trahá na Pos Chikito.

1974 - Na Januari 1974, nan a cuminsa na Savaneta cu un grupo di homber grandi, cu yama Asistentnan Den Liturgia of Acolythnan. Nan ta esnan cu ta yama parokianonan bonbini na cuminsamento di e celebracion, ta anuncia e intencion di misa, ta splica tema di lecturanan, nan ta lesa epistel, ta organisá colect, ora no tin colectantnan di custumber, nan ta pone ofrendanan riba altar, y ta ricibi hunto cu sacerdote bao di ambos figura di pan y biña. Meta di e grupo aki ta: asistí na altar durante sacrificio di misa y demostrá cu religion ta un cos serio pa adultonan.

1974 – Blue Army a lamta na aña 1947 na Merca, door di Mgr. H. Colgan di New Jersey ora el a recuperá milagrosamente di su malesa y a cumpli cu su promesa di plama debocion na curason imaculado di Maria. Color blau a bira e simbolo di La Birgen di Fatima. Na 1974, Blue Army a lamta na Aruba cu algun miembro. Sra. Rita Kock tabata e promé presidente. Na 1981, Rita y su casá Adres Kock a bai biba na e centro y ta ricibi gruponan pa actividadnan apostolico. Tin un biblioteca cu bukinan religioso y educaivo, filmlokaal airecondicioná cu por acomodá 40-50 hende y cu tambe por wordu usá pa tene conferencia.

1974 – Restauracion di Fort Zoutman a tuma lugar. Intencion tabata pa restaurá Willem III Toren tambe, pero e contratista a constatá cu trabaonan di boramento di muraya y vloer por causa cu e toren por basha abou.

1974 – Concientisacion por ta un palabra poco difcil, pero e kier bisa mas o menos cu nos mester bira mas conciente. Riba tereno religioso esey ta nificá: cu nos mester ta cristiannan conciente, catoliconan combencí. Pa e motibo aki, Mgr. Ellis a scirbi den su carta pastoral di dia 20 di Januari 1974: “Iglesia ta desea awor mas cu nunca, un bon preparacion pa esnan cu ta bay ricibi e sacramentonan” Confirmacion no ta haci un excepcion y ta existi cu e candidato ta motivá. Un bon preparacion bo por wel di lubida ora confirmacion ta riba mesun dia cu recibimento, cu ta hala tur atencion. Esey tabata un di e motibonan pakiko na aña 1966 a ser dicidi pa muchanan chikito no confirmá mas, pero esunnan mas grandi den 6e klas. Pa nan tin mas tino pa nan sa kiko ta confirmacion. Bo ta confirmá bo bautismo. Confesion no a wordu kitá, manera hopi hende ta kere.

1974 – Dia 20 di Augustus 1974, Mgr. Ellis a splica na Telearuba y tambe el a predicá den misanan cu si mayornan cu no ta haña necesario pa duna bautismo un lugá conciente den bida, y cu pa un of otro motibo no ta aceptá e invitacion pa haña instruccion promé cu bautismo di nan yiu, nan lo haña conseho pa posponé e bautismo.

1974 – For di aña 1974, tur pacient di Lago tambe mester a bay San Pedro Hospital. Vicariato apostolico di Willemstad, desde 1958 yamá diocesis Willemstad tabata doño di e hospital. E rector di hospital tabata na mes tempo director general tambe. Dia 29 di December 1960 fundacion Ziekverpleging Aruba a lamta. Obispo a keda presidente; Dr. Nuboer a bira

director general. San Pedro Hospital a keda existí te November 1976, te dia hospital nobo, Dr. Horacio Oduber hospital cu 270 cama a habri su portanan. E ora ey e fundacion a bira independiente di diocesis, cu tin solamente un representante den dje. Tambe tin situá riba e tereno di San Pedro Hospital, Michael Paviljoen cu for di aña 1958 tabata hospedá 30 anciano. Te cu aña 1976, e tabata cay bou fundacion Ziekverpleging Aruba. Ora hospital a move pa Eagle, el a keda y tin lugar pa 40 persona.

1974 - Savaneta tabatin un grupo di Kabouter.

1974 – For di April 1974, Maris Stella a bira cas pa esnan cu ta den anochi di nan bida, bao di direccion di Zr. Leonie Ruiz.

1975 – Na April 1975, MEP den eleccion a saca diestres di e bintiun asiento den gobierno.

1975 – Na September 1975, School Dununman a habri, tambe pa 12 alumno di 12 te cu 16 aña di Sjabururi. Esnan mas grandi so a keda.

1975 – A cuminsa den Centro di Bario Nood un cresh pa muchanan di 2 -4 aña.

1975 – Dia 5 di Maart 1975, Promé Ministro, Sr. Nelson Orlando Oduber a cuminsa su carera politico na Aruba. El a afiliá den e partido di nos Libertador, Sr. Gilberto Francois Croes, Partido Movimiento Electoral di Pueblo y te awe despues di 30 aña ta dirigí e mesun partido geel.

1975 – Dia 4 di Maart 1975, Sr. Benny Nisbet a cuminsa su carera politica den PPA y te awe ta dirigí e partido oranje.

1975 – Aña cu Rufo Wever a ricibi e condecoracion “Ridder in de Orde van Oranje Nassau” di La Reina Juliana.

1976 – Dia 16 di Maart 1976, despues cu Bestuurscollege a nombra un comision pa conseha nos riba nos himno y bandera. Eilandsraad a aprobá e proposicion y a proclamá “Aruba Dushi Tera” como Himno Nacional di Aruba. Dia 18 di Maart e bandera a wordu hisá pa promé biaha den un grandioso inauguracion official di e himno y bandera den Wilhelmina Stadion.

1976 - Na aña 1976, San Nicolas a bira un ghost-town, cu varios tienda a cera definitivamente. Dos dama comerciante a tuma e curashi di bay rond den caya principal pa busca sosten pa haci algo pa San Nicolas. Nan a pidi Sr. Tico Arends (di Brenchi) pa bira e presidente tanten cu nan ta percurá pa cos draai bon. A organisá e promé campaña di Pasco cu un premio pa esnan cu bai cumpra na San Nicolas. Esaki tabata un exito. Asina e San Nicolas Business Association a wordu fundá door di un grupo di negociante e siguiante aña cu Sr. Tico Arends como presidente.

1977 – Dia 25 di Maart 1977, un referendum a wordu tení unda Arubianonan por a dicidi pa nan futuro den Reino.

1977 – Riba iniciativa di Mgr. v/d Veen Zeppenveldt O.P. nan a funda aki na Aruba e instituto di voogdij “St. Martinus Stichting”. Meta tabata pa cuida permanente hobennan menor di edad, cu ta keda paden of pafó di internaat pa mucha, y en general proteccion pa esnan menor di edad. Na 1977, e tabatin voogdij riba 38 mucha, 17 di nan tabata biba cerca nan mayor(nan), 15 den un famia di criansa y 6 mucha cu tabata biba na Imeldahof.

1977 – S. Michiel de Jong, a guia e Arubaanse Muziekschool te cu Juli 1977. E ora ey Arubaanse Muziekschool a haña su promé director Arubano, Sr. Efraim Continho. E tabata duna les di diferente instrumento di supla. Cu e muchanan na cual el a cuminsa duna les na April 1978, el a forma na November di e aña ey e orkesta hubenil “Concert Band”. Ja na December e orkesta a duna concierto na diferente school. Tambe e tabatin un coro hubenil di

13 pa 19 aña. Na Augustus 1979, el a cuminsa cu un coro mixto “Agrupacion Vocal Aruba” Na 1980 el a retirá for di Arubaanse Muziekschool.

1977 – Dia 30 di December 1977, Rufo Wever a fayece. Aruba y Antiyanan Hulandes a perde un di nan musiconan mas grandi, e pionero di e musica y cultura moderno di Aruba.

1977 – Tur pareha cu a casa despues di aña 1977, conocé Centro Educativo Cristian bon, situá na Boerhavestraat, enfrente di Postkantoor. Clero di Aruba a introducí na November 1977, “Preparacion pa Matrimonio”. Eynan nan a tene nan preparacion pa matrimonio durante dos Diadomingo atardi. For di aña 1969 Centro Educativo Cristian ta un fundacion. Su meta ta: “Ariba peticion di Obispo mantené, dirigí, y explotá e Centro como centro di formacion den e sentido di mas amplio”. Antes e edificio tabata un school (St. Dominicus College bieuw), ma despues di construccion di un school nobo, el a para bashí. Na aña 1965, Mgr. Holterman a dicidi pa drecha e edificio y preparé pa Cursillos di Cristianidad.

1977 - Tanki Leendert Jeugdcentrum a wordu kimá.

1977 – 150 cas di pueblo a keda cla na Noord. Nan ta situá na Turibana.

1977 – Na Augustus 1977, e accionnan heroico cu a pone Hulanda scucha Aruba y tambe e firmamento di protocol di Willemstad di 20 di April 1978.

1978 – A lamta un fundacion formal pa personanan invalido di Aruba, yamá: FUNARI.

1978 – Tabatin un misa pa muchanan di Madiki na ocasion di Aña di Mucha y un misa solmn hunto cu Mgr. Ellis, dia e kapel Cristo Sufriente a recordá su di 10 aña di existencia.

1979 – Dia 15 di Februari 1979, Lago a refiná su di seis biyon barí di azeta.

1979 – E team di volleyball di Centro Bario Noord a sali campeon di Aruba.

1980 – Sr. Hans Hermans a traha como director di Arubaanse Muziekschool pa dos aña.

1980 – Na Maart 1980 trabaonan di restauracion di Willem III Toren a cuminsa y na October 1983 nan a keda finalisá y entregá. Motibo di tardansa tabata e hecho cu mester a cambia e pleister cu no tabata wanta riba e murayanan. Awendia Fort Zoutman a bira Museo Arubano y e personanan cu a duna nan aporte na e restauracion tabata: Srs. Jan H. Beaujon, ex-presidente di Fundacion Centro Cultural Aruba y ex-Diputado Ernesto Petronia y asina Aruba a haña su museo historico.

1981 – For di aña 1981, colect riba Diadomingo di Pentecoste ta sirbi pa cubri gastonan di programa mensual di Iglesia Catolico na Telearuba “Hende No Ta Biba Di Pan So”. Pa cada program mester paga Fls.500.00.

1981 – A bin cu e comision di Reino, sigí pa e promé Conferencia di Mesa Rondó na Den Haag na 1981 cu no a resultá exitosamente. A nombra un comision di 7 experto cu e meta pa prepara e di dos Conferencia di Mesa Rondó.

1982 – Despues di Sr. Hans Hermans, un otro Arubiano, Sr. Ruben Geerman, a bira director di Arubaanse Muziekschool y a keda pa un aña.

1983 – Kapel Cristo Sufriente di Madiki a haña su forma actual di cruz na Juni 1983.

1983 – For di Augustus 1983, Sr. Eric Ellis, como e promé laico y Arubiano, tabata duna les di religion na Colegio Arubano. El a studia Teologia na Tilburg, Hulanda.

1983 – Den e eleccion di dia 25 di April 1983, MEP a logra mas voto (20,000) cu nunca antes, net un paar di luna despues di Conferencia di Mesa Rondo. El a logra diestres asiento. Durante un fin di siman ora MEP a organisá, cu cierto hende a bisa tabata ilegal, un polis Curasoleño, a tira Betico den barica cu su pistol. Despues di tratamiento aki na Aruba, e mester a bay Miami pa sigi cu e tratamento.

1983 – Dia 18 di November 1983 Aruba a celebrá hunto cu Mgr. W. M. Ellis den misa di Playa, e 25 aniversario di diocesis. Tabata un sirbishì bunita, celebrá pa tur clero, religioso, y

representantenan di tur parokia y grupo di iglesia catolica di Aruba. Tambe a keda invitá representantenan di otro iglesianan y di gobierno. Durante 1958 pa 1983 no a trece pa nos ningun sacerdote Arubiano. Ta tarea di henter comunidad catolico pa resa y traha pa e meta aki. Despues cu tempo nos ta mira cu nos ta hañando padernan Arubiano.

1983 – Hulanda a nenga pa duna Aruba e garantianan primintí pa por bira independiente na un forma responsabel.

1983 – Den Eilandsraad di Aruba e comision pa prepara nos structura estatal a aceptá dia 24 Januari 1983 y 24 di Februari 1983, mocionnan pa manda un delegacion consistiendo di tur partido politico y gremionan den comunidad cu e instruccionnan necesario y cu un gran cantidad di condicion pa bay negociá na e Conferencia di Mesa Rondó na Den Haag, Hulanda, di dia 7 pa 12 di Maart 1983. Na e conferencia aki, e delegacion Arubano encabesá pa Betico Croes a defende e interes Arubano den un forma mahestral. A aceptá resolucian di Aruba pa haci uso di su derecho di autodeterminacion, door di scoge definitivamente pa independencia, cu mester wordu realisá na aña 1996. Pero promé cu esey lo tin un conferencia di evaluacion pa examiná e fecha di independencia.

1983 –Dia 12 di Maart 1983, den e conferencia di mesa rondó na Den Haag, Hulanda, nos Libertador y Estadista, Gilberto Francois Croes y tur socionan den Reino (Hulanda, Gobierno Central di Antiyas Hulandes y otro gobiernonan di otro islanan) a combiní pa duna Aruba su Status Aparte den Reino. For di Januari 1, 1986, e Reino ta consistí di tres socio, Hulanda, Aruba, y e cinco islanan. Aruba a keda parti di e Reino Hulandes, pero cu lasonan estrecho cu Hulanda, sin cu mester di Gobierno Central di Antiyas Hulandes pa manehá su asuntonan.

1984 – Na aña 1984, directiva di Arubaanse Muziekschool a bolbe acercá Sr. Hans Hermans pa dirigí e school. El a haci esaki te cu Augustus 1985. E aña aki a bin un discusion si mester cera porta di Arubaanse Muziekschool pa motibo cu a corta den e subsidio cu e school tabata ricibi di Gobierno Insular, y Sticusa a stop cu e ayudo financiero na school. Tabata di lamentá, mirando e bon trabao cu a haci durante e añanan anterior.

1985 – Lago Oil & Transport Co. Ltd. a cera su portanan na Maart 31, 1985 pa motibo cu demanda pa producta a mengua; inversionnan mucho grandi tabata necesario pa instalacionnan y modernizacion y esakinan tabata mas costoso cu traha un refinaria nobo y e ultimo motibo tabata cu Venezuela no kier a sigi duna Lago petroleo na e prijs barata.

1986 – Reunion di Mesa Rondó entre Hulanda, Antiyas, y Aruba cu a culminá den e Status Aparte.

1986 – Aruba a haña su Status Aparte dia 1 di Januari 1986.

1986 – Dia 26 di November 1986, nos Libertador Gilberto Francois Croes a fayece na Hulanda. E morto a wordu trecí pa Aruba unda e entiero a tuma lugar. E defunto ta sosegá den un kelder den santana na Sta. Cruz.

1986 – Hulanda tabatin Aruba bao control te na aña 1986 cu excepcion di un periodo chikito entre 1805 y 1816 tempo cu e Inglesnan a dominé durante e Guerra Napoleon.

1988 – Dia 10 di September, Arubaanse Muziekschool a celebrá nan 35 aña di existencia. Dia 27 di October, tabatin un celebracion na Cas di Cultura. Gobernador, Su Excelencia Sr. Felipe B. Tromp a duna un discurso spontaneo despues di e concierto na e publico presente y a recomendá hobennan di Aruba pa sigi les na e school. Sr. Irwin Provence tabata director e tempo ey.

1989 – Orkesta Hubenil di Arubaanse Muziekschool a duna diferente presentacion cu coronan di Venezuela y Corsow na Cas di Cultura, Buurtcentrum Savaneta y na San Nicolas.

Na Januari 1990 e orkesta hubenil a biaha pa Venezuela pa duna presentacion hunto cu dos coro cu a haci e invitacion. Tambe Sra. Diet Booi-Staring a celebrá su 25 aña como miembro di Stichting Arubaanse Muziekschool. For di 1987 te cu 1990 e tabata presidente di directiva. Na 1991, despues di 26 aña den directiva, el a tuma su retiro. Dia 22 di Juni 1991, Stichting Arubaanse Muziekschool a nombré como Miembro Honorario.

1989 – Dia 18 di April 1989, pa 9:30am, Sr. Martinus S. (Chago) Leo (qepd) a duna Sr. Looi Koolman cu tabata riba contract trahando den Laboratorio den e refineria y tambe como un bon contacto cu Gobierno e tempo ey, un nota masha importante den e apertura di e refineria Coastal. E nota tabata a base di un reunion cu Chago tabatin cu Sr. Steve Obmen, un contacto cu a bin Aruba door di Coastal. Chago a pidi Looi pa lesé pasobra el a purba pa haña contacto cu Ministro Daniel Leo pero no a logra pasobra Ministro Leo a bay Caracas hopi malo. E nota tabata scirbí pa Chago cual tabata splica cu Coastal, un compania di North Coast U.S.A. tabata interesá y masha serio pa habri e refineria cuminsando cu 100,000 B/D y nan kier papia cu Promé Ministro. Tambe nan kier a haña un copia di e studio di factibilidad cu Sr. Monzon a traha. E ora Chago a dicidí pa Looi yama Promé Ministro Sr. Nelson O. Oduber. Como un Savanetero Looi cu hopi bon contacto cu Ministro Fredis Refunjol, tambe un Savanetero, a dicidí pa e Ministro pasa e palabra pa su Promé Ministro. Sr. Refunjol a bisa Looi cu pakiko e no a yama Promé Ministro Sr. Nelson Oduber directo. Ora Promé Ministro a haña e mensahe, un lus berde a cende y aki ta unda e bala a cuminsa lora pa e negociacionnan a cuminsa entre Gobierno y Coastal. Chago su ultimo palabranan riba e nota ta bisa: “Esaki ta last opportunity” y pa tuma contacto cu Sr. Steve Obmen, aunque tabatin dos mas cu a bini pa negociá, esta Srs. Michael Renfrew y un tal Green.

1989 – Dia 19 di October 1989 un acuerdo a wordu firmá entre gobierno y Coastal Corporation of Texas pa re-apertura di e refineria di Lago na 1990 pa procesá 150,000 barí di azeta pa dia.

1990 – Pader Juancho Pilongo tabata pastoor di Savaneta desde comienso di '90. E a sigi Pader René Villamora cu a bay na misa Santa Anna, Noord, kende a sigi Pader Bruno Fick.

1991 – Cifranan di Censo di October 1991 ta mustra cu Savaneta tabatin 7273 habitante na comienso di añanan '90 y un total di 2029 cas. Di e 7273 hendenan aki, 3611 tabata homber y 3662 tabata muher y 6073 tabata nací na Aruba mes y 1200 den exterior.

1991 – Coastal Refining a tuma over e operacion di Lago y a continua pa extendé door di e compania nobo, El Paso Natural Gas Company.

1992 – Dia 18 di November 1992, alumnonan di Arubaanse Muziekschool a toca tres obra musical pa La Reina Beatrix durante su bishita na Scol di Arte.

1993 – Dia 10 di September 1993, en coneccion cu di 10 aña di existencia di Arubaanse Muziekschool, a trece na November e musical “Un Soño Musical” den Cas di Cultura. Na aña 1994 e banda Y.M.T. (Young Musicians Together) a duna aporte na e musical “E Herencia”.

1994 – Museo di Antiguedad di Aruba a wordu fundá pa Sr. Juan Mario Odor y su famia dia 8 di Augustus 1994, y ta contené den dje piesanan di un balor historico sin igual. Famia Odor tambe tin un coleccion di placa antiguo, cual por wordu catalogá como e mas Grandi den Caribe. Esaki por wordu mirá na Museo Numismatico, banda di e bus stacion na Playa. Señora Ines Odor, viuda di Mario, y su yiu, señora Ines y su casá señor Victor Rasmijn actualmente ta manehá e museonan aki.

1994 – Na October 1994, a cuminsa cu e proyecto di PUDRENA na Departamento di Agricultura. Cria y Pesca na Santa Rosa. Den cuadro di esaki entre otro ta haci inventarisacion di e terenonan bieuw di aloe. Ta describí ki sorto di mata ta crece riba tereno di aloe. E

cantidad di aloe cu tin ainda riba nan y den ki condicion e aloenan ta, pa haña sa con e terenonan aki a desaroyá den curso di añanan.

1995 – *Hotel Marriott & Stellaris Casino a wordu inaugurá dia 4 di Juli 1995.*

1996 – *Na Augustus 1996, Sr. Irwin D. Provence, director di Arubaanse Muziekschool a tuma su retiro. Su sucesor tabata Sr. Felix R. (chucho) Hoek.*

1998 – *Dia 19 di Maart, 1998, Sra. Hyacintha Henriquez, administradora desde 1973, a celebrá su 25 aña den servicio cu Arubaanse Muziekschool.*

1998 - *Dia 10 di September 1998, a celebrá su 45 aña di existencia. Riba e dia aki a cambia e nomber di e school pa “Scol di Musica Rufo Wever”. Tabatin un programa cu discurso di e.o. director, presidente di directiva, Sr. Elgin Juddan y Ministro di Cultura, Sra. Lili Beke-Martinez. Anochi e ministro a develá e portret di Rufo Wever (q.e.p.d.). Despues di e ceremonia e ministro a habri e exposicion, dedicá na Arubaanse Muziekschool y Rufo Wever, den e sala di exposicion di Cas di Cultura.*

1999 – *Na December 1999, Scol di Musica Rufo Wever a duna su concierto estudiantil di fin di aña bou nomber di “Chispa Musical”. Na Junii 2000 e concierto di fin di aña escolar a haña e nomber “Brisa Musical”.*

1999 – *Segun calculacionnan di Oficina Central di Estadistica, Savaneta tabatin mas o menos 9,000 habitante y alrededor di 3000 cas.*

2000 – *Dia 19 di Maart 2000, e docentenan y directiva di Scol di Musica Rufo Wever a tuma despedida di Sra. Hyacintha (Chinta) Henriquez durante un comemento masha animá. El a traha 27 aña na e school.*

2000 – *Comision di Fondo 2000 di Parokia di Savaneta a traha incansablemente pa cuatro aña largo pa lamta mas di Fls.100,000.00 necesario pa financiá renobacion di Misa Sagrado Curason. E renobacion tabata den cuadro di e celebracion di 100 aña di existencia di e misa.*

2000 – *Dia 15 di September 2000, tabata un dia grandi y glorioso cu Parokia Sagrado Curason di Savaneta a celebra cu el a haña pastoor (Helling) cien aña pasá y a bira un Parokia di Diocesis Willemstad. E celebracion a cuminsa pa 6:30 di anochi cu un Santo Sacrificio di Misa Solemn, celebrá pa Pader Juancho Pilongo di Savaneta, tur pader di Aruba y padernan invitá di exterior y tambe Vicarion General di Diocesis, Pader Carlos Donata y Secretario di Obispado Pader Coby Henricus (di Pos Chikito). Coro Mixto y Coro Alegria Hubenil a canta e misa na Latin y alaves canta cancionnan na Papiamento na honor di Sagrado Curason. Despues a sigi cu un brindis riba parkinglot dilanti di misa, sigí pa un anochi cultural cu actuacion di gran cantidad di grupo.*

2000 – *Populacion di Aruba tabata 90,506.*

2000 – *Rufus Holding N.V., un compania di Licores Aruba N.V. a tuma over e compania di Aloe.*

2000 – *Na Februari 2000, preparacionnan pa yega na un curriculum pa e Scol di Musica Rufo Wever a cuminsa door di Sra. Annemarie Proveyer-Groot di Departamento di Enseñansa, seccion Desaroyo di Curriculum, hunto cu e director y docente di musica, Srta. Tica Giel.*

2001 – *Den luna di Augustus 2001, a cuminsa cu renobacion di e piso, ariba, di Cas di Cultura, na unda Scol di Musica Rufo Wever tin su facilidadnan pa duna les. E facilidadnan a wordu financiá pa UNOCA y Stichting Arubaanse Muziekschool. A agregá dos kamber extra, uno pa duna les y e otro pa sirbi temporalmente como un deposito.*

2001 – *Dia 20 di Juni 2001, tabatin un concierto “Brindis di Canto” na School Santa Anna, Noord.*

2002 – Na aña 2000 Scol di Musica Rufo Wever tabatin 500 alumno. Manera tur e añanan, tabatin presentacion di alumnonan na Cas di Cultura, Noord, y Santa Cruz. E conciertonan tabata: “Brindis di Canto”; *Brisa Musical*”; *Chispa Muscial*”; *Un Merdia di Guitara*”; “*Concierto Dominical*”; “*Matinee di Guitara*”; y “*Dos Evento di Musica*”.

2002 – Dia 6 di December 2002, *La Trattoria el Faro Blanco* restaurant a habri oficialmente, despues di diferente cambianan cu a wordu haci.

2002 - Durante Augustus, na San Nicolas, e Scol di Arte a move pa Centro Santa Theresita.

2002 – Dia 14 di Augustus 2002, Sra. Laurencia de Cuba, cariñosamente conocí como “Nechi”, a cumpli su 106 aña di edad. E tempo ey, ta considerá e ciudadano mas bieuw di Aruba. Pastoor Juancho di Savaneta a celebrá un Santo Sacrificio di Misa cu a tuma lugar na Mari Stella unda Nechi ta keda. Su famia, personal y clientenan di Mari Stella tur a celebrá hunto cu Nechi. Nechi e aña ey a cumpli 22 aña den Mari Stella. Su sobrina a conta cu Nechi no ta sufri di colesterol, presion halto, of sucu. Su edad halto ta atribuí na e cumindanan natural cu el a come durante su infancia. Dia 10 di Mei 2002, Maria Maduro, kende tambe ta den Mari Stella, a cumpli 105, di dos persona mas bieuw di nos isla.

2003 – Dia 1 di September 2003, a drenta un epoca nobo den enseñansa di musica na Scol di Musica Rufo Wever. Despues di hopi aña di discusion, a bin cu un curriculum pa nos scol di musica. E docentenan lo cuminsa aplica loke nan kier siña nan alumnonan riba tereno di muscia segun e curriculum di nan materia.

2004 – Dia 7 di Mei 2004. Minister di Enseñansa y Labor, Su Excelencia Sr. Fredis J. Refunjol a huramentá como Gobernador di Aruba. El a bira e di tres gobernador, despues di Srs. Felipe Tromp y Olindo Koolman, respectivamente. Den Heilige Martha Kerk na Hulanda tabatin un ceremonia di bendicion pa e gobernador nobo y su famia, Sra. Clarette Refunjol-Lopez y nan yiu muher. Tabata presente Minister Plenipotenciario Sra. Ella Tromp-Yarzagaray, Promé Ministro di Antiyas, Mirna Louisa-Godett y su casá, miembro di Tweede Kamer, John Leerdam y diferente funcionario halto di Hulanda.

2005 – Dia 5 di Maart, Prome Ministro, Sr. Nelson Oduber a cumpli 39 aña den politica.

2005 – Datonan ta indica cu Aruba su poblacion ta 98,829. Di e total aki tin 51,646 hende muher y 47,183 hende homber. Esey kier meen cu tin 4,463 hende muher mas cu hende homber. Hende muher ta biba mas largo cu e hende homber. E expectativa di bida pa hende muher ta 76 aña, mientras pa hende homber ta 70.

2005 – Dia 28 di April 2005 N.V. Arubaanse Wegenbouw Maatschappij a cumpli 45 aña y Albo Aruba N.V. a cumpli 25 aña, dos contratista grandi na Aruba di Sr. Henk Bijen. Henk a traha como Metselaar na Boneiro, rond di aña 1974 cu Albo Bonaire. Ora cu el a bin establece na Aruba, un di su prome proyecto tabata e construccion di Hotel Vakschool Bushiri cu despues a bira Bushiri Hotel. Dia 31 di Maart 1985, ora Lago a cera y hopi hende a perde confiansa den nos economia, accionistanan di e compania di Henk a cumpra Arubaanse Wegenbouw.

2005 – Dia 14 di September 2005, un corant nobo “Solo di Pueblo” a sali riba mercado.

2005 – Dia 21 di September Fundacion SAMBA (Stichting Alcohol Misbruik Bestrijding) a cumpli 50 aña di existencia.

2005 – Elmar N.V. a celebra su 55 aña di existencia. E unico compania di distribucion di electricidad na Aruba.

E Autor ta reconoce cu gratitud permiso di e siguiente doñonan reserva pa copia materialnan for di nan obranan:

*Sr. Eloy Koolman, Rooi Koochi #10-A, pa su recursonan
Historia di Alto Vista – p. fr. R. H. Nooyen o.p. Vic. Prov.
Millefiori di Aruba – R. H. Nooyen
Savaneta Antes y Awor – Pastor G. van Veen
St. Theresa’s San Nicolas 1931 – 1971 – Pastor G. van Veen
Aruba A Name Legend – Tochy Kock
Aruba Breve Historia – Dr. J. Hartog
Scol di Musica Rufo Wever 1953 – 2003
Ken Ta Arubiano – Luc Alofs en Leontine Merkies
Iglesias di Aruba, 25 Aña Na Caminda, Edicion di Consejo Pastoral di Aruba
Buki Conmemorativo di Parokia di Noord 1777 – 1979
Aruba, Eiland der Eeuwige Lente – Island of Eternal Spring – William C. Hochstuhl*

Dedica na mi amigo, Sr. Tino Ruiz, pa su sosten y apoyo di semper

***Gradicimento na un y tur cu di un manera of otro a contribui na realisacion di
E buki aki, muy especial na Ija, mi esposa***

Juni 2005